

Bitabu bilondakho eli elomo endayi

Ya Yoana Omuraboora

Ne

Ebarua yo Murumwa

Paulo khu Barumi

Kamaandiko kamaraboora kaali kang'ali

Khukhwama mu baangeli ya omwami Yakobo

(Authorized King James Version)

Kumwalaalo Kwa Wele

Sirurile sia khuranga

Khuaana busa



Khumanyisia	3
Yoana	5
Barumi	41
Yesu – Murekeresie Niye!	61

**BUNGOMA BIBLE TRANSLATORS,
BEARING PRECIOUS SEED GLOBAL
EBANGELI YE LUBUKUSU
P.O. BOX 1447-50200, BUNGOMA, KENYA.
bungomabibletranslators@gmail.com**

Bung'ali bwosi bwabikhwa.

Khwaebwa bulekhule bwe khuandika kamaandiko Khukhwama mubangeli, mu khwilwacha nende khusomia, ne mukasi ye khuandika, khuchapisha, khubikha ne mubindu bie khulandasia kamakhuwa. Bubwaukhani bwe lukano lwosi lwosi sebunyala bwekholekha ne khukhali ne lifukilila nilio baandike tawe.

Cover Photo: Thompson Falls

<https://www.detomosabroad.com/wp-content/uploads/2008/09/kenya-4189-thompson-falls.jpg>

KHUMANYISIA.

Khukhwama biise ne biise bie khukhebulila, ebangeli yabirire mukhu kalukhasibwa khu khwama mu lukiriki lulwene. Luno luri sibala sie chulamo chinomo chili chimilioni chingali chikabukhana, ne lilienya lili khwasie khulubeka lwe ba Kiristo basuubila mbo Wele alomaloma khubesibala luno khubirira mwikhuwa liewe li aandike. Efwe khwabona mbo lili lie nganga khulandasia likhuwa mu khuchakisia lulomo lwefwe lwe lubukusu, mu khukalukhasia likhuwa lia Wele mu baandu befwe, Khukhwama mu bangeli yo omwami Yakobo yafukilibwa ya 1611 (*authorized King James Version of 1611*), ne Khubela sekhuli ne ebangeli niyo bakalukhasia mu lubukusu lulwene busa tawe. Khubirira mu meeko ke bakalukhasia musialo siosi be lumicho lwe enganga (*Global Bible Translators bearing precious seed*). Khwanyola kamaani ne kumoyo khubirira kamekesio kabwe nio mbo khukalukhasie likhuwa lia Wele. Nio mbo liolele babaandu bakali bakhamanyile lulunjaru tawe ne kakhali lulomo lwabwe lwoong'ene, nio bolaane khulandasia likhuwa. Khwanyola kamaani ke khukhola babaana ba Wele banyale khukhwilula mu lulomo nilwo bamanyile bulayi, babaandu balelula bariena mwako niko bakhaelewa tawe? Balaelewa bariena mwako ka kekisa mululomo nilwo bakhamanyile tawe?

Khwaloba khukalukhasia, namwe khuramo kakhenyikhane tawe Khukhwama mu lulomo lukiriki lulwene olwo, ne kakhali kabe niko Wele kalomaloma mu bangeli yo omwami Yakobo yafukilibwa. Khu khwilamo khwefwe khwekholekha khulondekhana ne kamalaka ke bukalukhasi kakalindwa nende bakalukhasi be khuranga ba 1611 be bangeli yo omwami Yakobo yafukilibwa. Khwaramo sinaani khulekha khuramo kamakhuwa busa kefwetawe, buli sinaani siekholekha khurera bukalukhasi bueleweka mu lubukusu lulwene, ne lundi neburekefu bwaebwa khu chinyilili nio mbo chieleweke bwaangu. Eyino eli ekasi ye ba kirisito baberusia mu bangeli baenja khuelewa lilomaloma lia Wele khu baandu boosi. Khuruma sitabu sino nende sifuno mbo baandu boosi mu bi rekere bia Bungoma nende mulisasa lia Tranzoia mwi Rambo lia Kenya, bacha khuba ne bubweyangu bubofu bwe khu khweyika lilienya lia Wele, mala mukhuria okhwo, bamenye limenya liabwe lifukilibwa ebweni wa Wele. Khubirira mubukalukhasi buno khwekule litirisia lirere buwanga nio omundu anyale khubona abundu ali aburaboora lukali.

ELOMO ENDAAYI NGA YAANDIKWA NE YOANA YOANA KUMULIANGO KWEKHURANGA

1 Ekhuranga liabao likhuwa, ne likhuwa liaba ne wele, lundi likhuwa liaba Wele. 2. liliene ekhuranga liaba ne Wele. 3. Bindu bioosi biabumbwa khubirira muniye, sesilio sindu siosi mu bibumbe sikhakholwa muniye tawe. 4. Muniye bulamu bwabamo ne bulamu buno bwaba buwanga bwe babaandu. 5. Buwanga bukhosianga musilima ne silima se siabunyala tawe. 6. Omundu abayo warumwa ne Wele lisina liewe bali Yoana. 7. Owecha khubolela bandu kebuwanga, nio bosi baulile burumwa mala ba suubile. 8. Omwene se aba buwanga tawe, ne kakhali karumwa khuba omuloli we buwanga obwo. 9. Obwo nibwo buwanga bwang'ali, bukhosiela buli mundu wicha musibala. 10. Kaba musibala, ne sibala siang'onwa naye, mala sibala se siamumanya tawe. 11. Echa khusiwe se sisiene, ne sisiewe se siamwakanila tawe. 12. Kakhaba kario khu bakali ba bamwakanila kabawa bunyali khuba babaana ba Wele, akhaba khu ba suubila mu lisina liewe. 13. Babasalwa, seli mumafuki, namwe mu lienya lie kumubili, namwe lilienya lio omundu, ne kakhali lia Wele. 14. Ne likhuwa elio liekhola kumubili, mala amenya mwifwe, (ne khwabona luyali lwewe, luyali lwo muteelwa nga anyola khu papa,) eechula ku mwalaalo ne bungali. 15. Niye Yohana abola buloli bwewe, ne kalila, naloma, yuno niye naloma ndi okheche enyuma wase, nekhali ali omukali khu khukhila ese: ne khebulwa tawe. 16. Ne mubwichufu

bwewe efwe fwesi khwanyola, kumwalaalo khu mwalaalo. 17. Lilaka lianwa ne Musa, ne khali kumwalaalo ne bunga'ali biecha ne Yesu Kirisito. 18. Mbao omundu owabonakho wele tawe; ne akhali omwana omutelwa yeng'ene, lundi oli ne papa omwene niye amanyisha wele khwifwe. 19. Ne Kano kamandiko ka Yoana, nga bayaudi ne baruma bakhulundu ne balawi mu yelusaremu khumureba bali, "ewe niwe naanu?". 20. mala eyama, se aloba tawe, nekhali eyama ali " Ese se ndi Yesu Kirisito tawe". 21. Lundi bamureba bali, " ewe niwe omung'osi chana?" abakobosia ali, "tawe". 22. Ne bamubolela bali, ewe naanu? Nyo mbo khueleshe kamachibu abo bakhurumire. Oloma oli sina khwiwe wamwene? 23. Kaloma ali " ese endi kumumilo kulilila musichimi kuli, "kololosia engila yo mwami, nga omung'osi Esaya kaloma". 24. Ne abo barumwa baba bamile mu Bafarisayo. 25. Bamureba niye bali: sina sikila ne obatisia ewe? Kabali soli Kirisito tawe, namwe Eliya, namwe omung'osi oyo, 26. Yoana aabakobosia ali ese mbatisia ne kameechi ne kakhali omundu mulala aamwimilemo niye enywe mukhamanyile tawe. 27. Alikho echa enyuma wase, ne ese senolana khukanyulula chingoye che biraro biewe tawe. 28. Kano kosi kekholekha Betaima, ebukwe bwe luluji Yoridan nio Yoana abatishilanga. 29. Endalo elondakho Yoana abona yesu ne echa nio ali, aloma ali, lola limeme lia Wele, lirusiao bubwoni bwe sibala. 30. Yuno niye na lomilengekho, enyuma wase omundu

alio mala ali omukali khukhila ese: sikila abao ese ne khebulwa tawe. 31. Ese samwene senamumanya tawe, ne khubela nio amanyikhe khu Israeli, sikila ese necha nembatisia ne kameechi: 32. Ne Yoana arusia buloli bwewe ali: “nabone roho ne kekha anga liusi khukwama mwikulu mala aamwimakho. 33. Lundi senamumanya tawe: ne kakhali oyo owamduma khubatisha ne kameechi, ambolela ali, olabona Roho ne eekha khu muundu oyo, omundu oyo niye oobatisia ne roho umurabora, 34. nabone, ne lundi ndusia buloli mbo yuno niye omwana owa Wele. 35. Endaalo eloondakho Yoana abao lundi, nende babeeka bewe babili; 36. nge abona yesu ne alikho abiiira aaloma ali, “lola, elio limeeme lia Wele!” 37. Lundi babeeka babili bamuulila ne aloma kano, mala balonda khu Yesu. 38. Yesu kekhebuka, ababona bamulondilekho, kabareba, mu likhomuenja naanu? Nabo ba mubolela, Rabii (sifuna sialio mbo omwekesia) wikhalanga wae? 39. Naye kababolelainja mubonee. Becha babona nio kekhalanga, bekhala naye endalo eyo: chaba embi chisa ekhumi che ekoloba. 40. Mulala khuabo babili babaulila Yoana naloma ne bamulondakho, kaba Andreyana wandaaye wa Simion Petro. 41. Lwe khuranga kanyola wandaaye Simoni mala amubolela ali “khwanyolile masiyya” lifunana lili, Krisito. 42. Mala amurera khu yesu. Nga Yesu kamulola, aloma ali “lisina liowo lili simion okhwa Yonana: ne kakhali okhalangwe kefa. “lisina kefa Sifuna sia lio, lulwanda. 43. Endaalo eloondakho. Yesu kaacha kalilaya anyola Filipino, mala amubolela ali, nondekho 44. Nono Filipino aba ama mu betesaita mulukoba nimwo Adreya

ne Petro bamenya. 45. Filipino anyoola Natanieli mala amubolela ali, khwamunyolile, oyo niye Musa aandikakho musitabu sie lilaka, ne bang’osi, niko baandika, Yesu wa Nasareti, omwana wa Joseph. 46. Nataniel naye areeba ali, silikhoo sina silai sinyala siana Nasareti? Filipino akobosia ali, Yicha obone. 47. Yesu kabona Nataniel echa niyo ali, amubolela ali, lola omuisraeli nga’ali okhalimo bubacha tawe. 48. Nataniel amureba ali, umanyile oriena? Yesu akobosia ali “ khubone anga obeelee ne wikhale asi we kumukhuyu Filipino nakha khulanga tawe. 49. Natanieli amukobosia ali, omwekesia, ewe oli omwana owa wele; Ewe oli omwami wa Isirseli. 50. Yesu amukobosia ali, khubela khubolele ndi, khubone ewe asi we kumukhuyu, osubile? Olabona bibindu bikali biboofu khukhila bino. 51. Ne amubolelela ali, ng’ali, ng’ali, khubolela, enyuma wa kano mulabona likulu liekuukhe mala chingeloosi cha wele chi niina na chikha khu mwana wa mundu.

2 Ne endaalo ya khataru, si selelo siaba mu lukoba lwa Kana ekalilaya; Ne maayi wa Yesu abayo:

2. Yesu ne babeeka bewe bosibabalangwa musi selelo esio.
3. Nga nabenya endali, maayi owa yesu amubolela ali, sebali ne ndali tawe. 4. Yesu amukobosia ali, mukhasi, sina nisio wenya khole? esaa yase ekhola tawe.
5. Mala mawe owa yesu ababolela baakholi ali siosi siosi nisio amubolela, khola.
6. Nio barengakha chinyungu sita chiekamabale, nga kumwima kwa bayaudi kwe khusaaba, chichamo kamatebe kabili namwe kataru. 7. Nio Yesu abolela

bakholi ali, ichusia chinyungu kameechi. Bachi chusia chola khumunwa. 8. Mala aababile ali, nono khemutaekho kameechi chana matiti muyilile omwimelesi owenaikara. bamuilila kamechi. 9. Nga omwimelezi ne kaonjakho kamechi kakekholile endali sekamanya nio yamile tawe: (ne kakhali bakholi babataa kamechi bamanya;) nio alaanga omwene siselelo, 10. Mala amubolela ali, buli mundu yesiyesi anyoanga anywesia endali endayi; ne oli bakeni bekura ne aloondiakho musoka: Ne kakhali ewe obiikhile endali endayi lukali khukwhola bise bino. 11. Kamaya Kano kaba kekhuynyoa niko Yesu akhola mu Kana ye kalilaya, ebweneeyo ekesia luyali lwewe; mala babeeka bewe ba suubila mu niye. 12. Enyuma wa Kano kacha kapernaumu, niye, ne maayi wewe, ne bawandaaye, ne babeeka bewe: bamenyakhoyo chindalo nditi. 13. Siise sia naikara eya pasaka siaba sili siimbi, nio Yesu acha yerusalem. 14. Ebweneeyo anyola baandu mukelesia ne bali kho bakusia chieyi; kamakhese ne kamausi kamabaya, Akhaba bafunja chirupia bosi babaa bekhale khumesa; chiabwe. 15. Nio ang'ona kumusariti kumukekhe kwe chisia, mala alonda khangu kamakheese koosi ne chikhafu biarura mukelesia, afumalikha chimeza che bafunja chirupia, mala asalanisia chirupia chiabwe. 16. Mala abolela abo bakhusia kamausi kamabaya ali, karusie muno; Lekha khukhola enju eya papa khuba esooko. 17. Babeeka bewe bakhebulila bali liaandikwa, silukuluku sienju yowo siosela mwise nga kumulilo. 18. Ne Bayaudi be bunyali bamukobosia ne lireeba bali, mayia siina niko onyala wakhola kakhwekesia efwe kali oli ne bunyali bwe khukhola kano? 19. Yesu

abakobosia ali, yonakaka ekelesia yino, ne muchindalo chitaru ndakimia lundi. 20. Nono Bamubolela bali ekelesia yino yabukula kimiiko kamakhumi kane ne kikiindi sita khukhwombakha! Mala ewe okiombakha mu ndalo chitaru? 21. Ne kakhali ekelesia niyo Yesu alomaloma ngakho yaba kumubili kwewe. 22. Nio nga alamusibwa khukwama mu lifwa, babeeka bewe bakhebulila bali aloma lino; mala basuubila liandike, ne likhuwa nilio Yesu kalomaloma. 23. Nga Yesu aba mu yerusalemu mu ndalo cha Naikara eya pasaka, bakali basuubila mu niye nga babona kamayia niko aakhola. 24. Ne kakhali Yesu se erusi khunibo tawe sikila aba abamanyile boosi. 25. Se enaana omundu yesi yesi amubolele liba lie omundu tawe, khubela aamanya koosi kaali mu mundu.

3 Abao omundu omufarisayo, lisina liewe bamulanga bali nikodemu omuruki we bayaudi; 2. Omwene echa khu Yesu musilo, na amubolela ali, Rabi, khumanyile khuli ewe oli omwekesia khukhwama khu Wele: khubela salikho omundu onyala akhola kamaya kano niko ewe khokhola ta, Wele nakhali ne naye. 3. Yesu amukobosia na amubolela ali, ng'ali, ng'ali, khubolela ndi, ne kakhali omundu nakhebulwe lundi, sanyala abona bubwami bwa Wele tawe. 4. Nikodemu amubolela ali, omundu asalwa lundi ariena nali omukhulu? Anyala kengila lukhola khabili munda mwa maayi wewe mala kebulwe? 5. Yesu amukobosia ali, ng'ali, ng'ali, khubolela ndi, omundu na khebulwe khubirira khumechi ne khulwe roho, sanyala kengila mubwami bwa Wele tawe. 6. Esio sisiebulwa khulwe kumubili sili kumubili; ne esio sisiebulwa muroho sili eroho. 7.

Okhesindukha oli khubolele mbo wenyikha wibulwe lundi. 8. Ekhungu eucha nio yenyile; ne ewe oulila busa luyoka nilwo ekhola, na somanya niyo yama, ne niyo echa ta; nio kali kario khumulala owibulwa khu roho. 9. Nikodemu amukobosia ne aloma ali, bibindu bino biba biriena? 10. Yesu amukobosia ne amubolela ali, ewe oli omwami we ba Israeli, ne somanyile bibindu bino tawe? 11. Ng'ali, ng'ali, khubolela ndi efwe khuloma ako niko khumanyile, ne khurusia buloli khwako niko khwabona, ne semwakanila buloli bwefwe tawe. 12. Kabali nakhubolele bibindu bia musibala, ne sosubila ta, olasubila oriema, kabali khubolela khubindu bie mwikulu?. 13. Ne salikhoo omundu wanina mwikulu, nekakhali oyo wekha kukhwama mwikulu, akhaba omwana wo mundu oli mwikulu. 14. Nenga Musa na kasuta endemu musichimi, mungila ng'eneyo omwana wo mundu yesi asutwe angaaki: 15. Mbo buli sia mulala osubila muniye sacha khu buuna tawe, ne kakhali abe ne bulamu bwa mindali. 16. Khubela Wele kasiima sibala mbo aana omwana wewe omuteelwa, nio mbo yesi yesi osubila muniye akhabuna tawe, ne kakhali abe ne bulamu bwa mindali. 17. Khubela Wele se aaruma omwana wewe mu sibala khuba omukhalakaki wasio tawe; ne kakhali sibala khubirira muniye sionisibwe. 18. Yesi yesi osubila muniye sakhalakilwa tawe; ne kakhali oyo okhasubila tawe akhalakilwa khale, sikila se kasubila mwisina lia omwana wa Wele omutelwa tawe. 19. Ne bukhalaki buli buri; mbo buwanga bwechile musibala, mala babandu basima sisilima khukhila buwanga, sikila bikholwa biabwe bili bimayanu. 20. Abo

bosi bakhola bibindu bimayanu babiila buwanga mala sebacha mu buwanga tawe, sikila sebenya bikholwa biabwe bimayaanu bibonekhe tawe. 21. Ne kakhali oyo okhola kali kang'ali echa mu buwanga, mbo bikholwa biewe bibe abuwanga, mbo bikholekhe mu Wele. 22. Enyuma wa kano Yesu ne babeka bewe becha mungongo che buyuda; amenyayo ne naabo, mala kabatisia. 23. Ne Yoana yesi abatisilianga mu Anoni simbi busa Salimu, sikila kameechi kabao kamakali abweenao: mala becha, ne babatisibwa. 24. Sise esio Yoana abeele akha rebwa musiboe tawe. 25. Nono abweenao liabao lireba akari we babeeka ba Yoana balala ne bayaudi khulondekhana ne kumwima kwe khusaaba. 26. nio becha khu Yoana, ne bamubolela bali, Rabi, oyo owabaa ne nawe engelekha wa Yorodani; niye waloma lomakho buloli, lola, luno yesi abatisia mala baandu boosi becha khuniye. 27. Yoana abakobosia na aloma ali, omundu sanyala anyola sindu siosi tawe, ne kakhali, nisio bamuelesia khukhwama mwikulu. 28. Enywe mwabene muli baloli base, mbo naloma ndi ese sendi Kirisito tawe, ne kakhali narumwa ebweni wewe. 29. Niye baakhiile niye omwene mwea; ne kakhali omusale wo mwea, wimangayo arekeresia mala asangala ne aulila kumumilo kwoyo niye baakhile: busangafu bwase bwichusibwa burio. 30. Kenyikha niye akaliye, mbo ese nase Khukhwola nile aasi. 31. Oyo wicha khukhwama angaki alli omukali khukhila boosi, oyo wama musibala ali we sibala, ne alomaloma kamakhuwa ke sibala: oyo owama mwikulu ali angaaki we boosi. 32. Ne niye niko kabona ne khuulila, buloli nibwo aboola; salio

wafukilila bulo bwewe tawe. 33. Ne kakhali omundu yesi yesi ofukilila buloli bwewe aandalasia ne nakano ali Wele ali wa ng'ali. 34. Khubela oyo niye Wele aruma abolanga kamakhuwa ka Wele; khubela Wele amueleshanga eroho yewe mu bwichufu. 35. Papa kasiima omwana, ne kamueleshia bindu bioosi mu makhono kewe. 36. Oyo osubila mu mwana ali ne bulamu bwa mindali; ne oyo okhasubila omwana tawe salibona bulamu tawe; ne kakhali lirima lia Wele lili khungaaki khwewe.

4 Nono khwako nga omwami kamanya ali bafarisayo baulila mbo Yesu akholile ne khubatisia babeeka bakali khukhila Yohana. 2. (kakhaba kario Yesu omwene se kabaatisiakho tawe ne kakhali babeeka bewe.) 3. Arekukha ebuyuda, ne acha lundi e kalilaya. 4. Ne aaba kenyikha ache beele abirire mu Samaria. 5. Nono kecha kola mulukoba lwa Samaria, nilwo lulangwa bali sika, lwaba siimbi ne lusambu nilwo Yakobo alesia omwana wewe Yusufu. 6. Esebele eya Yakobo yaba abwenao, yesu khwako, aba aluile khu lukendo lwewe, mala ekhala a sebele: Yaba embi chisaa sita. 7. Abao omukhasi omusamaria echa khutaa kamechi: mala Yesu amubolela ali, mbekho nywe. 8. (ne khubela babeeka bewe baba bachile mu lukoba khukula siakhulia). 9. Nono omukhasi omusamaria oyo amukobosia ali, kali kariena mbo ewe oli omuyaudi, usabe ese kameechi onywe? Nese ndi mukhasi Musamaria? Khubela bayaudi sebalikho ne buambani ne basamaria tawe. 10. Yesu amukobosia namubolela ali, abanga omanyile sianwa sia Wele, ne

naanu niye olakhu sabanga ewe ali, mbe kameechi nywe; andi okha musabile niye, ne akhakhuelesie kameechi ke bulamu. 11. Omukhasi aloma ali, omwami, se oli ne sisindu sie khutailamo tawe, mala esebele endeeyi; olanyola waena nono kameechi ke bulamu ako? 12. Ewe oli omuboofu khukhila kuuka wefwe Yakobo, owakhuelesia efwe esebele, ne yesi omwene kanywamo, ne babaana bewe, ne bibiaayo biewe? 13. Yesu amukobosia na amubolela ali, yesi yesi onywa khu meechi kano akhabe ne bulesia lundi :14. Ne kakhali yesi yesi onywakho khu meechi niko muelesia se aliba ne bulesia lundi tawe; ne kakhali kameechi niko ndamuelesia kalaba muniye esebele ya kamechi efututusia mu bulamu bwa mindali. 15. Omukhasi chana amubolela ali, Omwami, mbekho kameechi kano, nio bulesia bukhandia tawe, namwe khecha ano khutaa tawe. 16. Yesu amubolela ali, khoche, olaange omuseecha wowo, mala wiche ano. 17. Omukhasi amukobosia na aloma ali, sendi no museecha tawe, Yesu amubolela ali, walomile bulayi, oli sendi no museecha tawe. 18. Khubela wabele khu baseecha barano; ne niye oli nenaye saayi Sali omuseecha woo tawe: khu lienelio walomile bunga'ali. 19. Omukhasi amubolela ali, omwami, mboona ndi ewe oli omung'osi. 20. Bakuka befwe basayila musikulu sino; ne ewe oloma oli, Mu yerusalemu niyo baandu benyikha basaayile. 21. Yesu amubolela ali, mukhasi, suubile, esaa eli khoicha, niye mu khaliba musikulu muno, namwe Muyerusalemu tawe, khusaaya Papa. 22. Ewe wisaaya nisio okhamanyile tawe; efwe khumanyile nisio khwisaaya:

Khubela buuonia buli bwe bayaudi. 23. Ne kakhali esaa eli khoyicha, mala bisee nibio bino, niye babesaaya mubung'ali bacha khusaaya papa muroho ne mu bung'ali: Khubela Papa aenja ba mwisaaya bario. 24. Wele ali eroho; ne abo bamwisaaya benyikha bamwisaaye niye muroho ne mubung'ali. 25. Omukhasi amubolela ali, ese manyile ndi Kirisito akheeche, niye balanga bali Kirisito; na akheeche, acha khukhubolela bindu bioosi. 26. Yesu amubolela ali, ese okholoma nawe nise. 27. Ne khumenako babeeka bewe beecha, ne besindukha mbo alomaloma no Omukhasi oyo; ne kakhali omundu se alomalomakho ali, okhoenja sina ewe? namwe, sina ewe nolomaloma naye? Omukhasi nono alekha esongo yewe, mala aacha engila yewe ye mulukoba, ne abolela bandu ali, 29. Yiicha, mubone omundu, wumbolele bibindu biase biosi nibio nakhola: Sali niye Kirisito? 30. Nono barura enje we lukoba, mala beecha niye ali. 31. Mubise nibio babeeka bewe bamureba bali omwami, kholie. Ne kakhali ababole ali, ndi ne siakhulia sekhulia nisio mukhamanyile tawe. 33. Khwako babeeka bewe babolanila mulala khu kundi, omundu yesi yesi amure rerekho siekhulia? 34. Yesu ababolela ali, siakhulia siase sili kukhola liliyenya lioyo wanduma, mala male ekasi yewe. 35. Mukhaloma enywe muli kiasikale kimiesi kine, ne nio likesa liole? Lola, ese mubolela enywe, suta angaaki chimoni chienywe, mala mulole mu chisambu; Khubela biangale bureke khwi kesa. 36. Ne oyo okesa anyolanga kumururu, ne abusia kamatunda khu lwe bulamu lwa mindali: mbo bosu oyo obiala nende oyo okesa nio bekhoyele alala. 37. Ne ano lusimo lwa ng'ali, mulala abiala, no

okundi akesa. 38. Ese nabaruma enywe khukesa niye mukhakhola ekasi tawe: baandu babandi bakhola ekasi, ne enywe mwengila mukasi yabwe. 39. Ne bakali basamaria be mulukoba olwo ba musuubila khu lilomaloma lio omukhasi warusia buloli ali, ambolele bindu biosi nibio nakhola. 40. Nono anga basamaria becha khuniye, bamureba amenye nabo: mala amenya nabo aao chindalo chibili. 41. Ne bakali batasa khu musuubila khulwe likhuwa liewe omwene; 42. Mala babolela omukhasi oyo, saayi khwasuubile, sekali busa khuniko ewe olomile tawe: khubela fwabene khwaulile, ne khumanyile mbo bung'ali ali Kirisito, omuonia we sibala. 43. Enyuma we chindalo chibili warekukha, mala acha mu kalilaya. 44. Khubela yesu omwene arusia buloli, mbo omung'osi Sali ne liria musibala siewe sisiene tawe. 45. Nono namalile echa mukalilaya, bakalilaya ba mwakanila, nga ne babona bindu biosi nibio kakhola mu yerusalemu munaikara: khubela bosu bacha munaikara. 46. Nono Yesu echa lundi mu kana ya kalilaya, niye kakhola kameechi khuba endali. Ne abayo omundu omukhongo, niye omwana wewe aba omulwale mu Kaperinaumu. 47. Nge nakulila ali Yesu echile mu Yudea ya kalilaya, kecha nie ali, kamu saba ali eche aonie omusani wewe khubela kaba simbi khufwa. 48. Nono Yesu amubolela ali, enywe ne mukhabone bilolekho ne ke khuukia, semucha khusuubila tawe. 49. Omukhongo oyo amubolela ali, omwami, khowiche busa omwana wase na akhafwa tawe. 50. Yesu amubolela ali, khoche engila yoo omwana woo ali omulamu, mala omundu oyo kasubila likhuwa nilio Yesu amubolela, ne kacha

engila yewe. 51. Ne nga aba na ali khacha engo, bakholi bewe bakanana neye, mala bamubolela bali omwana woo omulamu. 52. Nono abareba bise nibio omwana anjile khuonelamo. Mala bamubolela bali likoloba musaa saba che kuumusi bulwalwe bwa mururamo. 53. Nio papa kamanya ali bise ebio biabele ne bibiene, nibio Yesu kamubolele ali, omwana woo aonile: no omwene kasubila nende benju yewe yosi. 54. Kano kali kamaya ke khabilli niko yesu kakhola, na kamile ebuyuda na engila Kalilaya.

5 Enyuma wa kano, yabao enaikara ya Bayaudi; mala yesu acha mu Yerusalemu. 2. Nono liabao litisi mu Yerusalemu embi nesoko ye kamakhese, niye balanga mu lu eburania bali Bethisaida, liaba ne bilibwa birano. 3. Abwenao bakonao bantu bakali be butekhele bu bwabukhana, babofu, baleme, babafwokoya ne balindilila khushubulukha khwe kamechi. 4. Khubela engelosi yekhangha bulikhase mwitisi omwo, ne eshubulusha kamechi; yesi yesi wanyowa khukwamo kamechi ne kashubulikhe kanyola buonia khubulwale bwosi bwosi khu bulwale nibwo kaba nabwo. 5. Na omundu mulala abao, owaba omulwale khu miiko kamakhumi kataru na munane. 6. Nga yesu amubona akonile, ne amanya ali abele muhali eyeyo bise bileyi, kamubolela ali, “Eku, wenya obe omulamu?” 7. Omulwale amukobosia ali, omwami, sendi no mundu, kamechi ne kashubulukhe, oundumbula mwitisi tawe: ne kakhali nekhonicha, omundu okundi anyoanga olaamo ebweni wase. 8. Yesu amubolela ali, inyokha, bukula kumukeka kwo, mala okende. 9.

Abwene nabwene omundu oyo aona, mala abukula kumukeka kwewe, ne akenda; endalo eyo yaba ya sabato. 10. Khwako bayauti babolela oyo oonile, eyino endalo ya sabato; lilaka selikhufukilila khusuta kumukeka kwoo tawe. 11. Abakobosia ali, oyo umbonishe, niye umbolele, ali suta kumukeka kwoo, mala okende. 12. Nono bamureba, mundu sina okhubolele ewe, suta kumukeka kwoo, mala okeende?. 13. Ne omundu waonisibwa se kamumanya tawe khubela Yesu amiriokhile, bandu bakali ne bali abundu ao. 14. Enyuma wako yesu wamunyola mwitembeli, ne kamubolela, lola, ewe waonile; okhakola bubwoni lundi tawe, nio likhuwa libi likhecha liakhunyola tawe. 15. Omundu oyo karekukha, mala abolela bayaudi ali kaaba Yesu, niye wa muonia. 16. Nio khwako, bayaudi barakikha khu khupia Yesu siibi, na baenja khumwira, sikila akhola bibindu bino mu ndalo ye sabato. 17. Ne kakhali Yesu kabakobosia ali, “buli lwosi papa wase akholanga kimilimo, mala khwako sesi khekhola”. 18. Khwako bayaudi baenja lukali khumwira, sikila seli khufunaka lilaka lie sabato khwong’ene tawe, ne kakhali lundi aloma ali Wele ali papa wewe, ne mungila eyo elekhaasia khu Wele. 19. Nio Yesu amukobosia ali, ng’ali, ng’ali, ese mubolela enywe ndi, omwana sanyala akhola sindu siosi siosi khulwewe tawe, ne kakhali akhola nisio abonanga rarawe nakhola: nisio Papa akhola, esio nisio omwana yesi akhola. 20. Khubela Papa asiima omwana, mala amwekesia bindu biiosi nibio akhola omwene; ne alamwekesia bikholwa bibofu khukhila bino, nio muuke. 21. Khubela nga Papa ne kenyusia baafu, ne khubaelesia bulamu; mungila eyo

omwana aananga bulamu khwabo niye enya khuelesia. 22. Khubela Papa se akhalakilanga omundu yesi yesi tawe, ne kakhali aelesie omwana wewe bunyali bwosi khu bukhakali. 23. Nio mbo bandu boshi barie omwana, mungila ng'enyoy nga barichanga Papa, oyo okharia omwana saria papa wamuruma tawe. 24. Ng'ali, ng'ali, ese mubolela enywe ndi, oyo oulila likhuwa liase mala asuubile wanduma, bali ne bulamu bwa mindali ne sabali khalakilwa tawe; ne kakhali babira khale mulifwa baacha mubulamu. 25. Ng'ali, ng'ali, khubolela ndi, esaa elikhoicha, esaa chana yolile, bafu ba khaulile kumumilo kwo mwana wa Wele; mala abo ba khaulile ba khamenye. 26. Khubela nga Papa nali ne bulamu muniye omwene; nono kaelesia omwana khuba ne bulamu muniye omwene. 27. Na aelesia omwana bunyali bwe khu khalaka yesi, sikila ali omwana wo mundu. 28. Mu khesindukhila lino tawe, khubela esaa elikhoicha, nio mbo boosi bali mubilindwa bakhaulile kumumilo kwewe. 29. Mala ba kharuremo; abo boshi ba bakhola kamalai, mu libukha liye bulamu, na abo ba baakhola kamabi mulibukha lie sikhalakilo. 30. Ese senyala nakhola sindu samwene tawe; nga ne mbulila, khalaka; ne sikhalakilo siase sili siang'ali sikila sembenja liliyenya liase samwene tawe, ne kakhali liliyenya lia Papa oyo wanduma. 31. Ese nendusia buloli bwase samwene, buloli bwange sebuli bwa ng'ali tawe. 32. Khulio no kundi orusia buloli bwaase; ne manyile ndi buloli nibwo abola kwise buli bwa ng'ali. 33. Enywe mwaruma burumwa khu Yoana, mala arusia buloli bwa ng'ali. 34. Sakali bali nyole buloli khu khwama khu mundu tawe, ne kakhali bindu bino

mbola ndi, mbo mwolane khu onisibwa. 35. Oyo abaa etala eburukha ne buwanga bu khosia, enywe mwafukilila khubise khu khwikhoyela mu buwanga bwewe. 36. Ne kakhali esendi ne buloli buboofu khukhila obwo bwa Yoana; khubela kimilimo nikio Papa ambelesia khu khola male, kimilimo kimiene nikio khola kirusia buloli mbo Papa kanduma. 37. Ne Papa omwene, owanduma, arusisie buloli khwise. Mu khaulilakho kumumilo kwewe bise biosibiosi, nammwe mukha mubonakho nga afwana. 38. Ne semuli ne likhuwa liewe mukari mwenywe; khuyo niye wanduma, niye mu khasuubila tawe. 39. Mu menielesia chi nyilili; khubela mu nicho mwibasias muli muli ne bulamu bwa mindali: ne nicho chirusia buloli bwase. 40. Ne semwicha kwise ta mbo mwolane khuba ne bulamu. 41. Ese senyola luyali khu khwama khu baandu tawe. 42. Ne kakhali mumanyile enywe, mbo semuli ne busiime bwa Wele mukari mwenywe tawe. 43. Etese necha mwisina lia papa wange, mala semunjakanila tawe; kabali okundi nakecha mwisina liewe mu khamwakanile. 44. Mu khasuubile muriena enywe, oyo waakanila luyali mulala khu kundi, mala semuenja luyali lulwama khu Wele lwong'ene tawe?. 45. Mu khebasias muli ese olimusitaka enywe khu Papa wase tawe: Alio mulala omusitaka enywe, akhaba Musa, niye mwasuubila. 46. Khubela banga mwasuubila Musa, mwakhasuubile ese sesi: khubela aandika khulondekhana nase. 47. Ne kakhali kabaa ne mukhasuubila kamaandiko kewe, mulasuubila muriena kamakhuwa kange?

6 Enyuma we kamakhuwa kano, Yesu ambukha engelekha we nyanja ya Galilaya, eli enyanja ya Tiberia. 2. Ne sipupu sie babandu bakali sia mwongakho, sikila babona kamaya niko ka bakholela baaba balwale. 3. Ne Yesu aniina acha khusikulu, ne ebweneyo kekhala nende babeka bewe. 4. Na epasaka, enaikara ya bayaudi, beele eli simbi. 5. Nga ne Yesu asutaa chimoni chiewe angaki, mala abona lubusio lubofu lumwichakho, kabolela Philipo ali, khulakula kimikati wae, nio bano balie? 6. Ne kaloma kano khumukhaka; khubela omwene kamanya nisio kenyikha akhole. 7. Philipo kamukobosia ali “ chimia chibili chirupia khu mikati sechola bano tawe, nio mbo buli sia mulala anyolekho sikekhe. 8. Mulala khu beeka bewe, Andrea Simion Petero waandaye, kamubolela, 9. Khuli ano no muele oli ne kimikati kirano kie eshayiri ne ching’eni chibili chingekhe; ne kakhali bino bili sina mu bakali bano? 10. Ne Yesu kaloma, khola baandu bekhale aasi, nono abundu ao abao ne bunyasi bukali. Niyo be sisecha bekhala aasi, esabu yabwe yaba embi chieľefu chirano. 11. Mala Yesu abukula kimikati; ne amala khuana orio, aakaba babeeka bewe, ne babeeka bewe nabo khwabo babekhale aasi; ne akhola ario akhaba chi ng’eni nga na banyala. 12. Nabo nga bekura, ababolela babeeka bewe, buusia bitonyi bisikaale, mbo sindu siosi siosi sikhataba tawe. 13. Nio babibusia biosi alala, mala bechusia bikono ekhumi na bibili bie bitonyi bia kimikati kieshairi kirano bibiasikala khwibio nibio baaba ne balile. 14. Nono babaandu abo nga baabona kamaya niko Yesu akholile, baloma bali, ng’ali yuno ali omung’oosi

owenyikha kwicha musibala. 15. Yesu nga nakamanya mbo khobonya khwicha khumutula ne kamaani, nio bamukhole omwami, arekukha lundi, aacha musikulu omwene yeng’ene. 16. Nga bise biekoloba biola, babeeka bewe beka emwalo sianyanja. 17. Mala bengila muliaro ne barekukha bambukha enyanja bacha kaperinaumu, silo siola, Yesu nakhakobola niio bali tawe. 18. Ne enyanja yashubulukha khubela ekhungu engali eya uucha. 19. Nono nga baaba ne bafukile liliaro chikilomita ishirina tano namwe salasini, mala babona Yesu nakeenda khu nyanja, naecha simbi aliaro: mala baria lukali po. 20. Ne kakhili ababolela ali, niise, mukharia tawe! 21. Mala bafukilila khumwakanila khuliaro: ne khaangu liliaro liola khusikingi abundu niio baaba ne bacha. 22. Endaalo eloondakho, babaandu bakali babema sikelekha sie nyanja baabona bali seliabakhoo liliaro lilindi tawe, nekhali elio nilio babeeka bewe baninamo, ne Yesu omwene sa engila alala ne babeeka bewe muliaro elio tawe, nekhali babeeka bewe barekukha bong’ene. 23. (kamaaro kakaandi khukhwama Tiberia kecha khusiikingi siimbi ne abuundu niio baliila kimikati, enyuma wo mwami khumala khuana orio.) 24. Nga baandu ne babona bali Yesu Sali aao ta, namwe babeeka bewe, bosu bengila muliaro, mala becha Kaperinaumu, ne khabayima Yesu. 25. Nga nebamunyola sikelekha sisindi sie enyanja, bamubolela bali, omwami wichile aano liina?. 26. Yesu abakobosia naloma ali, ng’ali ng’ali, mubolela ndi, munjiima, sekali bali mwabone kamaya tawe, ne kakhali siikila mwalia kimikati, mala mwekura. 27. Mukhakholela kimilimo

siakhulia sibola tawe, ne kakhali khubela siakhulia esio simenya khulwe bulamu bwa mindali, nisio omwana wo mundu acha khumuelesia enywe; sikila Wele Papa amurakho simanyilo siewe sie khumufukilila. 28. Nio bamubolela bali, khukhole khuriena, nio khukhole niko Wele enya khukhole? 29. Yesu akobosia na ababolela, eyino niyo ekasi ya Wele, mbo mu musuubile niye oyo wanduma. 30. Nono khwako bamubolela, silolekho sina nono nisio olekesia, nio mbo khubone na khukhusuubile ewe? Olakhola mulimo sina? 31. Bakuuka befwe balia mana musichimi; nga liandiko ne liboolanga lili, 'kabaeesha kumukaati khu khwama mwikulu balie.' 32. Yesu aababolela ali, nga'li, nga'li, Ndikho mubolela Musa sa amuelesha enywe kumukati khukhwama mwikulu tawe; Papa wase niye omuelesianganga enywe kumukati kwa ng'ali khukhwama mwikulu. 33. Khubela kumukati kwa wele ali oyo wekha khu khwama mwikulu, ne aana bulamu musibala. 34. Nono Bamubolela, bali, "Omwami buli lwosi khuwe kumukati kuno." 35. Ne Yesu ababolela ali, "ese niise kumukati kwe bulamu. Oyo wicha khwise se aliba ne njala tawe; oyo osuubila mwise se aliba ne bulesia tawe. 36. Ne kakhali nababolela enywe ndi mwesi mwamboone, mala se musuubila tawe; 37. Boosi nibo papa wase amba balecha khwise; ne oyo wicha khwise sendi mumwata enje tawe. 38. khubela se necha khukhwama mwikulu khukhola lilienya liase samwene tawe, ne kakhali lilienya lioyoo wanduma. 39. Ne lino Lili lilienya lia Papa wanduma ese, mbo khubosi nibo ambelesia khatibikho sio siosi tawe; ne kakhali sinyusie khu ndaalo emaliilisi. 40. Lino lili lilienya

lioyo wanduma ese, mbo buli siamulala obona omwana, mala amusubile niye, alinyola bulamu bwa mindali: mala ndi mwinyusia endalo emalisisi." 41. Bayaudi barakikha khu khweng'ulung'unya, sikila aaloma ali "Ese ndi kumukaati khukhwama mwikulu." 42. Nio baloma bali, "Omundu yuno se ali Yesu okhwa Yosefu tawe ku? Khumanyile raraawe ne maawe. Nono aloma ariena ali ekha aasi khukhwama mwikulu?" 43. Yesu abakobosia ali, "mu kheng'ulung'unya khumwabene tawe. 44. Se aliio omundu onyala echa khwise papa owanduma ese nakhamureerire khwise tawe; mala khundalo emaliilisi ndimulamusia. 45. Liandikwa mubang'osi, mbo boosi baliekisibwa khu Wele. Buli mundu oulila ka papa na khukhweyika khu niye echa khwise. 46. Se kali bali omundu yesi yesi aabona papa tawe, ne kakhali oyo owama khu Wele yeng'ene niye owaboona papa. 47. Ng'ali, ng'ali, Ndikho mubolela enywe bung'ali. Oyo osuubila mwise, ali ne bulamu bwa mindali. 48. Ese ndi kumukati kwo bulamu 49. Bakuuka benywe balia mana mu sichiimi, ne kakhaba kario bafwa. 50. Kuno kuli kumukati kukwikha khukhwama mwikuli, mbo omuundu nakulia, salifwa tawe. 51. Ese ndi kumukati kwe bulamu kukhwekha khukhwama mwikulu. Omundu yesi yesi aba nalia kumukaati kuno, alimenya mindali; Kumukati nikwo ndamuelesia kuli kumubili kwase nikwo mbaana khulwe bulamu bwe sibala. 52. Bayaudi bayiingana akari wabwe. nebaloma bali, "Omundu yuno anyala ariena khukhuelesia efwe kumubili kwewe khulie? 53. Nono Yesu aababolela ali, " ng'ali, ng'ali ndikho mu boolela enywe, Mwaba ne mukhalia kumubili kwo

mwana wo mundu ne khunywa kamafuki kewe, se mulaba ne bulamu mwinywe tawe. 54. Abo balia kumubili kwase ne khunywa kamafuki kaase bali ne bulamu bwa mindali, mala khabenyusie khu ndaalo emaliilisi. 55. khubela kumubili kwase ne kamafuki bili siakhula sia ng'ali. 56. oyo olia kumubili kwase ne khunywa kamafuki kase, amenyile mwise, ne ese menyile mu niye. 57. Nga Papa oomenyile anduma, ne sesi menyile embi ne Papa. Mu ngila ng'enyoy oyo olia kumubili kwase, alamenya sikila ese. 58. Kuno kuli kumukati okwo kukwekha aasi khukhwama mwikulu; se kali nga bakuka ne balia mana mala bakelao bafwa tawe, oyo olia kumukati kuno alimenya mindali. 59. Alomaloma kano nga aba ne ekisia musinakooki mu Kaperinaumu. 60. Baloondi bewe bakali baulilaa kano mala baloma bali, Kamekesio kano kali kamaandalafu lukali. Naanu onyala wakarekeeresia? 61. Nga Yesu amanya ali babeeka balikho belung'unya khulwa kano, kababolela, elino limubelesia? 62. Kalaba kariena nono kabali mubona Omwana wo mundu naniina niio aba khale? 63. Roho niye wanguya; kumubili se kulikho ne bukhala bwosi tawe: kali Roho lundi bulamu. 64. Ne kakhaba kario balala mwinye se basuubila tawe."(Yesu amanya khu khwama mu khurakiha balala siina bakhali suubila tawe, ne mulala siina oli muchaama.) 65. Mala kaloma ali, khwako ese namubolele endi, mbo se aliio omundu onyala echa khwise, nekakhali papa nakhakholile kanyalikha tawe. 66. Khu khwama bise ebio Baloondi bewe bakali beela enyuma, mala khukeenda naye lundi tawe. 67. Nio Yesu areeba ekhumi na babili abo ali, Ne enywe, mwesi

murekukha muche? 68. Nio Simoni Petero amukobosia ali, Omwami, khuche khu naanu? Ewe oli ne kamakhuwa ke bulamu bwa mindali. 69. Ne khusuubila mala khuli ne bung'ali mbo ewe oli niwe kirisito, omwana wa Wele omenyile. 70. Yesu kabakobosia ali, sena murobora enywe ekhumi na babili, ne mulala khwinywe ali saitani? 71. Aloma khu Yuda Isikarioti, okhwa Simoni: khubela aba niye ocha khumuchama, oli mulala khwabo ekhumi na babili.

7 Enyuma wa kano, Yesu akeenda mu Kalilaya: khubela se enya khukeenda ebuyaudi tawe, sikila Bayaudi baenjanga khumwiira. 2. Ne Siise sia Naikara ye Bayaudi ye bisali yaba siimbi. 3. Ba wandaaye khwako bamuboolela bali, rekukha ano, mala oche ebuyuda, nio babeeka boo babone bibiindu nibio okhola. 4. Khubela Se aliio Omundu okholanga bindu mubwikisi tawe, ne omwene aenja khumanyikhana asiangalamo. yiyekesha wamwene khusibala. 5. Akhaba ba wandaaye se basuubila mu niye tawe. 6. Ababoolela ali, Siise siase sikhoola tawe. Ne biise bienywe biliio buli lwosi. 7. Sibala se sinyala siamubiila enywe tawe, ne kakhali simbiila ese, sikila buli lwosi ese ndusianga buloli bwasio ndi chingila chasio chili chimbi. 8. Enywe mwabene khemuche sia naikara. Ese sendikho nja sia naikara yino tawe, sikila biise biase biosi bikhoola tawe. 9. Nga amala khuloma kano khunibo, mala arama mu Kalilaya. 10. Enyuma ye ba wandaaye khucha sia naikara, yesi abaloondakho mubwikisi. 11. Nono Bayaudi baba balikho bamuenja sia naikara. Baloma bali, "Ali waena?" 12. Nio khwabao ne lieng'ulung'unya likali akarikari we

babandu khuniye. Balala baloma bali, ali omundu omulayi: babaandi bali “Tawe alikho atiibia babaandu.” 13. Kakhaba kario se abao omundu owa lomaloma ka yesu abuwaanga busa tawe, sikila baria bayaudi be bunyali.14. Nga naikara yaba siimbi khukhwola akari, yesu acha mu Lukaangu mala arakikha khu khwikisha.15. Bayaudi bauka lukali, mala baloma bali, Omundu yuno amanyile kamaandiko ariena mala sa ekesebwakho kano tawe?.16. Nio Yesu aba koboosia ali, mala aloma ali Kamekasio kase se kali kakaange tawe, ne kakhali koyo owanduma.17. kaabali Omundu yesi yesi alakhola liliyenya liewe, alamanya khulwe kamekesio nibambo kali ka Wele namwe noma khwise samwene.18. Olomaloma khu bunyali bwewe omwene akhaka khu khwenyoolela luyali omwene. Ne kakhali owenya luyali luchiile oyo owamuruma ali omu suubilwa, ne sisiindu siosi siosi sikhali ng’ali se simulimo tawe. 19. Musa se amuelesia enywe lilaka? Ne se aliio khwinye oria lilaka chana tawe. Siina sikila enywe ne mulaenjanga khu khunjira? 20. Babaandu bakali chana bamukoboosia bali, Oli ne sisieeno Naanu olaenjanga khukhwira ewe? 21. Yesu abakoboosia, mala ababolela ali, nakholile kumulimo mulala, mala mweesi mwesindukha. 22. Musa Khwako amuwa sikhebo; (seli sikila siaba sia Musa tawe, nekakhali sie bakuka benywe;) ne enywe mundalo ye sabato mukheba omundu. 23. Kaaba bali omundu akhebwa mu Sabato nio Lilaka lia Musa likhafunakwa tawe, muli ne lirima nase, sikila ese naoniisie omundu khu ndalo ye sabato? 24. Mu khakhalaka khu loondekhana ne khubonekha busa tawe, ne kakhali khalaka mu bung’ali.”

25. Nio balomaloma balala khwabo ba Yerusalemu bali, Sali yuno tawe, niye balaenjanga khukhwira? 26. Bona! Alikho alomaloma mu bunyindalifu, ne sebalomakhoo sindu khuniye ta. Ne bebunyali bamanyile bung’ali mbo uyuno ali Kirisito omwene? 27. Nekakhali khumanyile omundu yuno niye kaama: nekhalo Kirisito naliicha, se aliio omundu olimanya niio amila tawe. 28. Nga Yesu aba ne ekisia mu Lukaangu aboola mu mumilo kwe angaaki ali, Enywe ng’ali mu manyile ese, ne khumanya niio naama ku? Se necha khulwe bunyali bwase samwene tawe. Oyo owanduma ese ali ng’ali, Enywe se mumanyile tawe. 29. Ne ese mumanyile sikila nama khu niye lundi anduma ese. 30. Nio baenja khumuamba, ne kakhali se aliio owa mutilakho tawe, sikila esaa yewe yaba ekhoola tawe. 31. Ne bakali mu sipupu basuubila mu niye mala baloma bali, Nga Kirisito aliicha alikhola kamaya kamakali khukhila niko omundu yuno akholile ku? 32. Bafarisayo baulila babaandu ne balikho bemoonya kamakhuwa kano khu niye, nio bafarisayo ne basaayi bakhulu baruma balala khu baliindi khu muaamba. 33. Yesu ababoolela ali, Ese siilikho nanywe akeekhe ari busa, mala ndarekukha nje khuyo owanduma. 34. Muliimbenja, ne se muliinyoola tawe, nese niyendi enywe se munyala kwhichao tawe. 35. Bayaudi bareebana bali, ali khucha waena niio khukha munyoola tawe? Alacha mu basalanila akari kari we chikholo, mala ekisie bechikholo? 36. Lili likhuwa lia lukano sina nilio alomile mbo, mulambenja mala se mukhanyole tawe, mala niye ese ndaba enywe semunyala khwicho tawe? 37. Khu ndalo emalilisi eya naikara lundi

emboofu mu choosi, Yesu ema mala aloma mumilo kwe angaaki ali, Kaaba bali omundu yesi yesi ali ne bulesia, lekha eche khwise, mala anywe. 38. Oyo yesi yesi osuubila khwise, Nga liandiko ne liboola, khwama mkari mwewe mukhekhe chi njichi che kamechi ke bulamu. 39. (nekhali aloma kano khu Roho, niye abo basuubila mu niye bakhanyoole: Mu siise esio Roho aba asiili khuanwa sikila Yesu aba akhaebwa luyali tawe. 40. Babaandu bakali kwako nga bamuulila naboola kano mala baloma bali Omundu yuno ng'ali ali omung'oosi! 41. Babandi baloma bali, "yuno Kirisito! Ne kakhali babandi baloma bali," nono Kirisito aliama Kalilaya? 42. Liandiko seliboola tawe, lili Kristo aliba we lisaaye lio mwami Daudi mala alisaalwa mu Betelehemu mu lukoba nilwo Daudi kaba. 43. Nio khwaba ne bukabukhani mu baandu khubela niye. 44. Mala Balala babwe benya bamuambe, ne saabao omundu ata mulala owa mutilakho tawe. 45. Nga baliindi bakobolayo, basaayi bakhulu ne bafarisayo babareeba bali, Siina sikila ne mu khamureerire? 46. Balindi bakobosia bali, Omundu akhabakhoo olomaloma nga omundu yuno tawe. 47. Bafarisayo bakobosia bali, "Amubeyile akhaba enywe mwesi? 48. Balikhoo bakhongo namwe bafarisayo ba basubila muniye? 49. Ne kakhali babaandu bakhmanyile lilaka taa balaamwa. 50. Nikodemu, kababolela (owecha khubona Yesu siilo nali mulalakho wabwe,) 51. Khu loondekhana ne lilaka liefwe, se khunyala khukhalakila omundu ne khukha muulila mala khwa menielesia nisio akholile tawe. 52. Bamukobosia ne ba mubolela bali, wesi khane waama Kalilaya? Menielesia, obone:

kamaandiko olabona oli omung'oosi se akhamekho ekalilaya tawe. 53. Mala buli mundu achaa munju mwewe.

8 Yesu acha khu sikulu sia Mizeituni. 2. Lundi Muma khelebeende aakobola mu Lukaangu, Babaandu boosi becha khuniye; mala ekhala aasi, arakikha khubeyikia. 3. Baandiki nende bafarisayo bareera omukhasi niye banyola mu bueyyi, mala ba mwimisia ebweeni wabwe boosi, 4. Baloma bali, omwekisia, omukhasi yuno anyoolekhe ne alikho akhola bueyyi. 5. Nono mumalaka Musa alaka ali omukhasi nga yuno ari; akhoya apwe kamabaale afwe. Nono ewe oloma oli siina? 6. Kano baboola khumukhaka, nio banyoole engila eye khumuyaala. Ne kakhali Yesu enama aasi, mala aandika mwiloba ne lulwala, nga okhabaulile ta.7. Nga baendelea khumureba niye, akololokha mala ababoolela ali, Omundu yesi yesi khwinywe okhakholakho bubwoni tawe, abe owe khunyoya khu muchukucha libaale. 8. Enama lundi, mala aandika ne lulwa khwiloba asi. 9. mala Nga ne baulila kano boosi barakikha khurekukha sia mulala khu mulala khwamila khu bakhulu, akhaba khukhwola khu mumalilisi: malaYesu bamulekha yeng'ene, no mukhasi ne emile akari kari. 10. Nga Yesu ne akololokha angaaki, mala khubonakhoo omuundu tawe nekhali omukhasi, mala amureeba ali, bakhalagi boo bali wae? Se aliio omuundu okhukhalakile tawe? 11. Aloma ali, omundu twa, omwami. Ne yesu amubolela ali, Nio Yesu amubolela ali, Bulayi nono, akhaba ese se khukhalakila tawe. khoche ne okhakhola lundi bubwoni tawe. 12. Nono Yesu abolela lundi ali, Ese nise

buwaanga bwe sibala. Omundu yesi yesi ounonda alaba ne buwaanga bwe bulamu, ne salikeenda mu siilima tawe. 13. Bafarisayo ba muboolela bali, Nono ewe olikho orusia buloli bwowo wamwene; buloli bwoo sebuli bwa ng'ali tawe. 14. Yesu akobosia nababolela ali, akhaba ne mboola kakaase samwene niko mboola kali ng'ali sikila manyile niio naama nende niio ndi khonja; nekhali se mumanyile niio naama, namwe niio ndi khonja tawe. 15. Enywe mukhalaka likhalaka mu ngila eye kumubili. Ese se khalakila omundu yesi yesi tawe. 16. Ne abanga khalaka, andi likhalaka liase lili ng'ali: khubela se ndi seng'ene mu khukhola ndio tawe, papa owanduma ali ne nase. 17. Kaandikwa mu Lilaka lienywe bali, buloli bwe ba baandu babili buli bwang'ali. 18. Ese niye orusia buloli bwaase samwene, ne papa owanduma yesi andusiira buloli. 19. nono bamubolela bali, Raraao ali wae? Yesu abakobosia ali, enywe se mumanyile ese tawe, namwe papa wange tawe. Abanga mumanyile ese, enywe mwakhamanyile papa wange yesi. 20. Yesu aboola kamakhuwa ako nalikho na ekisia mu Lukaangu, mu lusiro lwe khubiikha kamasanduku ke siianwa. Ne se aliio owa muaamba tawe, sikila esaa yewe yaba ekhoola tawe. 21. Nono Yesu aba boolela lundi ali, ese khendekukha, mala enywe mulambiima, ne mala mulafwila mu bwoni bwenywe: ese niyo khonja, enywe se munyala mwecha tawe. 22. Nio Bayaudi baloma bali, anyala keyira omwene ku? Sikila aloma ali ese niyo ndikhonja enywe se munyala mwecha tawe. 23. Naye ababolela ali Enywe muli be aasi ano ne ese naama angaaki. Enywe mwama khu sibala sino, ne ese senaama khu sibala sino tawe. 24.

Khwako na muboolela enywe ndi mulifwila mu bwoni bwenywe; Mala mulifwila mu bwoni bwenywe ne mu khasuubile muli, Ese niye tawe. 25. Nono bamubolela bali, Ewe naanu? Yesu abakobosia ali Niko muboolele kali kamene khukhwama mu khurakikha. 26. Ndi ne kamakali ke khuloma ne khu khalaka khwinywe: ne khali wanduma ese ali ng'ali; ne ese mbolela be sibala ako niko naulila khuniye. 27. Se bamanyilisia bali kaba alikho ababolela khu Papa tawe. 28. Nio Yesu ababolela ali, Nga mulisuuta omwana wo mundu angaaki mulimanya muli, 'Ese Niye, mala mulimanya muli sekhola si siindu siosi siosi khu bunyali bwase samwene tawe, ne kakhali nga Papa ne anjekisie, ese nomaloma kamakhua kano. 29. Ne oyo owanduma ese ali ne nase, papa sa andekhile seng'ene tawe, khubela buli lwosi khola kamu siimisia niye. 30. Nga ne kaloma kamakhuwa kano, bakali ba muusubila. 31. Nio Yesu abolela bayaudi ba bamusuubila ali, Mwaaba ne mwikhala mu meko kase, aba enywe muli babeeka base bang'ali; 32. Mu lamanya bung'ali ne bung'ali chana bu lamukhola mube balekhuule? 33. Bamukobosia bali, efwe khuli lumicho lwa Ibrahimu, ne se khwabakho musiboe khu mundu yesi yesi tawe; ne ewewe oloma oriena, oli khu lakholwa balekhule? 34. Yesu aabakobosia, ng'ali ng'ali, "Ndikho muboolela enywe, yesi yesi ookhola bubwoni ali nasioobi owe bubwoni. 35. Nasioobi se ekhalanga muchu buli lwosi tawe: ne kakhali omwana niye wikhalamo buli lwoosi. 36. Khwako omwana ne amukhola mwaba balekhuule, aba ng'ali mulabeela elala balekhuule. 37. Manyile ndi muli lisaaye lia Aburahamu mala mulayimanga khu

khunjira, sikila likhuwa liange selili ne bu bweyangu mwinywe tawe. 38. Ese ndomaloma khu niko Papa wase anjekeesie, ne kakhali enywe mukhola niko muboone khu raraawenywe. 39. Ba mukobosia bali, Papa wefwe ali Aburhamu. Yesu ababolela, kaba bali muli babaana ba Aburhamu, mwakhakholile bikholwa bia Aburhamu. 40. Ne kakhali muenja khu khunjira ese, omundu obabolele bung'ali, nibwo naulila khu khwama khu Wele. Aburhamu sekakhola ario tawe. 41. Enywe mukhola bikholwa bia papa wenywe. Bamubolela bali, efwe sekwebulwa mu sifwabi tawe; khuli ne papa mulala yaani, Wele. 42. Yesu ababolela ali, Wele aba ng'ali Raraawenywe, andi mwasiima ese, sikila ese necha khukhwama khu Wele, nese nechile, ne senechile khu bunyali bwase samwene tawe, ne kakhali niye wa nduma. 43. Siina sikila ne mukhamanya niko muboolela tawe? Sikila se munyala mwaulila likhuwa liase tawe. 44. Enywe muli ba raraawenywe sietani, mala liliekoomba lia raraawenywe nilio mwasiima khukhola. Niye kaaba omwiiri khu khwama mu khurakikha ne akhemakho mubung'ali tawe, ne Khubela sekabamo bung'ali tawe. Na lomaloma bubeyi, alomaloma kali kakewe omwene; khubela ali omubeeyi, mala niye raraawe owe bubeeyi bwosi. 45. Ne sikila mbabolela bung'ali, se musubila ese tawe. 46. Naanu khwinywe onyala ekesia ali ese ndi ne bubwoni? Ne naaba ne mboola bung'ali nono siina sikila ne ese mu khasubila? 47. Oyo oli wa wele aulilanga kamakhuwa ka wele. Ako enywe semuulila taa sikila semuli ba Wele tawe. 48. Bayaudi bakobosia, ne ba mubolela bali, efwe se khuli ng'ali mu

khuboola khuli ewe oli omusamaria mala oli ne sisieeno? 49. Yesu abakobosia ali, "Se ndi ne sisieeno tawe. Ese naelesia Papa wase liria ne kakhali enywe se mumbelesia ese liria tawe. 50. Se ndikho neenjela luyali tawe. Ne kakhali aliio owenyekha aebwe luyali, mala niye omukhalaki. 51. Nga'li, ng'ali, muboolela enywe bung'ali ndi, omuundu yesi yesi otila likhuwa liange, Sali bona lifwa tawe. 52. Bayaudi bamubolela bali, Nono khwamanyile khuli ewe oli ne sisieeno. Aburhamu ne bang'oosi bafwa; ne nawe oboola oli yesi yesi otila kamekisisio kowo salifwa tawe. 53. Ewewe oli omukali khukhila papa wefwe Abrahamu, owaafwa?. Na bang'osi babafwa: ewe weyibaasia oli naanu? 54. Yesu abakobosia ali, Naaba ne neelesia samwene luyali, aba luyali olwo se lulaba ne bukhala bwosi bwosi tawe. Papa wase niye umbwa luyali, niye mwesi mulomanga muli ali Wele wenywe. 55. Se mwa mumanyakho tawe, ne ese namumanya. Naaba ne ndoma ndi, ese se mu manyile niye tawe, aba sesi nabeele omubeeyi nga enywe. Ne kakhali ese mumanyile, ne likhuwa liewe nalitila. 56. Raraawenywe Aburhamu ekhoya khubona endalo yange; ne kakibona, mala kekhoaya. 57. Bayaudi abo bamubolela bali, Ewe se oli ne bukhulu bwe kimiiko akhaba kamakhumi karaano kong'ene tawe, nono oloma oriena oli waboma Aburhamu. 58. Yesu ababolela ali, ng'ali, ng'ali Ndikho muboolela, Aburhamu nakhabao tawe, ese nabaa. 59. Niio bangala kamabaale bali bamupe, ne Yesu amiriokha arura mu Lukaangu, abira akarikari wabwe mala arekukha.

9 Nga Yesu aba ne alikho abiraa, abona omundu omubofu khwama anga asaalwa. 2. Babeeka bewe bamureeba, ne baloma bali, Omwami, naanu wakhola bubwoni, omuundu yuno namwe basaasi bewe, khu khwolana ebulwe omubofu? 3. Yesu abakobosia ali, oyuno sekakhola bubwoni tawe namwe basaasi bewe; ne kakhali nyo mbo ekasi ya wele ebonekhe muniye. 4. Kenyinkha khole kimilimo kioyo waanduma ese, enje nesili kumuusi: silo khosicha, niio omundu yesi yesi akhakhola kimilimo tawe. 5. Nga ese ne siili mu sibala, ndi buwaanga bwe sibala. 6. Namalile khubola kano afucha aasi atubaasia liloba ne kamare mala aakha litosi chana sia moni wo mundu oyo, 7mala aboola ali, Khoche osaabe mu moni mwitiisi lia Siloamu. (Liboola lili Owarumwa). Omundu chana acha; Asaaba mu moni, mala akobola ne alikho abona. 8. Ne bamenywa, ne babamubona nasili omubofu, babola bali Sali omundu yuno wekhalenge ne esabiilisia? 9. Balala baloma bali, oyuno niye: babandi baloma, afuanana nenaye: nekhali omwene kaloma ali ese nise. 10. khwako bamubolela bali, “Kali kariena luno chimoni chekukhe?. 11. Akobosia ali, Omundu olaangwa Yesu arokile litosi ambakha siamoni chase amboolela, cha Siloamu osaabe mu moni. Khwako njiile, mala nga saabile, abwene ne abwene, nabona, 12. Nabo bamubolela bali, Ali waena? Naye abakobosia ali, Semanya tawe. 13. bamuyila khu Bafarisayo oyo waba omubofu khu khwama khale. 14. yaba endalo ya sabato, niyo Yesu akhola litosi ne khumwikula chimoni. 15. Nio, Bafarisayo bareeba omundu chana lundi bali, Wamile oriena wabona?

Aababolela ali, Aakhile litosi khu moni chase, nasaaba mu moni, ne saayi mbona. 16. Khwako Bafarisayo balala baloma bali, Omundu yuno Sali wa Wele tawe, sikila se aria lilako lie Sabato tawe. Kakhaba kario, babaandi baloma bali, Omundu omwoni anyala ariena khukhola kamayia nga kano. Mala li liabukhana liabao akari wabwe. 17. Nabo bamubolela omufobu oyo lukhola khabili, ewe oboola siina khu niye sikila akhuonishe bubofu bwoo? aloma ali, niye omung’osi. 18. Ne kakhali bayaudi sebafulikila khulondekhana naye, mbo abele omubofu, mala anyolile khubona; khukhwola nga ne balanga basaasi bewe oyo wanyola khubona khwewe. 19. Mala babareeba bali, babareeba, ne baloma bali oyuno omwana wenywe niye muboolanga muli asaalwa omubofu? nono kabeele ka riena luno anyala aabona? 20. Babebuli bewe babakobosia bali, Khumanyile khuli ali omwana wefwe mala asaalwa omubofu; 21. Ne se khumanya kali kariena nga luno anyalile khubona tawe; namwe se khumanya abele naanu omuonisie bubofu bwewe tawe. Mureebe omwene, ali omundu omukhulu busa; omwene anyala kelomela. 22. Basaasi bewe baloma kario sikila abele bariire bayaudi; Khubela bayaudi bafukiilisia bali balaoona khukhwama mu sinakooki omundu yesi yesi naeyama ali Yesu ali Kirisito. 23. Esio nisio sisiakila basaasi bewe baloma bali, Ali omundu omukhulu, mureebe omwene. 24. Nono bamulanga lundi Lukhola khabili omundu waaba omubofu mala bamubolela bali, welesia Wele efuma: efwe khumanyile khuli omundu yuno omwoni. 25. Kabakobosia na aloma ali, abele omwoni namwe tawe, ese

semanya tawe; siisindu silala nisio manyile, mbo, ese nabeele omubofu, mala luno mbona. 26. Lundi bamubolela bali, Siina nisio akhukholilekho? Akhuonisie bubofu bwowo ariena? 27. Abakobosia ali, Namubooleele khale, mala se mwenya khu khumbulila tawe. Siina sikila ne mwenya khuulila lundi? Namwe mwesi mwenyile khuba babeeka bewe? 28. Ba mulaama ne baloma bali, Ewe oli omweka wo mundu oyo ne efwe khuli babeeka ba Musa. 29. Khu manyile khuli Wele alomaloma ne Musa; ne omundu oyo naye, se khu manyile akhaba niio aama tawe. 30. Omundu chana akobosia ali, lino lili lie khuukia! enywe se mumanyile niio aama tawe, mala aambonisie ese bubofu bwase! 31. Khumanyile khuli Wele se arekeeresianga baboni tawe; ne kabali omundu yesi yesi aba owinamila Wele mala akhola lilienya liewe oyo amuulila. 32. Khukhwama mu khurakikha khwe Sibala, se aliio owa ulilakho bali omundu yesi yesi eekula chimoni cho mundu owasaalwa omubofu tawe. 33. Banga omundu yuno se eecha khukhwama khu Wele tawe, andi se aanyala khukholakho liosi liosi tawe. 34. Ba mukobosia bali, Ewe wasaalwa mu bwoni, onyala oriena khu khwekisia efwe?" Mala ba mumwata enje. 35. Nga Yesu ne aulila mbo bamumwatile enje; niye nga kamubona, amubolela ali, Ewe osubila omwana wa Wele ku? 36. naye amukobosia ali, naanu niye Omwami, nyale khu mu suubila? 37. Yesu aamubolela ali, Wamuboone, niye olikholoma loma nawe niye. 38. Naye kaloma ali, nasuubiile Omwami. Mala aasikama. 39. Yesu aaloma ali, necha khu sibala siino khukhalaka, nio babofu babone ne abo babona bekele babofu.

40. Bafarisayo balala ba babao bamuulila ne aloma kano mala bamureba bali, Aakhaba fwesi khuli babofu? 41. Yesu ababolela ali, Abanga bali muli babofu, andi se muli ne bubwoni tawe; ne kakhali sikila muloma muli, mubona; aba bubwoni bwenywe busiilimo.

10 Ng'ali, ng'ali, Ndikho mubolela, oyo ocha mu siiko sie kamakheese mala se engilila mu silibwa tawe, ne kakhali abirira abuundu aandi, oyo ali omwifwi lundi omunuuli. 2. Ne kakhali oyo ovingilila mu silibwa ali omwaayi we kamakheese. 3. Khuniye Omuliindi amwi kulilangayo, ne kamakheese kaulilanga kumumilo kwewe: mala nga na alanga kamakheese kewe khu masina kayo, ne akarangirira akarusie enje. 4. Nenga na akarusia enje kamakheese kewe, akarangirira, mala kamakheese kamuloondakho, sikila kamanyile kumumilo kwewe. 5. Ne kakhali omukeni Se kanyala ka muloondakho tawe, nekhali kamwilukha, khubela se kamanyile kumumilo kwo mukeni tawe. 6. Lusimo luno Yesu ababolela: ne se bamanyilisia kamakhuwa ako niko ababolela tawe. 7. Nio yesu aboola lundi ali, ng'ali, ng'ali, Ndikho mubolela enywe, Ese nise silibwa sie kamakheese. 8. Babaandi boosi ba beecha khale ebweeni wase bali babwefwi lundi banuuli, ne kkhali kamakheese se kabarekeeresia nibo tawe. 9. Ese niise silibwa; Yesi yesi obirira mwise alaonisibwa, lundu alengila mukari ne khurura enje, mala alanyoola kamaayilwe. 10. Omwifwi se kechanga busa ta, ne kakhali khubela khu khwiba, ne khu khwira, ne khu khwonaka; Ese necha nio mbo mube ne bulamu, lundi

mbo mwolane khuba nabwo mubukali. 11. Ese nise omwaayi omulayi. Omwaayi omulayi erusia khufwa khulwe kamakheese. 12. Ne kakhali we kumururu busa, okhali omwaayi omwene makheese tawe, nabona sisuuche nesiicha elekha kamakhese, ne kelukha; nio sisuuche sikatile ne khu kasalanisia. 13. we kumururu elukha, sikila ali busa omuandike, ne se enana khu makheese tawe. 14. Ese niise omwayi omulayi; Manyile kamakhese kase, lundi manyikhane khukase. 15. Nga Papa na amanyile ese, akhaba sesi manyile papa: ne ese ndusia bulamu bwange khulwe kamakhese. 16. Ne Kamakheese kakaandi ndi nako, kakhali ke mwitaala muno tawe. Niko kosi kenyikha ngarere, ne kalaulila kumumilo kwase; mala kalaba lituuli lilala, no mwaayi mulala. 17. Khukario Papa asiima ese, sikila khondusia bulamu bwase, nio mbunyoole lundi. 18. Sa aliyo omundu obukula bulamu bwase khu khwama khwise tawe. Ne kakhali Mbuana khu samwene. Ndi ne bunyali bwe khu buaana, nendi ne bunyali bwe khu bubukula lundi. Lilaka lino nilio nanyla khu Papa. 19. Liabao Liliabukhana lundi akarikari we bayaudi khubela kamakhuwa kano. 20. Ne Bakali babwe baloma bali, yuno ali ne sisieeno, ne alaluukhe; Siina sikila ne mu murekeeresia? 21. Babaandi baloma bali, kano sekali kamakhuwa komundu oli ne sisieeno tawe. Sisieeno sinyala siekula chimoni cho mubofu? 22. Ne yabao mu Yerusalemu enaikara ye khurwa alubeka khu lwe Lukaangu khu Wele, ne yaba mu biise bie kumunaane. 23. Ne Yesu akeenda engiila mulukaangu mu maatoche ka Solomoni. 24. Mala becha bayaudi ne ba mwibusiao ne

bamubolela bali, Ewe ola khu khola khwayaye khu khwola lina? Kabali ewe oli Kirisito, khuboolele abuwanga. 25. Yesu abakobosia ali, Namubooleela enywe, ne se mwasubiile tawe. Kimilimo nikio ese khola khwi sina lia Papa wase, nibio birusia buloli bwase. 26. Ne kakhali enywe se musuubila tawe; sikila se muli balala khu makheese kase tawe, nga ne nabobolela enywe. 27. Kamakheese kase kaulila kumumilo kwase; ne ese ngamanyile, mala nako kanoondakho. 28. Nase Ngaelesia bulamu bwa mindali; mala se balitiba tawe. Ne Se aliio omundu onyala anuula mu makhono kase tawe. 29. Papa wase, owambelesia ese, ali omukali khukhila boosi; ne se aliio onyala akanuula khu khwama mu makhono ka Papa wange ta. 30. Ese ne Papa wase khuli mulala. 31. Nio Bayaudi lundi babukula kamabaale bali bamupe. 32. Yesu abakobosia ali, bikholwa bilayi bikali Nabokesie khukhuma khu Papa wange; khubela khu Sikholwa siina khwibio sikila ne mwenya khu khu khupa kamabaale? 33. Bayaudi ba mukoboosia niye ne baloma bali, khu bikholwa bilai se khukhupa kamabale tawe; ne kakhali khu khwelekhazia khu Wele; ne sikila mbo Ewe, oli omundu busa, ne olikho wekhola khuba Wele. 34. Yesu aabakobosia ali, se Kaandikwa mu Lilaka lienywe tawe, nomile ndi muli biwele? 35. Nibambo abalanga nibo biwele, khuniye likhuwa lia Wele liecha, ne liaandiko selifunibwa tawe; 36. Loma enywe khuniye, niye Papa aawukhasie, mala aaruma mu siibala, enywe Muloma muli niyikasiasia; sikila nomile ndi, ese omwana owa Wele? 37. Naaba ne khakhola kimilimo kia Papa wange, mu khasuubila ese tawe. 38. Ne kakhali

naaba ne khola, mwakhaba ne mu khasuubila ese tawe, suubila bikholwa, nio enywe mumanye, mala musuubile, mbo Papa ali mwise, ne ese ndi muniye. 39. Khwako baenja lundi khu mubukula: ne kakhali efubarura mu makhono kiabwe. 40. Mala aacha lundi engelekha we luluuchi lwa Yoritani abuundu nio Yoana abatiisia ekhuranga; mala eyo amenyayo. 41. Ne bakali bamwichakho baloma bali, “Yoana se akholakho kamayia tawe;” ne buli bindu biosi nibio Yoana aaloma khu mundu yuno biaba bung’ali. 42. Ne bakali ba suubila khuniye ebweneyo.

11 Omundu abao omulwale, owa langwa Lasaro, owa Betania, lukoba lwa Maria no mukooko wabwe Marita. 2. (Maria yuno niye owamuakha kamafura, khu bikele bio mwami mala akeeyela lichuune liewe; niye wandaaye Lasaro aba omulwale.) 3. na aba wandaye omukooko amurumania, naloma ali, Omwami, lola, omusaale woo omukoosi ali omulwale. 4. Nga Yesu aulila ako, aloma ali, Bulwaale buno se buli bwe lifwa tawe; buliio khulwe khureera luyali khu Wele, niyo mbo omwana owa Wele anyoolelemo luyali. 5. Yesu aba asiima Marita no mukooko wewe ne Lasaro. 6. Ne kakhaba kario nga anyoola likhuwa bali Lasaro ali omulwale, akona chindalo chibili niio aaba eyo. 7. Enyuma wako nio aboolela babeeka bewe ali, Khe khukobolee ebuyuda lundi. 8. Babeeka bewe chana bamubolela bali, Omwami nyinga eyo busa, bayaudi be bweneyo benyile khu khupa ewe kamabaale; mala wenya khukobolayo lundi? 9. Yesu abakobosia ali, Enyanga se ebechangao chisa ekhumi na chibili buli endalo tawe? Khwako yesi yesi okeendela mu

buwaanga bwe nyanga se etuya tawe, sikila abona buwaanga bwe sibala sino. 10. Ne kakhali omundu nakeenda mu silo, etuya, sikila se ali ne buwaanga mukari mwewe tawe. 11. Aloma kano, ne amalile khubabolela ali, Omusaale wefwe Lasaro aakonile; ne kakhali khenja, mwinyoshie khukhwama mwilo. 12. Babeeka bamubolela bali, Omwami, kaba bali alikho akona, kane aone. 13. Niyo Yesu aaba alomaloma khwifwa liewe: ne nibo bebasia bali alomile ke khukona lilo. 14. Nio Yesu ababolela abuwaanga ali, Lasaro afwiile. 15. Ne ese nasangaalile sikila enywe, sikila se nabeleyo naye tawe, nio musuubile: kakhaba kario, Khe khuche niio ali. 16. Ne Tomasi aloma, (olaangwa Mukhwana) aboolela babeeka basiie ali, Fweesi khe khuche, nio khufwe naye. 17. Nga Yesu ne ola, anyoola Lasaro amalile mu silindwa chindaalo chine khale. 18. Nono Betania yaba siimbi ne Yerusalemu, yaba embi chi kilomita likhumi lila chirano khukhwama Yerusalemu. 19. Ne Bayaudi bakali baba bechile khubona Marita ne Maria, khu baolelesia sikila lifwa lia wandayaabwe. 20. Nga Marita, aulila ali Yesu alikho echa, arura enje khucha khu mwakaanila, ne Maria naye arama munju. 21. Marita aboolela Yesu ali, Omwami ewe obao andi wandaayase safwiile tawe. 22. Ne manyile ndi luno siosi siosi nisio olasaba Wele alakhuesia. 23. Yesu amubolela ali, Wandaayo alalamukha lundu. 24. Marita amubolela ali, Manyile ndi alilamukha khu ndaalo emalilisi. 25. Yesu amubolela ali, Ese niselilamukha ne bulamu. Yesi yesi osuubila mwise akhaba nafwa alamenya,. 26. Ne yesi yesi omenya mala asuubila mwise

salifwa tawe. Ewe osuubila lino ku? 27. Marita amubolela ali, “Yee Omwami, suubila ndi ewe oli Kirisito, omwana owa Wele, oyo owicha mu sibala.”

28. Nga amala khuloma ako, acha engila yewe; alaanga wandaaye Maria mu bwikisi, namubolela ali, Omwekisi echile, mala alikho akhulaanga. 29. Nga na aulila kano, enyokha khangu na kecha niyo ali. 30. (Abeele Yesu akhoola mu sirekere tawe, aaba asiili abuundu nio Marita aba na mwakaanane) 31. Bayaudi baba munju ne Maria ne bamuolelesia. Nga babona ne enyokha khangu narura enje ba muloondakho, Baloma bali alikho acha khulilila khu siliindwa. 32. Nono Maria ola nio Yesu aaba, ne nga amubona, akwa mubikele biewe, aloma ali, Omwami, obao andi wandaayase safwiile tawe. 33. Nenga Yesu abona ne alikho alila, mala bayaudi boshi nokhobalila ba becha naye, Nio kumwoyo kwewe kwechula bu beeleli, mala anaanisibwa lukali muroho. 34. Na aloma ali, Mu musiikhile waena? Bamubolela bali, Omwami, khowiche obone. 35. Yesu aliila. 36. Bayaudi baloma bali, Bona nga beele ne amusiima! 37. Ne balala khu nibo baloma bali, Se ali omundu yuno ta, owekula chimoni cho mubofu? Andi kakhakholile omundu yuno yesi kalekha khufwa? 38. Yesu ananisibwa lundi lukali akarikari mwewe mala acha e siliindwa, Liaba libina mala libale liaba khungaki. 39. Yesu aloma ali, Rusiayo libaale. Marita omukooko owo mundu ofwiile chana amubolela ali, Omwami, alikhaunya saayi; abele mu siliindwa chindalo chine. 40. Yesu amubolela ali, Se khuboolole ndi waaba nosuubila kane obone luyali lwa Wele? 41. Ne barusiayo libaale liliaba niyo basikhile omufu. Mala

Yesu alola mu ngaaki aloma ali, Papa, khuupila ewe orio sikila ewe wambulile. 42. Manyile ndi buli lwoosi umbulilanga, ne ndoma kano khulwe babaandu baali ano, nio basuubile bali ewe niwe wanduma. 43. Enyuma we khuloma kano, alaanga ne kumumilo kwe angaaki ali, Lasaro rura enje! 44. Ne oyo waba nafwile karura enje, kamakhono kewe ne bikele biaba biaboelwe mu suuka, ne mu moni mwewe baba ba muboyilemo sitambala. Yesu ababolela ali, Khemu mukangulule mala mu mulekhe ache. 45. Bayaudi bakali ba baba nebechile wa Maria ne khubona niko Yesu akhola, ba musuubila. 46. Ne kahali balala khu nibo, bakobola khu Bafarisayo, malla ba baboololela niko Yesu aba nakholile. 47. Nio Bafarisayo, ne basaayi bakhulu bekhala nende be kumuse mala ba boola bali, Khukhola khurie? Khubela omundu yuno akhola kamaya kamakali. 48. Kabali khumulekha yeng’ene, bandu boshi bacha khu musubila; ne barumi bacha khwicha mala babukule abuundu wefwe ne sibala. 49. Mulala khu nibo, olaangwa Kayafa, owaba Omusaayi Omukhulu ku mwiiko mwenokwo aloma ali, Enywe se mumanyilekho sisiindu siosi siosi tawe, 50. Se mubona muli buli bulayi khwinywe, khulekha omundu mulala afwe khulwe ba baandu, khu khila lirambo liosisi libune? 51. Ng’ali se aboola kano omwene yeng’ene tawe, ne kakhali nga ne aba omusaayi Omukhulu Lukali owe Lukaangu kumwiiko mwe nokwo, aba alikho ang’ola ali Yesu alikho acha khufwila khulwe lirambo elio. 52. Ne selikhubela lirambo elio liong’ene tawe, Ne kakhali abusie alala babana ba Wele baba salanila engelekha. 53. Khukhwama khu ndaalo eyo, barakikha khuboolana nga ne banyala bamwiira.

54. Khwako Yesu se akeenda abuwaanga mu Buyaudi tawe, ne kakhali arekukha acha abuundu aandi simbi ne asia ngalaamwe, alukoba nilwo balanga bali Efuraimu; Nio amenya ebweeneyo ne babeeka bewe. 55. Siise sia Naikara eye pasaka ye bayaudi yabaya embi; ne babaandu bakali baama chimbeka chi chiindi bacha mu Yerusalemu khu khola kimilukha kie khu khwekwalaasia, 56. Baenjanga Yesu, mala balomaloma khubene khubene nga ne bemile mu Lukaangu, Mupara murie enywe, mbo salecha mu naikara yino tawe? 57. Basaayi bakhulu ne Bafarisayo baba baanile kamalaka, bali, Omundu yesi yesi omanyile niio ali, khukhwola okeshayo, nio bolaane khu mubukula.

12 Chindaalo sita Epasaka ne khoola tawe Yesu kola Betani niyo kabaa Lasaro waba nakafwa, niye aba ne alamusie khukhwama mu lifwa. 2. Abwenao bamung'oonelao siakhulia sie khu khwikolooyia; mala Marita niye owara khu sialwa sia khulia esio: ne kakhali Lasaro aba mulala khwaabo ba bekhala asialwa ne naye. 3. Nio Maria abukula epaundi ye kamafura ka kang'oonwa khu khwama khu narito endayi, ke bukusi bwa ngaaki, mala aakha Yesu bikele, mala eeya bikele biewe ne lichune liewe: mala enju yechulamo Kumuuya kumulayi kwe kamafura. 4. Mulala khu beeka ba bewe, Yuda Isikarioti, okhwa Simoni owaba ne alikho acha khu muchaama, 5. Siina sikila kamafura kano ne kakhakusibwe chirupia chimia chitaru che fwesa, mala bachiesie bataambi? 6. Se aloma kano sikila aba aasiima khuyeeta bataambi tawe, ne kakhali aaba omwifwi. Ne asuutanga eochwa ye chirupia mala

buli lwoosi nie waba nende bi biabechangamo. 7. Ne Yesu aloma ali, "Mulekhe abe, khulwe endaalo eye lisiikhwa liase abikhile lino. 8. Enywe muli ne bataambi buli lwoosi, ne semukhabe ne nase buli lwoosi tawe. 9. Babaandu bakali bayaudi Nono, bamanya bali niye abao, nio bechayo, se khuli khubela Yesu yeng'ene tawe, ne kakhali bacha khubona Lasaro yesi, niye Niye aba ne alamusie khu khwama mu lifwa. 10. Nio basaayi bakhulu baboolana khukhwira Lasaro yesi. 11. Sikila, mbo khulwe sifuno siewe bayaudi bakali barekukha, mala basuubila mu Yesu. 12. Endalo eloondakho babaandu bakali ba baba ne bechile mu Naikara, nga baulila bali Yesu alikho echa mu Yerusalemu. 13. Nio babukula chisakia che kamakheendu, mala barura khucha khu mwakaanila, ne baapa luyoka lwe khoyo ne baloma bali, "Hosana! Ali ne chikhabi Omwami wa Isiraeli oyo owichila mwisina lio Mwami! 14. Ne Yesu nga anyoola epunda akiikhalakho; nga liiandikwa, 15. Okharia tawe, Lukoba lwa Sayuni: Bona omwami wowo alikho echa ekhaale khu punda eng'ana. 16. Mu siise esio ba beeka bewe se bamanyilisia kano tawe; ne nga Yesu ne bamuwa luyali, ba khebulila bali kano kaandikwa khu niye mala kakholebwa busa kario. 17. Babaandu ba baaba ne Yesu nga alaanga Lasaro khurura mu siliindwa, ne khu mulamusia khu khwama mu lifwa, baba baloli. 18. Sikila Kano niko ka kakila babaandu ne bacha khu mwakaanila, sikila baba baulile bali akholile kamayia kano. 19. Nono bafarisayo baboolana babene khubene bali, "Bona se khulikho khukholakho sisiindu tawe? Lola, babaandu sibala sioosi sia

muloondilekho!” 20. Khwabao ne Bakiriki balala baba mwabo ba baba ne bachile khusaya mundaalo cha naikara. 21. Bacha khu Filippo (aba owe Betesaita mu kalilaya) mala bekomba nie, baboola bali,” Omwami, khwenya khubona Yesu. 22. Filippo acha aboolela Andereya, boombi bacha mala ba boolela Yesu. 23. Yesu abakobosia ali, Esaa yolile niyo omwana wo mundu anyoolela luyali. 24. Ng’ali, ng’ali Ndikho muboolela ndi; lumiicho lwe ngano ne lukhakwile mu liloba mala lwafwa, lurama busa lwong’ene, ne lwaba ne lwafwa, lwaama engaaunu engali. 25. Yesi yesi osiima bulamu bwewe alabutibia, ne yesi yesi obiila bulamu bwewe mu sibala sino alaba nabwo khulwe bulamu bwa mindali. 26. Yesi yesi owenya khu khuukholela ese kimilimo khukhwola anonde, ne nio ndi, nio omukholi wase akhabe. Yesi yesi ou kholelanga kimilimo, Papa wase amuelesia liria. 27. Aluno ari Kumwoyo kwase kulikho ku naanisibwa, mala sina nisio ese nyala naloma? Papa, mbonie khu saa yino: ne kakhali mungila yino necha ese khulwe esaa yino. 28. Papa, elesia luyali khu lisina liowo. Mala kumumilo kwa uliilikhana khu khwama mwikulu, ne kuboola kuli, Na lielesie luyali lundi ndakhola ndio. 29. Lubusio lwa Babaandu nono baba ne bemile simbi, mala baulila kumumilo okwo. baloma bali likukuma lie fula; babaandi nabo bali, “Engelosi kheloma naye! 30. Ne Yesu ababoolela ali, “Kumumilo kuno se kwecha sikila ese tawe, ne kakhali sikila enywe. 31. Nono khu khalakilwa khwe khusibala khuno khulio; nono omwami we sibala alamwatwa enje. 32. Ne nga ese nesutibwa angaaki, ndabakhwesa bandu boosi khwise. 33. Akano kaloma

aba ekesia lukano lwe lifwa nilio acha khufwa. 34. Babaandu abo bamukobosia bali, “khwaulila khwama mwiilaka mbo Kirisito alimenya mindali na mindali: Nono ewe onyala khubola oriena oli khukhwola Omwana wo mundu asutwe angaaki? Omwana wo Mundu yuno niye naanu? 35. Yesu abakobosia ali, “Buwaanga busiilikho nanywe khulwe siise sitiiti. Chiilila mu lukeendo lwenywe ne musiiili ne buwaanga nio sisiilima sikha mufuunikha tawe, sikila oyo okenda mu siilima se amanya nio alikho acha tawe. 36. Nono ne musiiili buwaanga, suubila mu buwaanga, nabwo, nio mube babaandu be buwanga. Kamakhuwa kano Yesu kaloma, ne arekukha acha ekisa khu nibo. 37. Akhaba ne aba nakholile kamayia kamakali mu moni chabwe, se bamussubila tawe. 38. nio nilio Omung’oosi Isaya aboola liole khuba ng’ali, niko kaloma, Omwami, naaunu owasuubila burume nibwo efwe khwaboola? Ne khunanu nio kumukhono kwa Omwami kwe kesebwa? 39. Nisio sikila sebanyala khusuubila tawe; sikila akhaba Isaya kaloma lundi, 40. Wele aba abofuusie chimoni chiabwe, kalumia kimioyo kiabwe; Nio bakhabona ne chimoni chabwe Tawe, Lundi bakhalewa na kumoyo kwabwe tawe, Mala mbakalukhasie ne mbaonie. 41. Kamakhuwa kano aloma Isaya, nga ne kabona luyali lwewe, mala kaloma khuniye. 42. Kakhaba kario balalakho mu bakhongo be bunyali nende bakali basuubila khu Niye; ne kakhali sikila khwe Bafarisayo sebamwiyama tawe, nio ba khabatimania mu sinakooki tawe. 43. Basiima khu efuma ya babaandu khukhila efuma ya Wele. 44. Yesu aloma

mu mumilo kwe angaaki ali, 'oyo osuubila mwise, sa suubila mwise ta, ne kakhali aba asuubila khuyo wanduma. 45. Ne oyo oumbona ese abona akhaba oyo owanduma ese. 46. Nechile mu sibala nga buwaanga, nio buli mundu osuubila mwise akharama musiliima tawe. 47. Aaba bali omundu yesi yesi aulila burume bwase mala sasubila tawe, se ndimukhalakila tawe, se necha khukhalakila Sibala tawe, ne kakhali necha khusiionia. 48. Oyo undoba ese, ne khulekha khufukiilila burume bwase, bali no mulala olimukhalakila niye; likhuwa nilio nomile nilio likhamukhakile mu ndalo emalilisi. 49. Sikila se nalomalome khwise ta, ne kakhali Papa oyo waanduma, kamba ese lilaka, nisio nenyikha mbole, nende nisio nenyikha ndome. 50. Mala manyile ndi Lilaka liewe lili bulamu bwa mindali: Niko ndoma nono, kali niko Papa ambooleele, kali niko noma."

13 Nono Naikara eye Pasaka ne khoola tawe, Yesu amanya ali esaa yewe yaba yolile, eye khurura mu sibala sino, mala ache wa Papa, Buli lwosi aba asiima babewe ba baba mu sibala, mala abasiima khukhwola esia kamo. 2. Ne nga siakhulia sie lilikoloya siamalilikha, Sietani aba areere khale mumoyo kwa Yuda, okhwa Simoni Isikarioti, khuchaama Yesu. 3. Yesu amanya ali Papa amuelesia bindu bioosi mumakhono kewe, ne lundi amanya ali echa khukhwama khu Wele ne mala alikho acha wa Wele, 4. Nio enyokha khusialwa; afuula ekaanjo yewe mala abukula etawulo keboa. 5. Namalile ario Achukha kameechi khulugaraya mala arakikha khusiinga babeeka bewe bikele, ne khubeyela etawulo niyo aba

na eboyile. 6. Nga kola khu Simoni Petero: mala Petero amureeba ali" Omwami! wenya khusiinga ese bikele? 7. Yesu amukobosia ali, Ewe luno so manyilisia nisio ese ndikho khola tawe; ne kakhali okhamanyilisie enyuma wakano, 8. Petero amubolela ali, Se silikhoo siise siosi siosi ewe olisiinga ese bikele tawe. Yesu amukobosia ali, "Ne khakhusiinga bikele tawe, solaba elubeka wase lundi tawe." 9. Simoni Petero amukobosia ali, "Omwami nono okhasiinga bikele biong'ene tawe? Ne kakhali siinge akhaba kamakhono ne kumurwe kwosi!" 10. Yesu aloma ali, "Oyo osaabile sa enyikha khusaaba bikele tawe, ne kakhali ali omumiliyu buli abundu: ne enywe muli bamiliyu, ne ka khali sebali boshi tawe. omumiliyu elala ne se esiinga lundi tawe, ne kakhali esiinga bikele; 11. Khubela kamanya oyo ocha khu muchaama; nono niye kaloma ali, "Se muli mweesi muli bamiliyu tawe." 12. Nono nga amala khubasiinga bikele biabwe, ne abukula ekaanjo yewe, mala akobola niio aba ne ekhaale asialwa. Nio aloma ali, "Mwamanyile nisio nama khukhola khwinywe?" 13. Enywe Mundanganga ese muli omwekisia, lundi muli omwami: ne enywe muloma bulayi nga nendi. 14. Nibambo ese, omwami wenywe lundi omwekisia, nama khumusiinga bikele. enywe mwesi mukhoyela musingane bikele mwabene khubene. 15. Nabaeesie nisio mukhoyeele mulolelekhio; nio mukhole busa nga nisio ese kholile khwinywe. 16. Nga'ali, ng'ali ndikho mubolela ndi, nasioobi se ali omukali khukhila omwami wewe tawe; ne omurumwa se ali omukali khukhila owamuruma tawe. 17. nibambo enywe mumanyile kama khuwa kano, muli basangafu enywe

nibambo mukakhola. 18. Se ndikho ndoma loma khwinywe mweesi ta: namanya abo nibo narobora; niyo kamaandiko kanyole khuichusibwa, oyo okholia ne nase kumukati niye olichu kha chaama. 19. Nono muboolela enywe kano ne kakhecha tawe, nio, ne kekholekha musuubile muli 'Ese Niise. 20. Ng'ali, ng'ali, ese muboolela enywe ndi, oyo owakaanila omundu yesi yesi niye ese nduma, aba anjakaanila ese; ne yesi yesi onjakanila ese; akaanila oyo owanduma ese.

21. Naye namalile khuloma kano, Yesu anaanisibwa mu mwoyo, mala aboola abuwanga ali, na loma "Ng'ali, ng'ali, Ndikho muboolela mulala khwinywe acha kha njaama." 22. Babeeka balolana mlala kha kundi, ne bakhilwa nanu niye khalomakho. 23. Nono abao Mulala kha beeka bewe etikie kha Yesu, niye Yesu asiima. 24. Simoni Petero nono amusakula, "Mureebe naanu niye alikho alomalomakho?" 25. Niye nono waba nakonile khusifuba sia Yesu, kamuboolela, "Omwami, naanu niye?" 26. Yesu amukobosia ali, "Niye oyo, niye ndaeslesia sitonyi, nesirongire. Ne nga karonga sitonyi, kasieslesia Yuda Isikarioti, okhwa Simoni. 27. Abwene ne abwene nga Yuda ne alia sitonyi esio, sietani amwingilamo. Yesu amuboolela ali, Yuuya khangu nisio wenyu khukhola. 28. Se aliio owaba asialwa owamanyilisia sisiakila Yesu namuboolela ario tawe. 29. Ne sikila Yuda aba omubiikhi we eochwa, babeeka balala bebaasia bali Yesu amuboolele khucha akule nibio benya khulwa mu naikara, namwe aekho bataambi sisiindu. 30. Yuda ne amalile khunyola sitonyi mala arura enje khangu: ne siaba silo. 31. nono ne amalile khucha enje, Yesu aaloma ali,

"Luno omwana wo mundu aeesiibwe luyali, ne luno luyali lwa Wele lwa buuliikhe khubrira mu niye. 32. Nibambo Wele aebwa luyali muniye, Wele acha yesi kha muwa luyali niye muniye omwene, ne khangu khangu alamua luyali. 33. Baana bakekhe, kha sise sikekhe ndi ne nanywe. mulambenja: ne nga nabooolela Bayaudi" nio ndi khenja, Se munyala mwecha ta; nono muboolela enywe. 34. Ne luno lilaka liya ndikho muelesia enywe; mbo musiiimane mwabeene ne mwa beene; Nga ese nenamusiiima enywe, nio enywe khukhwola musiiimane mwabeene ne mwabeene. 35. Kha kano bandu boosi balamanya bali enywe muli babeeka base, Mwaba ne busiime kha mwabeene ne mwabeene."

36. Simoni Petero amuboolela ali, "Omwami, olikho ocha waena?" Yesu aamukobosia ali. "niyo ndikhonja sonyala khunjongakho tawe; ne kakhali ekhumalilikha okhanondekho. 37. Petero amureeba ali, Omwami, siina sikila ne khakhu loondakho siise sino? Ese nerekeekhe khukhufwila ewe." 38. Yesu amukobosia ali, "Ng'ali ewe werekeekhe kha khufwila ese? Ng'ali, ng'ali ndikho khuboolela ndi etwaaya se kha kholiokhe ta, nokhanjikana khataru ta.

14 Mu khayaya mumimioyo kienywe tawe, musuubila mu Wele, musuubile mwise sesi. 2. Munju mwa Baba wange muli ne bukono bukali: kalekha khuba kario tawe, Ese na khamuboolele enywe. Ese ndikhonja khumung'onela enywe abundu. 3. Ne Kaba bali Ese ndikho nja mala mu ng'onele abundu enywe, Ese kheche lundi, mala mwakanile enywe

khusamwene; mbo niio Ese ndii, abwenaao mwesi mubeo. 4. Lundi niondikhonja enywe mumanyileo, ne engila enywe mukimanyile. 5. Thomasi kalomaloma khuniye, Omwami, efwe sekhumanyile waene niolikhocha tawe; ne efwe khumanya khuriena engila? 6. Yesu kamubolela, Ese ndi engila, bung'ali, lundi bulamu: mbao omundu owicha khupapa, ne kakhali khubirira khwise. 7. Kaba bali ewe wamanya Ese, wenyekha obe newamanya papa yesi: ne khukhwama khale enywe mumumanyile niye, lundi mwamubona niye. 8. Filipino kalooma ali , Omwami khwekesie efefwe Papa ne lilienelio liolana khwifwe. 9 Yesu kamubolela ali, Ese nabele bise bileyi lukali nenawe, ne ewe okhamanya Ese tawe, Filipino? oyo owambona Ese kabona Papa; ne oloma oriona non Oli, khwekesie efefwe Papa? 10. Ewe sosubila oli esese ndi mu Papa, ne Papa ali mwise tawe? Kama khuwa niko ndi khonomaloma khwinywe sendikho noma khusamwene tawe: nakahali Papa omenyile mwise, okholanga kimilimo. 11. Suubile esese mbo ese ndi mu Papa, ne Papa mwise; namwe sibacho Subile esese khulwe kimilimo kimiene. 12. Ng'ali, ng'ali, ese noma khwinywe, oyoyo owasuubila khwise, kimilimo nikio esese khola yesi akhakhole; lundi kimilimo kimiboofu khubirakho kino niye akhakhole; khubela ndikho enja wa Papa wange. 13. Lundi siosi siosi nisio mu khasabe mwisina liange, sisienesio ese khakhole, mbo Papa anyole bukhumi mumwana. 14. Kababali ewewe okharebe sisindu siosi siosi mwisina liange, esese khasikhole. 15. Kababali ewewe wasiima esese, linda kamalaka kange. 16. Ne esese khasabe Papa, ne akha muwelesie

omuolelesii okundi, mbo abe nenanywe mindali; 17. Akhaba roho webung'ali, niye sisialo sikhanyala siamuakanila tawe, khubela simubona niye tawe, namwe sesi munyile tawe: ne kakhali enywe mumu manyile niye: khubela amenyile ne nanywe, ne akhabe mwinywe. 18. Esese senda mulekha e nywenywe busa nemukali ne omuolelesi tawe: esese kheche khwinywe. 19. Ne kakhali siise sititi, ne sisialo sesi mbona ese lundi tawe; ne kakhali enywe mu mbona: khubela ese emenyile, enywe mwesi mu khamenye. 20. Mundalo ng'enyoy mu khamanye muli ese ndi Mu Papa wange , lundi enywe mwise, lundi ese mwinywe. 21. Oyoyo olii ne kamalaka kange, ne akalinda nie oyoyo wasiima ese; ne oyo wasiima ese akhasimwe ne Papa wange, nese khamusime, ne kheyekesie samwene khuniye. 22. Yuda kamubolela, Sali Eskarioti ta, omwami, Lili liriene mbo okheyekesie wamwene khwifwe, ne seli khuli khusialo tawe? 23. Yesu kakobosia ne aloma ali, kaba bali omusani (omundu) kasima ese, akhalinde kamakhuwa kange: ne Papa wange akhamusime, ne khukheche khuniye ne mala khukhole bu menyo nenaye. 24. Oyoyo okhasima ese tawe se alinda kama khuwa kange tawe: ne likhuwa nilio muuliile selili liange tawe, ne kakhali lia Papa wange owanduma esese. 25. Bibindu bino ese nalomile nenanywe, nendiyo busa nenanywe. 26. Ne kakhali omuolelesii, olii roho omuraboora, niye Papa acha kharuma mwisina liange, akhamu ekesie bibindu bioosi, lundi arere bibindu bioosi muli khebubila lienywe, lioosi lioosi nilio naloma khwinywe. 27. Ku mulembe namulekhele enywe, kumu lembe

kwange ese mbana khwinywe: selinga sisialo siananga tawe, mbaana ese khwinywe. Lekha kimioyo kienywe kikha munania tawe, namwe kikhe endekhelela tawe. 28 Enywe mwaulile enga ese nenomile khwinywe, ese nja eyo, niche lundi khwinywe. Kaba bali mwasima esese, enywe mu khekhoeye, khubela ese nalomile, ese njaa wa PaPa: khubela Papa wange ali omukali khukhu khila ese. 29. Ne nono namubolele enywe mukhuranga nelisili khukhwi kholekha, mbo, nelikheche khwikholekha, enywe mwolame khusubila. 30 Enyuma wako ese senda loma kamakali ne nanywe tawe: khubela omukhulu wesisialo sino kecha, ne salikho nende siosi mwise ta. 31. Ne kakhali mbo sisialo siolane khumanya mbo ese nasima Papa; lundi enga Papa kambelesia ese lilaka, akhaba kario ese ekhola. Yinyokha, khekhekhe khuche.

15 Ese ndi ku musabibu kwa ng' ali, ne papa wange ali omulimi. 2. Buli lusakia mwise lukharakho litunda tawe niye arusiangakho: ne buli lusakia lu rakho lituutanda alusonjola, mbo lunyale khurera kama tuunda kamakali. 3. Enywe luno luri muli bakwalafu mukhubirira mwikhuwa nilio namubolele. 4. Menya mwise, lundi Ese mwinywe. Enga lusakia lukhanyala lwaama kamatunda khulwong'ene tawe, sibacho ne lukhekhale khu musabibu tawe; ne enywe semunyala ne mu khekhelele mwise tawe. 5 Ese endi ku musabibu, ne enywe muli chisakia; oyo omenya mwise, ne ese muniye, omwene alaama kamatuunda kamakali: khubela ne kakhali ese semunyala mwakhola sisindu siosi siosi tawe. 6. Kabali

omundu se kekhala mwise tawe, amwatibwa eyeyo enga lusakia, lundi aniaala; ne babandu ba chibusia, neba chimwata mumulilo, neba choosia. 7. Kabali enywe mu menya mwise, ne kamakhuwa kange kamenya mwinywe, enywe saba liosi liosi nilio mwenya, ne mukha kholelele. 8. Khu lino Papa wange anyola luyali, mbo enywe mwaane kamatuunda kamakali; nono enywe mulaba babeeka bange. 9. Enga Papa ne kasiima esese, nono ese na musiiima enywe: chililila enywe mu busiime bwange. 10. Kaba bali enywe mulinda kamalaka kange, enywe mu chakhumanya mubusiime bwange; bulayi bwene enga ese ne naliinda kamalaka ka Papa wange ne khumenya mu busiime bwewe. 11. Bibindu bino esese nalomile khwinywe, mbo ekhoyo yange ekhoya yasikala mwinywe, lundi mbo ekhoyo yenywe ekhoya yechula. 12. Elino Lili lilaka liange, Mbo siimana mwabene khu bene, enga ese ne namusiima enywe. 13. busiime bubofu salikho nabwo omundu bukhila buno tawe, mbo Omundu anyala kaana bulamu bwewe khubela basaale bewe. 14. Enywe muli basaale base, Kaba bali mukhola kosikosi niko muingilila enywe. 15. Khu khwama luno ese semulanga enywe endi bakhalabani tawe; khubela omukhalabani se amanyile niko omwami wewe akholanga tawe: ne kakhali namulangile endii basaale; khubela bibindu bioosi nibio ese naulila khu Papa wange na bikholile khumanyikha khwinywe. 16. Enywe se mwandobora ese tawe, ne kakhali ese na murobora enywe, lundi na muruma enywe, mbo muche mwaame kamatuunda, lundi mbo kamatunda kenywe kaalame: mbo liosi liosi nilio

mucha khureeba khu Papa mwisina liase, anyale khu muelesia enywe.17. Bibindu bino ese muingilila enywe, mbo enywe musiimane mulala khukundi.18. Kaba bali sisialo siamubiila enywe, enywe manya muli sianyoya siambiila ese ne sikhabiila enywe tawe.19. Kaba bali mwaba be sisialo, sisialo siakhasimile babenesio: ne kakhali semuli be sisialo tawe, ne kakhali nabarobora khurura musiialo, khwako sisialo sia mubiila enywe. 20. khebulila likhuwa nilio nalomaloma khwinywe, Omukhalabani sali omukhongo khukhila omwami wewe tawe. Kaba bali banyasia ese, bakhamunyasie enywe mwesi; Kaba bali balinda elomo yange, bakhalinde eyenywe yosi. 21. Na kakhali bibindu bino bioosi ba khakhole khwinywe khulwe lisina liange, sikila se bamanyile oyo owanduma ese tawe. 22. Abanga bali se necha mala nababolele tawe, nibo se bakhabele ne bubwoni tawe: ne kakhali nono sebali nende nisio betililakho sie bubwoni babwe tawe. 23. Oyo wambiila ese kabiila Papa wange yesi. 24. Abanga bali sena khola akari kari wabwe kimilmo nikio omundu okundi akhola tawe, nibo se bakhabele ne bubwoni tawe: ne kakhali aluno ari nibo boosi ba khubona lundi ba mbiila ese alala ne Papa wange. 25. Nakahali lino licha khubira, mbo likhuwa liche khu khwolanibwa elio liliandakwa mulilaka liabwe, nibo bambiila busa ne khalio sifuno tawe. 26. Ne kakhali omuolelesii nekecha, niye ese khamurume khwinywe khukhwama wa Papa, akhaba roho we bung'ali, owama khu Papa akharusie buloli khwise: 27. Ne enywe mwesi murusia buloli, sikila mwabele ne nase khukhwama ekhuranga.

16 Bibindu bino ese namubooleele enywe, mbo mu khabelela tawe. 2. Ba khamurusie enje we chisinakooki: yee, bise khabicha, mbo oyo yesi yesi omukhonya enywe akhebasie ali akholele Wele kimilimo. 3 Ne bibindu bino nibio ba khakhole khwinywe, khubela se bamanyile Papa namwe ese tawe. 4. Ne kakhali bibindu bino ese nababolele enywe, nio mbo bise ne bikhole, munyale khu khebulila mbo ese na muboleela enywe khunibo. Lundi bibindu bino ese Se naloloma khwinywe khukhwama ekhuranga tawe, khubela abele na bechanga ne nanywe. 5. Ne kakhali nono ese nja eyo khuniye wanduma ese; ne mbaio khwinywe owu ndeeba ese, waena niio olikhocha ewe? 6. Na kakhali mbo ese nalomile bibindu bino khwinywe, bu beeleli bwechule mumioyo kienywe. 7. Kakhaba kario ese ndi khembabolele bung'ali; Lili lie nganga khwinywe mbo ese enje: ne kaba bali ese senja tawe, omuolelesii se akheche khwinywe tawe: nenga ne ndekukha, ese kha murume niye khwinywe. 8. Ne nono niye ne kecha, akheekesie sisialo khulwe bubwoni, lundi khulwe bulungi, lundi khulwe sikhalakilo: 9. khulwe bubwoni, sikila se basuubila khwise tawe; 10. Khulwe bulungi, sikila ese njaa wa Papa, ne enywe se mumbona lundi tawe; 11. Khulwe sikhalakilo, sikila omwami we sisialo ka khalakilwa. 12. Ese siili ne bibindu bikali khuloma khwinywe, ne kakhali se munyala enywe khukasuta saayi tawe. 13. Likhabe liriena niye, Roho wa ng'ali, ne kecha, akhaba rangirire mu bug'ali bwoosi: khubela se akhalomenge khulwewe omwene tawe; ne kakhali liosi liosi nilio akhaulile, nilio

akha lomalome: mala akhamwekesie enywe bibindu bili khobicha. 14. Akhambesie ese luyali: khubela akhanyole kali kange, ne akhakokeshe khwinywe. 15. Bibindu bioosi nibio Papa ali ne nabio bili bibiange: khwako nalomile, ndi akhabukule khu khwama khu biange, ne akhabokesie enywe. 16. Akekhe busa ari, ne enywe se mu khambone tawe: ne lundi, Akekhe ari, ne mulambona ese, sikila ndi khonja wa Papa. 17. Nio balalakho khu beka bewe ba lomaloma akari kari wabwe babene, Lilala sina lino nilio aloma khwifwe, Akekhe ari, lundi se mulambona tawe: ne lundi, Akekhe ari, sikila ndikho enja wa Papa? 18. Baloma khwako bali, sina nisio alomile, Akekhe busa ari? Se khunyala khwabola nisio alomile tawe. 19. Nono Yuse kanyoa kamanya mbo kha bekombelesia khu mureeba niye, ne kaloma loma khunibo, enywe mulaimilisianga akari kari mwenywe mwabene khwako niko ese khu nikonomile, Akekhe busa ari, ne se mulambona ese tawe: ne lundi, Akekhe busa ari, ne mulambona ese? 20. Ng'ali, ng'ali, embabolela enywe, mbo mukhalile lundii mwiloche, ne kakhali sisialo sikkehoye: ne enywe mukhabe ne bubeleli ne kakhali bubeleli bwenywe bukha kalukhasibwe mu khuba ekhoyo. 21. Omukhasi ne ali mubuchuni ali ne bubeleli, sikila lisaa liewe lili simbi: namalile khu khwibula omwana, se akhebulila lundii chingunyi, khu busangafu mbo omusani kasalibwe mu sialo. 22. Ne enywe nono khwako khamube nende bubeleli: ne kakhali ese ndamubona lundi, ne kimioyo kienywe kikhekoye, lundi ekhoyo yenywe mbao omundu okhabukule khukhwama khwinywe. 23. Ne mundalo eyoo enywe

se mukhandebekho esese sisindu tawe. Ng'ali, ng'ali, ese nomaloma khwinywe, siosi siosi nisio mukharebe Papa mwisina liange, akha muelesie. 24. Khukhwola ano enywe se mwandebirekho siosi siosi mwisina liange tawe: reba, ne mulanyola, nio mbo ekhoyo yenywe yolane khwichula. 25. Bibindu bino ese naloma lomile khwinywe musimo: ne kakhali bise bi lecha, nibio se ndaloma musimo tawe, ne kakhali khamwekesie abuwanga khu Papa. 26. Mundalo eyo enywe mukharebe mwisina luliange: ne ese se noma khwinywe tawe, mbo khasabe Papa khubela enywe: 27. Khubela Papa omwene kamusiima enywe, Khubela enywe mwasima, ne mwasuubila mbo ese necha khu khwama khu Wele. 28. Necha khu khwama khu Papa, ne ese nechile musialo: lundi, ese ndikho ndekha sisialo, ne nja wa Papa. 29. Babeka bewe balomaloma khuniye, eeh, luno luri ewe olomaloma abuwanga, ne se oloma loma musimo tawe. 30. Alunari khuli nasubi mbo ewe omanyile bibindu bioosi, ne se wenyekha bali omundu yesiyesi akhurebe ewe ta: khukano khusuubila khuli ewe wecha khu khwama khu Wele. 31. Yesu kabakobosia nibo, Enywe nono mu suubila? 32. Lola, esaa khayicha, yee, yoolile nono, mbo enywe musalanisibwe, buli omundu khulwewe, ne mukhandekhe ese seng'ene: mala ese sendi seng' ene tawe, sikila Papa alii ne nase. 33. Bibindu bino nalomile khwinywe, mbo mwise munyale khuba ne kumulembe, musialo enywenywe mukhabe ne kamatinyu: ne kakhali khamube ne busangafu bulayi; ese nakhilile sisialo.

17 Kamakhuwa kano Yesu kaloma, ne kasuta chimoni chewe angaki mwikulu, ne aloma, Papa, esaa yolile; elesia omwana woo luyaali, mbo omwana woo yesi anyale khu khuwa luyaali: 2. Enga ewewe ne wamuelesia niye bunyali khungaki khwe kimibili kioosi, mbo anyale khu ana bulamu bwa mindali khubakali khwabo enga ewe no muelesie niye. 3. Ne buno buli bulamu bwamindali, mbo banyale bolane khu khumanya ewewe weng' ene Wele wang'ali, lundi Yesu Kirisito, niyo ewe waruma. 4. Na kuelele ewe luyaali khusialo: namalile kimilmo nikio ewe wambelesia ese khukikhola. 5. Lundi luno luri, eeh Papa, khe wumbe luyaali nende ewewe wamwene ne bukhumi nibwo naba nabwo ne nawe ekhuranga sisialo ne sikhabao tawe. 6. Ese ne kesie lisina lioo mubandu nibo ewe wambelesia ese enje we sisialo: nibo baaba baboo, ne ewe wambelesia esese nibo; ne balindile likhuwa lioo. 7. Luno luri bolanile khumanya bali bibindu bioosi siosi siosi nisio ewe wambelesia ese bili bibioo. 8. khubela ese nabaesiesie nibo kamakhuwa niko ewe wambechanga; mala ba kakanile, ne bamanyile ng'ali mbo ese necha khu khwama khwiwe, ne, basuubile mbo ewewe niwe wanduma ese. 9. Ese mbasalila nibo: ese se salila sisialo tawe, ne kakhali khwabo nibo wamba; khubela bali baboo. 10. Lundi bioosi bi biange bili bibioo, lundi bibioo bili bi biange; ne esese nyola luyali munibo. 11. Ne luno luri ese sendi musialo lundi tawe, ne kakhali bano bali musialo, ne nicha khwiwe. Papa omuraboora, bikha khubirira mwisina lioo wamwene

ababoo nibo woolana khukhumba esese, mbo banyale khuba mulala, enga efwe nekhuli. 12. Ese nesilii khuba ne nabo musialo, nababikha nibo mwisina lioo: ababo nibo ewewe wambelesia esese nababikha, ne mbakhoo khunibo owatiba tawe, ne kakhali omusani we butibii; mbo nio chinyilili cholane khu khwichusibwa. 13. Lundi luno luri ese nicha khwiwe; ne bibindu bino nomaloma musialo, mbo bolane khunyola busangafu bwange bwichusibwe mu nibo babene. 14. Ese nabaesiesie nibo likhuwa lio; ne sisialo siababiila nibo, sikila se bali be sisialo tawe, bulayi bwene enga ese ne kakhali we sisialo tawe. 15. Ese sesaba mbo kenyekha obarusie nibo musialo tawe, ne kakhali ewewe kenyekha obalinde khu khwama khumabi. 16. Nibo se bali be sisialo tawe, bulayi bwene enga ese ne kakhali we sisialo tawe. 17. Baukhasie mukhubirira mu bung'ali bwoo: likhuwa lio lie bung'ali. 18. Enga ewe ne wanduma ese musialo, bulayi bwene sesi na barumire nibo musiaslo. 19. Ne khubela nibo ese niyaukhasia samwene, mbo nibo bosi banyale khu khwaukhaswa mu khubirira mu bung'ali. 20. Ne sesabila bano bong' ene tawe, ne kakhali ababo boosi ba khasuubile khwise mu khubirira mu likhuwa liabwe; 21. Mbo nibo boosi bolane khuba ne bulala ; enga ewe, Papa, oli mwise, lundi ese mwiwe, mbo nibo boosi banyale khuba ne bulala mwifwe: mbo sisialo siolane khusuubila sili ewe wanduma ese. 22. Ne bukhumi nibwo ewe wambelesia ese nabaesiesie nibo; mbo banyale khuba ne bulala, bulayi bwene enga efwe ne khuli sindu silala. 23. Ese munibo, ne ewe mwise, nio mbo nibo bolane khuba balungi mu bulala; nio

mbo sisialo siolane khumanya sili mbo ewe wanduma ese, ne wa basiima nibo, enga ewe ne wasiima ese. 24. Papa, ese ne komba mbo nibo bosu, nibo ewe wambelesia ese, babe nenase nio ese ndi; mbo nibo bolane khubona luyali lwange, nilwo ewewe wambelesia ese: khubela ewe wasiima ese ebweni wesibala ne sikhembang'anwa tawe. 25. Ooh Papa omulungi, sisialo se siakhumanyile tawe: ne kakhali ese nakhumanya, ne bano bamanyile balii ewe wanduma ese. 26. Lundi ese na baamanyisie nibo lisina lioo, ne ndabamanyisia nilio: mbo busime nibwo ewe wasima ese bwolane khuba mu nibo, lundi ese mu nibio.

18 Enga Yesu nalomile kamakhuwa Kano, kacha ebweni nende balondi bewe khungaki khwe kha khechi Seduroni, nio khwaba nenda silundu, nimwo kengilamo, ne balondi bewe. 2. Ne Yuda yeesi, owamuchama niye, amanya abundu aao: khubela Yesu buli khase amenyanga abwenaao nende balondi bewe. 3. Yuda Nono, namaleli khu khwakanila lu busiano lwe babandu nende babemelesi khukhwama khumwilwachi omukhongo, ne bafarisayo, keecha aao nende chitala nende chinjaso nende bulwani. 4. Yesu abwenaao, ne amanyile bindhu bioosi mbo bi ingililwa khukhwicha khuniye, kacha ebweni, ne aloma khunibo ali, Nanu niye muyima enywe? 5. Nibo ba mukobosia niye, Yesu wa Nasareti. Yesu kababolela nibo, niye ese. Lundi Yuda yeesi, owamuchama niye, kemile ne nabo. 6. Abwene busa nga ne kaloma loma khunibo, niye ese, bela enyuma, lundi bakwa asii. 7. Ne kabareba lundi, naanu niye mu layimanga enywe, Lundi

baloma balii, Yesu wa Nasareti. 8. Yesu kaba kobosia, ese namubolele enywe ndii niye Ese: Kaba bali mumbimanga ese, lekha bano bache engila yabwe: 9. Mbo lusimo nilwo aloma, lwolane khukhwi chusibwa, nilwo kaloma, Khwabo nibo ewe wambelesia ese se natibia ata mulala tawe. 10. Ne nono simoni Petero abele ali nende embalu kakichoola, ne karema liru lio omukhalabani womukhulu we dini, ne kakhala liru liewe lisecha. Lisina lio mukhalabani oyoo bali Maliko. 11. Ne Yesu kaloma khu Petero ali, bikha embalu yoo musibabi: sikombe nisio Papa kambelesie ese, ese se khasinywe ta? 12. Nyo nono lubusiano nende basikari bankhongo nende ba bemelesi be bayaudi babukula Yesu, mala bamuboa, 13. Ne ba murangisia niye khungila echa wa Anasi; khubela Kaaba Papa omukhwe wa Kayafa, owaba omwimelesi we lukaangu kumwaka okwo kumwene. 14. Nono Kayafa niye owaba, owaana bukeleki khu baYaudi, mbo lilieneli lili abuwanga mbo omundu mulala kenyikha khufwila babandu. 15. Lundi Simoni Petero kalonda khu Yesu, ne okundi yesi omulondi kakholario: omulondi oyoo kamanyikha khu omukhulu we lukaangu, ne kengila mukari nende Yesu boola mulichipi liomukhulu we lukaangu. 16. Na kakhali Petero kema a muliango. Ne omulondi okundi oyoo karura enje, owamanyikha khumukhulu we lukaangu, ne kakachula khumukhaye olindile kumuliango, ne karera Petero mukari. 17. Mala omukhana owalindanga kumuliango kaloma khu Petero ali, Ewe wesi soli mulalakho we balondi bomundu yuno tawe? Kaloma ali, sendi ese tawe. 18. Ne barumikhi na ba bemelesi bemileo,

bang'onile kumulilo kwe kamanda; khubela yaba kumunyiri: ne baba khaboora babene: ne Petero kemile ne nabo, yesi koora. 19. Omukhulu we lukaangu Nono Kareba Yesu khulwe balondi bewe, nende khulwe kamekesia kewe. 20. Yesu kamukobosia, ese naloma lomenge abuwanga khusialo; Ese ne kesia mu sinakooki buli lwosi nende mu lukaangu, niyo bayaudi be khalanga; ne mubwikisi ekhaloma sindu tawe. 21. Khubela sina ne wundeba ese? Khorebe ababo ba bambulila ese, malala sina niko Ese na babolela nibo: Lola, bamanyile niko naloma. 22. Ne nga ne kamala khuloma ario, mulalakho khu bemelesi owaba ne kemile embi kapa Yesu luyii ne sikalabo sie kumukhono kwewe, aloma ali, okobosia orio omukhulu we lukaangu? 23. Yesu kamukobosia, Kaba bali nalomile likhikha, rusia buloli bwe bu khikha: ne kaba bali bulayi, sina sikila ne wukhupa ese? 24. Nono Anasi amuyila niye omuboe khu Kayafa Omusaayi omukhulu we lukaangu. 25. mala Simoni Petero kema mala kora kumulilo. Baloma khuniye bali, ewe soli mulalakho wesi khu balondi bewe tawe? ekaana elio, mala kaloma, se ndi ese tawe. 26. Omukhalabani mulalakho owo mukhulu we lukaangu, oli omulebe wo oyo niye Petero akhala liru liakwa, kaloma ali, ese se khubone ewe nenaya mu silundu tawe? 27. Petero lundi ekaana: abwene na bwene etwaya yakholiokha. 28. Nono barangisia Yesu khukhwama wa Kayafa khucha munju ya sikhakalilo: ne mala yaba makhelebende; ne nibo babene se baacha munju ye sikhakalilo tawe, bakhakhola bario banyalutisibwa tawe; ne kakhali mbo nio banyale khulia siakhulia sia pasaka. 29. Nio Pilato arura

enje khunibo, ne kaloma ali, masitako sina niko khamurera khu mundu yuno? 30. Nabo bakobosia ne bamubolela bali, abanga Sali we sisecha ta andi sekhwa khamureri khwiwe tawe. 31. Nono Pilato kababolela nibo, Enywe mubukule niye, mala mu mukhalakile khulondekhana ne lilaka lienywe. Ne bayaudi bamubolela, Selifukilibwa khwi laka khukhwira omundu yesi yesi tawe: 32. Mbo kamakhuwa niko Yesu aloma kolaane khu khwichusibwa, niko kaloma, nga ekesia lifwa siina nilio alakilwa khufwa. 33. Nono Pilato kengila munju ye sikhakalilo lundi, ne kalanga Yesu, mala kamubolela, Ewe Oli omwami we bayaudi? 34. Yesu amukobosia, naloma ali ewe olomaloma sisiindu sino khu wamwene, namwe babandi bakhubolelekho ewe khwise? 35. Pilato amukobosia, ese ndi omuyaudi? Lirambo lioo wamwene nende omukhulu we lukaangu banjakanisie ewe khwise: sina nisio ewe okholile? 36. Yesu amukobosia, bubwami bwange se buli bwe sibala sino ta: bubanga bwe khusibala sino andi bakhalabani base bapane mbo kha anwa khu bayaudi tawe, ne kakhali bubwami bwase se buli bwa aasi ano tawe. 37. Nio Pilato amubolela ali, nono ewe oli omwami? Yesu amukobosia ali, ewe oloma oli ese ndi omwami. Khukwola ano ese nebulwa, khubela sifuno sino necha ese musibala, mbo mbaane buloli bwe bung'ali. Omundu yesi yesi oli we bung'ali awulila kumumilo kwange. 38. Pilato kamubolela ali, bung'ali buli siina? Ne namalile khuloma elino, karura enje lundi khu baYaudi, mala kababolela nibo, ese se nanyolile kamabi mu mundu yuno tawe. 39. Ne kakhali muli ne kumwima, mbo ese kenyikha khu

mulekhulila omundu mulala mu pasaka: nono enywe mwenya mu lekhulile omwami wa bayaudi? 40. Nono bakukula boosi lundi, ne baloma bali, Sali omundu yuno tawe, ne kakhali Barinaba. Nono Barinaba Kaaba omunuuli.

19 Nono Pilato abukula Yesu mala amupa kimishariti. 2. Mala basikari baruka engara ya kamawa, mala ba mura khumurwe kwewe, ne bamurakho kumukoye kufwana buseemwa, 3. Lundi baloma, bamu yokelela, omwami we bayaudi! lundi bamupa ne kimikhono kiabwe. 4. Pilato aacha ebweni lundi, mala kabbolela ali, Lola, ese murera ebweni wenywe, mbo enywe mumanye muli ese se namunyolilemo kamakhikha tawe. 5. Nono Yesu keecha ebweni, kafwarire ekofia ye kamawa, ne kumukoye kufwana buseemwa. Ne Pilato kabbolela ali, Lola omundu yuno! 6. Nono nga basaayi bakhulu ne balindi be lukaangu bamubona, bapa luyoka ne baloma bali, mubambe! Mubambe!. Pilato ababoolela ali, mubukule mwabene, mala mu mubambe: khubela se namu nyolilekhomo kamakhikha tawe. 7. Bayaudi ba mukobosia bali, efwe khuli ne lilaka, ne khulilaka liefwe akhoya khufwa, khubela ekholile omwene khuuba omwana wa Wele. 8. Ne nono Pilato nga kaulila elomo eyo, kachilila khuba neburi; 9. Lundi kakobola Munju ye sikhakilo, mala kereba Yesu, ewe wama waena? Ne kakhali Yesu se amukobosia tawe. 10. Nono Pilato amuboolela ali, Se olomaloma ewe ne nase tawe? so manyile ewe ta oli ese ndi ne bunyali bwe khu khubamba lundi ndi ne bunyali bwe khulekhuula ewe? 11. Yesu akobosia, ewe se olikho ne bunyali

bwosi bwosi khwise tawe, ne kakhali busa no khaelebwe ewe khu khwama angaaki: khwako oyo wunjakanisie ese khwiwe ali ne bubwoni bukali. 12. Mala khukhwamila abwenaao Pilato ayima khu mulekhuula: ne kakhali bayaudi bakukula, ne baloma, kaba bali ewe olekhuula omundu yuno ahee, ewe so oli omusaale wa Kaisari tawe: yesi yesi owikhola omwene khuuba omwami aloma loma sibacho khu Kaisari.13. Pilato nono nga ne aulila kamakhuwa kano, amureera Yesu ebweni, ne ekhala aasi mu ndebe ye si khalakilo abundu alangwa mbo liliatoche, ne kakhali mu lueburania bali kabata. 14. Yaba khwu khwirekekhelela epasaka, lundi embi chisaa sita: ne aboolela bayaudi ali, lola omwami wenywe! 15. Ne kakhali bakukula, murusieo! Murusieo! Mubaambe! Pilato ababoolela ali, nyala mu baambe omwami wenywe? Basaayi bakhulu ba mukobosia, efwe se khulikho nende omwami ne akhali Kaisari.16. Nono aabakaanisia khu niibo niye nio mbo bamubaambe. Ne babukula Yesu, mala baacha naye. 17. Mala na asutile ku musalaba kwewe aacha ebweni oola abuundu alangwa bali, abuundu we siianga, nio alangwa mu lueburania bali Kolikota: 18. Abwenao niyo ba mubaambila, ne babaandi babili, buli lubeka mulala, ne Yesu naye aba akari wabwe. 19. Mala Pilato aandika kamaandiko ali, mala akara khu musalaba. Ne liandiko liaba mbo, YESU WA NASARETI OMWAMI WE BAYAUDI. 20 Liandiko lino Bayaudi bakali ba lisoma: Khubela abuundu niio ba mubaamba Yesu aaba aambi nende lukoba: ne liandikwa Mu lueburania, ne Luyunani, ne Lulatini. 21. Nio basaayi bakhulu be bayaudi baboolela Pilato

bali, okhaandika oli, omwami we bayaudi tawe; Ne kakhali mbo alomanga ali, ese ndi omwami we bayaudi. 22. Pilato abakobosia, Niko ese mbandike naandike. 23. Nono basikari, nga bamala khu baamba Yesu, babukula chingubo chewe, ba chikhalamo bitonyi bine, buli omusikaari sitonyi. Lundi nende ekaanjo yosi, eyanabwa ne kamakhono musitonyi silala siong'ene. 24. Nono balomaloma akarikari wabwe, lekha khukha kitabula tawe; ne kakhali khakhukipile esiimbi; khubone naanu olakibukula. Lino liakholekhwa nyo liandiko lichusibwe libola lili, bakabana chingubo chiase, mala bapa esiimbi khu kaanjo yange. Kamakhuwa kano niko basikari bakhola. 25. Nono abwenaao kema embi ne ku musalaba kwa Yesu maayi wewe, ne wandaaye omukhaana wa maayi wewe, Maria mukha kiliopa, ne Maria Makatalena. 26. Ne Yesu nga aboona maayi wewe, ne omulondi emile siimbi, niye asiima, kabolela maayi wewe, Mukhasi, lola omwana woo! 27. Nono abolela omulondi oyo ali, lola maayi woo, ne khukwama esaa eyo omulondi oyo amubukula amuila mungo mwewe. 28. Enyuma wako, Yesu ne amanyile Ali bibindu bioosi luno luri biolanile, mbo liandiko lichusibwe, aloma ali, ndi ne bulesia. 29. Nono abwenaao khwaba nenda sibuumba siechule endali endulu: nono benikha sisiaangu mundali endulu, ne bauna khu lusaala, ne mala bamura emunwa. 30. Nono Yesu namalile akanila endali, kaloma ali, kawele: ne kenamia kumurwe kwewe, ne akhala Kumoyo. 31. Bayaudi nono, sikila yaba mu khwirekekha, mbo kimibili kikhasikala khu musalaba endalo ye sapato tawe, (Sikila endalo ye sapato yaba ye liria

liangaki,) ba saaya Pilato mbo bikele biabwe bifunibwe, nio mbo bolaane khu bukulibwa. 32. Nio basikari beecha, mala bafuna bikele bio muundu we khuranga, nende biokundi niye bamu baamba naye. 33. Ne kakhali nono nga beecha khu Yesu, ne ba boona bali amalile khufwa khale, se bamufuna bikele biewe tawe: 34. Ne kakhali mulalakho we basikari owaba ne lifumo amuuna lubeka lwewe, ne kamafuki ne kameechi karura. 35. Ne oyo owabona ako ne kekholekha ali ne buloli, niyo enywe mwesi mwole khu suubila muli: niko abola kali kang'ali mala amanyile ali alomanga bung'ali, mbo munyale khu suubila. 36. Bibindu bino bie kholekha, mbo liandike liolaane khukhwi chusibwa, sikumba siewe se silifunibwa tawe. 37. Ne lundi liandiko lilindi lia loma lili, bakhalole khuyo niye bauna. 38. Ne Enyuma wakano Yosefu wa Aramathea, ne ali omulondi wa Yesu, ne kakhali mu khwikisa ne arire bayaudi, asaba Pilato mbo kolane khubukula kumubili kwa Yesu: mala Pilato kamuelesia bulekhole. Keecha nono, ne abukula kumubili kwa Yesu. 39. Ne abwenaao Nikodemu yesi eechao, niye ekhuranga weecha khu Yesu musilo, ne karera ekhalalasi endubanie ne kumu tiokotioko, yebusiro bubwola chi paundi embi emia ndala. 40. Nono ba bukula kumubili kwa Yesu, mala bakuboa musilaka siengubo ne bulayi nga Kuli kumwima kwe bayaudi mu khusikha. 41. Nono abundu niio ba mubaamba yaba musilundu; ne musilundu eng'ani embiakha, niyo abele omundu akharwa khomo tawe. 42. Abwenaao khwako basikha kumubili kwa Yesu khubela endalo ye khukhwi rekekha ye bayaudi; khubela eng'ani yaba siimbi bureke.

20 Endaalo ye khuranga ye lichuma Maria Makatalena aacha makhelebende, ne yaba ne siilikho mabwibwi, khukhwola khu siliindwa, mala aboona libaale liarusiibweyo aleyi khukhwama khu siliindwa. 2. Mala atima, lundi echa ola khu Simoni Petero, lundi nende omweka okundi, niye Yesu asiima, mala ababolela, babukule omwami khu khwama mu siilindwa, ne efwe se khumanya niio bamwalisie tawe. 3. Petero khwako karura acha, no mweka okundi, mala boola khu siliindwa. 4. Nono batima boosi alala: ne omweka okundi atima akhila Petero, mala aba we khuranga khu siliindwa. 5. Lundi niye ne enama aasi, na alolelela mukari, aboona chingubo chakonile; ne kakhali niye sa engiila mukari tawe. 6. Nio Simoni Petero echa na mulondilekho, mala engila mu siliindwa, ne abona chisuka cha kitani chakonile ao chong'ene, 7. Ne chingubo nicho yaba bamuboa lwe murwe, nacho se chaba alala ne cha katani tawe, chaba cheulukuuse chong'ene abundu. 8. Nio engilamo yesi omweeka okundi oyo, owanyoa oola asiliindwa, ne yesi abona mala asubila. 9. Nga khubela abele na bakhamanya kamaandiko tawe, mbo kenyikha kenyokhe lundi khu khwama mubafu. 10. Ne nono babeeka bacha eyo lundi muchingoba chabwe. 11. Ne kakhali Maria eema anje asiliindwa ne alikho aliila: nga ne kalila, kenama asi, mala kalola mu siliindwa, 12. Ne abona chingelosi chibili mu nguboo chiwanga chekhale, mulala lwe murwe ne okundi lwe bikele, niio kumubili kwa Yesu kwaba ne kukonile. 13. Mala bamubolela niye, Mukhasi, sikila sina ewe nolila? Ne ababolela, sikila

babukule omwami wange, ne ese se namanyile nio bamwalisie tawe. 14. Ne amalile khuloma ario, kayukha omwene enyuma, ne abona Yesu emile, ne se amanya ali Yesu niye tawe. 15. Yesu amubolela ali, Mukhasi, siina sikila ewe nolikho nolila? ewe olikho oyima naanu? Niye, akanakana ali oyuno ali olinda silundu, amubolela ali, omwami, kabali ewe wamubukule, mbolele niyo omurere, ne ese nda mubukula murusieo. 16. Yesu amubolela ali, Maria. Ke khebukha, ne amubolela ali, Rabboni; bulayi bwene khuloma oli, omwami. 17. Yesu kamubolela ali, okhandilakho tawe; khubela ese se naninile wa Papa wange tawe: ne kakhali khoche khu bawandaase mala obabolele, khenina wa Papa wange, lundi wa Papa wenywe; lundi wa Wele wange, lundi Wele wenywe. 18. Maria Makatalena eecha abolela babeeka ali akhabona Omwami, ne mbo akhaloma bibindu bino khuniye. 19. Nio endaalo eng'ene akoloba, neli endaalo ye khuranga ye lichuma, kimiliango ne kiaba ne kikalwe abundu niio babeeka baaba na bebusisie muburi bwe bayaudi, Yesu eecha ema akari kari wabwe, mala ababolela ali, kumulembe kube nanywe. 20. Nga namalile khuloma ario, abekesia kamakhono keewe, nende lubeka lwewe. Nio babeeka bewe baaba ne busangafu, nga babona omwami. 21. Nio Yesu ababolela lundi ali, ku mulembe kube nanywe: nga Papa wange ne anduma ese, ese bulayi bwene ndikho muruma enywe. 22. Ne amalile khuloma kano, abafuakho kumuya mala, ne aloma ali, khe munyole roho omuraboora: 23. Yesi yesi okhola bubwoni enywe mubeele, nibo ba belwa khulwa babene, ne yesi yesi niyo

mukhekalile bubwoni, bekalibwe. 24. Ne kakhali Tomaso, mulalakho khwi khumi na babili, olangwa Didymas, se aba ne nabo nga Yesu ne echa tawe. 25. Babeeka babandi khwako ba mubolela bali, khuboone omwami. Ne kakhali ababolela ali, Ne khabone chimbala che kimisumari mu makhono kewe chimbala Che kimisumari, mala endemo lulwala lwenge mu mbala Che kimisumari, mala ndilemo kumukhono kwange mu mbafu mwewe, se ndasuubila tawe. 26. Ne chindalo munane ne chiwele lundi babeeka bewe baabao, ne Tomasi aba ne nabo: nio Yesu eecha, kimiliango ne kili kimikale, ne ema akarikari, mala aloma ali, ku mulembe kube ne nanywe. 27. Nono abolela Tomasi ali, yosia ano lulwala lwoo, mala olole kamakhono kaase; ne yosia ano kumukhono kwowo, mala okure mu lubeeka lwaase: ne okhatamba lisuubila ta, ne kakhali suubila. 28. Nio Tomasi akobosia ne amubolela, omwami wange ne Wele wange. 29. Yesu amubolela niye, Tomasi, sikila ewe wambone ese, ewe wasuubile: bali ne khabi aboo bakhabone tawe, ne mala basuubila. 30. Ne bilolekho bikali bibindi ng'ali Yesu akhola ebweeni we ba beeka bewe, bi khaandikwa mu sitabu sino tawe: 31. Ne kakhali Kano ka andikwa, nio mbo onyale khu suubila mbo Yesu niye Kirisito, omwana wa Wele; nio mbo mu khu suubila mube ne bulamu mu khu birira mwisina liewe.

21 Enyuma we bibindu bino Yesu eyekesia omwene lundi khu beeka a nyanja ya Tiberia; ne khubukesi buno eyekesia niye omwene. 2. Aao kabao alala Simoni Petero, nende Tomasi olangwa mukhwana, nende Natanieli wa Cana

mu Kalilaya, nende babaana ba Sebetayo, ne ba beeka bewe babaandi babili. 3. Simoni Petero ababolela ali, ndikhonja khuloba. Bamubolela bali, fwesi khulacha ne nawe. Baacha ebweni, ne bengila mu liaaro bwangu; ne silo esio se banyolakho sindu tawe. 4. Ne kakhali nono asubuhi nga ne yaba ne yolile, Yesu kema khu lukuku: ne kakhali babeeka se bamanya bali Yesu niye tawe. 5. Ne Yesu ababolela ali, bananywe, mulikho ne siakhulia siosi siosi? ba mukobosia bali tawe. 6. Ne kababolela ali, Mwata chintimba chenye kumukhono kumusecha kwe liliaaro, ne mulanyola. Khwako bamwata nono, mala nono se baaba ne bunyali bwe khu chikhwesa tawe khubela bukali bwe ching'eni. 7. Khwako omweeka niye Yesu asiima abolela petero ali, omwami niye. Nga Petero awulila ali Omwami niye, Keboa engubo yewe ye khuloba, (khubela kaba sichula,) mala kepiichula munyanja. 8. Ne babeeka babaandi beechela mukharo khatiiti; (khubela se baaba Sinao khu khwama khulukuku tawe, ne kakhali yaba chi mita chi mia chibili,) ne bakhwesa lurimba alala ne ching'eni. 9. Nga ne bamalile khukhwola khusialo, baboona ku mulilo kwe kamaanda ao, ne ching'eni cha rerebwekho, ne kumukaati. 10. Yesu ababolela ali, Rerakho ching'eni nicho Nono munyolile. 11. Simoni Petero kanina angaaki, ne akhwesa lurimba khusialo lwechule ching'eni chimbofu, emia ndala nenda khamusini na chitaru: ne khubela chosi chaaba chili chingali, nekhali luriimba se lwakhalikha tawe. 12. Yesu ababolela, khamwiche mala mulie. Ne mbakhoo khu beeka bewe owa murebakho ali ewe naanu tawe, ewe oli naanu? khumanya mbo

kaba omwami. 13. Yesu nono eecha, mala abukula kumukaati, ne abaelesia, ne eng'eni yoosi ario.14. Nono luno lukhola khataru nilwo Yesu eyekesia khu beeka bewe, namalile khu khwinyokha khu khwama mubafu. 15. Nono ne bamalile khulia, Yesu abolela Simoni Petero, Simoni, omwana wa Yona, ewe wasiima ese khukhila bano? amubolela ali, Yee, Omwami; ewe omanyile oli na khusiima. amubolela ali, Lisia kamameme kaase. 16. amubolela niye lundi lukhola khabili, Simoni, mwana wa Yona, ewe wasiima ese? amubolela ali, Yee, Omwami; ewe omanyile oli ese na khusiima. amubolela ali, Lisia kamakhese kaase. 17. Amubolela lundi lukhola khataru, Simoni, mwana wa Yona, ewe wasiima ese? Petero abelela khubela amubolele lukhola khataru, Ewe wasiima ese? Ne amubolela ali; omwami ewe omanyile bindu bioosi; ewe omanyile oli ese na khusiima ewe, Yesu amubolela ali, Lisia kamakhese kaase. 18. Ng'ali, ng'ali, ese khubolela, ewe ne waba omuele, ewe welindanga wamwene , ne wakendanga osi osi niio wenyile: ne kakhali ewe nobele omukhulu, ewe okhanaaye ka makhono koo, okundi akhakhulinde, mala akhuyile niio ewe okhenyile tawe. 19. Akano kaloma niye, ne ekesia mu mulifwa siina nilio akhabiriremo nio awe Wele luyali. Ne Namalile khuloma kano amu boolela ali, nondekho. 20. Nio Petero, kekhebukha, aabona omweeka niye Yesu asiima amu londilekho; niye waba ne ayekhile khusifuba siewe musiakhulia sie koloba, ne aloma loma ali, Omwami, naanu okhuchama ewe? 21. Petero khu muboona abolela Yesu, Omwami, na omundu yuno akhakhole siina? 22. Yesu amubolela ali, kaba bali

ese nanya yuno abeo busa khukhwola nga kheeche, si sienesio siina nisio khwiwe? Nondekho ewe. 23. Nio kamakhuwa ako kabalaa engelekha akarikari we ba wandaaye mbo omweeka oyo sakenyikha afwe tawe; nekhalo Yesu saaba aloma khuniye tawe, salifwa tawe; nekakhali kabali nanya mbo amenye khukhwola nga niicha, siina esio khwiwe? 24. Oyuno ali omweeka owaba ne buloli bwe bibindu bino, mala anying'inya bibindu bino: ne khu manyile khuli buloli bwewe buli ng'ali. 25. Ne kalioo kamakhuwa kakaandi kosi kamakali niko Yesu akhola, niko, kabali abanga kaandikwa buli likhuwa mu bitabu, nibaasia ndi akhaba sibala sisiene se siakhabeele ne bubweyangu bwe khubiikha bitabu ebio tawe. Kario.

EBARUA YA PAULO OMURUMWA WA YESU KIRISITO KHU BARUMI BARUMI KUMULIANGO KWEKHURANGA

1 Paulo, omukholi wa Yesu Kirisito kalangwa khuba omurumwa wa roborwa mala wabukhashwa khubeela likhuuwa lilayi lia Wele. 2. Nilio asuubisia khaale khubirira mubang’osi bewe, mulikhuwa lilaboora. 3. Khu londekhana ne omwana wewe Yesu Kirisito omwami wefwe, wabumbwa mumubili mulumicho lwa Daudi, khulondekhana ne kumubili; 4. Wokesibwa khuba Omwana wa Wele we kamaani, khu londekhana ne liba liraboora, nga ne alamusibwa khukhwama mu lifwa 5. Khubirira mu niye khwaelesebwa ku mwalaalo kwe burumwa, mukhuria lisuubila mukholo choosi, khulwe lisina liewe, 6. Muboosi enywe mwesi mwalangwa khuba ba yesu Kirisito. 7. Khu boosi muli murumi, basiime ba wele, mwalangwa khuba baraboora: mube ne kumwalalo nende kumulembe khu papa wele, nende omwami wefwe yesu Kirisito. 8. Nyoa khusiima wele khubirira mu yesu Kirisito khubela enywe mwesi, mbo lisuubila lienywe lilomwa lomwakho mu sibala siosi. 9. khubela Wele ali omuloli wange, niye kholelanga na kumoyo kwange kwosi mukhwilwacha elomo endayi khu komwana wewe, mbo buli nga saba sendekhanga khubakhebulila mu masaba tawe. 10. Bulinga ne Saba, kabali mungila yosi namwe saayi mubuleyi mbo mbe ne lukendo lwe bukhilli, khulienya lia Wele mbo niche niyo muli. 11. Khubela Nekomba khumubona enywe, mbo nolane

khumuelesie sianwa sia roho omuraboora nio ekhumalilikha mube ne kamaani. 12. Nio mbo khu olelesiane ese nanywe, buli mundu mwisuubila no wasie, lilienywe ne liliase. 13. Enywe ba wandaase se nakhekombile mutambe limanya tawe, mbo bise bikali nekombile khu kwicha niyo muli mala nakhilwa paka saayi, niombo mbe ne kamatunda mwinywe nga bulayi bwene mukholo chichiindi. 14. Ese ndi ne likobi khu ba yunani, nende bakhali ba yunani tawe, boshi be bukesi nenda bakhali ne limanya tawe. 15. Nono, khulubeka lwange, ese endi bureke khukwilwacha likhuwa ata khwinywe muli eburumi mwesi. 16. Sendi ne chisoni khu elomo endayi ya Kirisito ta: khubela kali kamaani ka Wele khu buonia khu boosi basuubila; khunyoya omuyaudi, ne akhaba Bakiriki. 17. Khubela mukari omwo bung’ali bwa Wele bwafunulibwa mwisuubila khwisuubila: nga liandikwa, be bung’ali bakhamenye mwisuubila. 18. Khubela lirima lia Wele liafunulibwe khukhwama Mwikulu khu baandu boosi bakhalismo bu Wele ta nende kamakhikha ke babaandu, khwabo bakhingilila bung’ali khubirira mubwoni. 19. Sikila esio simanyikhane khulwa Wele siafunulibwe mukari mwabwe, khubela Wele abokesia. 20. Khubela bibindu bikhabonekha ta khukhwama nga Wele na aumba Sibala bibonekhana abuwanga, nabileweka khu londekhana ne bibindu nibio kabumba, akhaba ne kamaani ka

mindali ne Wele; nio mbo bakhaba ne lie khukwibacha tawe. 21. Sikila mbo nga bamanya wele sabamuwa luyali nga wele ta, lundi se bamupilanga orio tawe, nekhali baba ne chinganakani chisilu na sisilima mumioyo kiabwe. 22. Bekhola khuba bakesi, mala baba basilu. 23. Mala bayusia luyali lwa Wele okhakalukhana ta abe nga omundu okalukhana, namwe enyuni, namwe esang’i eli nebikele bine, nende bisala bibialama. 24. Khwako Wele yesi kabaana mubuchafu bwabwe ne liliekomba lie kimioyo kiabwe, nio balobe khu khwiwa liria khumbili kiabwe akarikari wabwe: 25. Babakalukhasia bung’ali bwa Wele khu bubeyi, mala benamila chisang’i balekha Wele wabaumba we chikhabi cha mindali. kario. 26. Khubela ako, Wele kabalekha muliekomba lie kumioyo kiabwe kimichafu: akhaba ata ne bakhaye babwe bakalukhasia kumwima kwe sikhasi kwang’ali, mala bakhola kukhali kwe sikhasi tawe. 27. Akhata basecha boosi, bakalukhana balekha kamakhuwa kabwe ke simachamacha khurumikhila bakhaaye babwe, omusecha khu omusecha bakhola kamakhuwa kakhali ne nganga tawe, mala nga kamakobosio bererera babene siukumo nisio bolana banyole khulwe likhola liabwe lie sifwabi. 28. Lundi nga ne bakhanya khu khebulila Wele munganakani chabwe ta, mala Wele kabalekha mulimanya liabwe lie butibii, ne bakhole kakhenyikhana ta. 29. Bechulamo chingano choosi che kamakhikha, mala bechulamo bueyi, bubwoni, kumulungo, ne bunyalu; likhalikhililwa, libuba, bubwiri, bukhupani, bubacha, bulosi,

bukutani. 30. Bitina, sikhonde khu Wele, bayingani, baba ne sileka, baba babefumia, babe khochocha khu bandu, bakharia babebuli babwe tawe. 31. Bakhali nelimanya ta, bafuna endakano bakhali ne siisa tawe, bakhekomba bung’ali tawe, bakhanyalaabela tawe, bakhali ne siisa ta. 32. Bamanyile sikhhalako sia Wele, mbo bakhola ako bolaana lifwa, sekali nikobakhola busa ta, nekhali lundi basangalilanga niko bakhola alala ne babandi.

2 Khwako, soli ne sikila ne bunyali bwe khukhalaka ta, Khubela nokhalakila okundi, aba wikhalakila wamwene; khubela niko ewe okhalaka niko okholanga ako. 2. Noono, Fwesi khumanyile khuli sikhhalako sia Wele sili siang’ali, khwabo bakhola bibindu birio. 3. Noono, ewe nga omwana wo omundu okhalaka kano, mala wesi okakhola, olola oli ewe olatuuma sikhhalakilo sia Wele?. 4. Namwe aba ewe oleklesia buyinda bwe bulayi nende khusuta nende khukhwekhalilikha khwewe; ne kulekha khumanya mbo bulayi bwa Wele bukhwosia mukhwekanila? 5. Nekhali bulume bwe kumoyo kwoo ne khuloba liliekanila somanyanga mbo okhokhola lirima libe likali nende lilichusibwa munyanga che bukhhalaki bwang’ali bwa Wele. 6. Akhaane buli mundu khulondekhana nende bikholwa biewe; 7. Limenya lia mindali na mindali likhabe khwabo babekhelilikha khukhola kamalayi nebaenja efuma ne luyali nende bulamu bukhawayo ta; 8. Khwabo ba basiima kamamonyo, bakhhalonda bung’ali, balonda khubwoni, lirima ne embelekeu. 9. Sinyasio nende

buchuuni, sili khubuli kumwoyo kwo omundu okhola kamabi, wekhuranga Omuyaudi nende Omuyunani; 10. Ne kakhali efuma nende liria nende kumulembe kuli khwabo bakhola kamalayi, wekhuranga Omuyaudi nende Omuyunani yesi; 11. Ne khubela selilio liria khu mundu yesi yesi khu wele ta. 12. Khubela nga bakali ne bakhola bubwooni nekhaliho ne lilaka tawe bakhabune nekhali ne lilaka tawe: na bakali babakhola bubwoni khwilaka bakhakhalakilwe khwi laka. 13. (Seli abo baulila lilaka be bung'ali ebweni wa Wele tawe, ne kakhali abo bakhola ke lilaka bakhabalwe be bung'ali. 14. Khubela besibala, bakhali ne lilaka ta, ne bakhola ako kali mwilaka, khunibo lili Kamalaka khubene: 15. nibio biekesia kumulimo kwe lilaka kwa andikwa mumioyo kiabwe, liba liabwe liliene liekesia mala kamebasio kabwe kababiiya, namwe kababoa, kababela mulala khu kundi:) 16. Mundalo nichio Wele achakhukhalakila biemubwikisi bie babandu khubirira mu yesu kiristo khulondekhana nende elomo endayi yange. 17. lola ewe, akhaaba no olangwa Omuyaudi; weyikina lilaka, ne wefumisila mu Wele. 18. Ne khumanya li lienya liewe, na khufukilila kamakhuwa kamalayi, ewe waekesebwa mwilaka. 19. Ne omanya mbo ewe ng'ali oli omurangirisi we babofu, buwanga bwabo bali musilima, 20. Omwekesia we basilu, omwekesia we babana, olikho ne limanya nende bung'ali khu lilaka. 21. Ne ewe wekesia okundi, nawe sonyala weyekesia ta? Ewe wilwacha oli omundu akheba ta, newe wiba? 22. Ewewe wekesia mbo se

lieniyikhana omundu akhole bueyi, newe soli omueyi? Ne ewe okhenyanga bifwanane, soli ewe winamila bifwanane chana? 23. Ewe wifumia ne kamalaka, nofuna kamalaka aba sokosela Wele? 24. Khubela enywe mukila lisina lia Wele besibala ne balikhoma, nga liandikibwa. 25. Khukhebwa khuba ne nganga, khwabo batila kamalaka: kabali wafunile kamalaka, khukhebwa khwabwe balinga bakhakhwebwa tawe. 26. Nono okhakhebwa kabali atila kamalaka khubung'ali, khuloba khukhebwa khwewe okhwo sekhubalibwa nga owakhebwa? 27. Ne oyo okhakhebwa kumubili kwewe, kabali echusia lilaka yikhakhalakila wamwene, oyo khu lwe barua ne khukhebwa khufuna lilaka? 28. Khubela sali omuyaudi tawe, oli wekhubonekha busa tawe, nekhali sesili sikhebo sienje busa nekhali khumubili; 29. Ne kakhali ali Omuyaudi mukari; ne sikhebo sie kumumwoyo, mu roho, seli mumalaka tawe; khu efuma yewe seli khubandu nekhali ya Wele.

3 Nono, bukhala si nibwo Omuyaudi alinabwo? Namwe, sikhebo sili ne nganga si? 2. Lukali buli mungila yoosi: ekhuranga, sikila khunibo baebwa burume bwa Wele. 3. khubela kaba karie kabali balalakho se basuubila tawe? Namwe khuloba khusuubila khwabwe khukhola lisuubila lia Wele liatamba enganga? 4. Wele akania: yee, Lekha Wele abe webung'ali, ne kakhali buli omundu omubeyi; nga liandikwa, Mbo niewe wolane khubalikhwa khuba webung'ali mumakhuwa niko ewewe oloma, nio ewe okhile nocha

musikhalakilo. 5. Nono kabali bubi bwefwe bwokesia bung'ali bwa Wele, aba khuloma khulisi? Aba Wele Sali we bung'ali orera lirima liewe (Ese ndomaloma nga omundu) 6. Wele akania: khubela Wele nono acha khukhalakila sibala arie? 7. Kabali kali mbo bung'ali bwa Wele bulatasa luyali lwewe khubela bubeyi bwase; sina sikila esee sesi nesikhalakilwa nga omwoni? 8. Sekhubola khuli, (Nga babandu nebakhubeelanga mbo khulomile khurio, ne babandi beyama mbo kalikario khulomile,) Khukhole kamabi, nio kamalayi keeche? Khwako khukhalakibwa khuli khwebung'ali. 9. Nono aba kali karie? Efwe khuli balayi khukhila nibo? Tawe, Ata atiti tawe: khubela nga limanyikhane mbo fwesi Bayaudi ne Bayunani khuli mubwoni; 10. Nga liandikwa, salio webung'ali, ata mulala tawe: 11. Salio oelewa ta, salio oenja Wele ta. 12. Boosi batibile engila, boosi alala sebali ne nganga tawe; mbao okhola kamalayi, tawe, ata mulala tawe. 13. Emumilo yabwe eli khwasie nga silindwa, chindimi chiabwe jiechula bubeyi; ne khurikhirisila butinyu, nga buchiba bwe ndemu, khukwama muminwa kiabwe. 14. Nibo kiminwa kiabwe kiechula bilamo ne buchuni. 15. Bikele biabwe bili bibiangu khuchukha sifuki: 16. Khukhwonaka nende libunia bili munibo buli mungila chabwe: 17. Mala engila ye kumulembe seba kimanyilekho tawe: 18. Liria lia Wele selilikho mumoni chabwe tawe. 19. Nono khwamanyile khuli liosi liosi nilio lilaka liloma khwabo bali asi we kamalaka: Nyo bali nisio kumunwa kuloma siakame, ne sibala siosi sibe asi we sikhalako sia Wele. 20. Khubela

khu bikhwolwa bie kamalaka salio omundu we bung'ali mumoni chewe tawe; khubela khwilaka khukila wamanya bubwoni. 21. Noono sahi bungali bwa wele bwabonekhe Nekhali ne lilaka tawe, ne burusibwa buloli bwe lilaka ne bang'osi; 22. Akhaba nono bung'ali bwa wele mu yesu kiristo khu boosi nende abo boosi ba musuubila; khubela se khulikho ne bu bwabukhani tawe. 23. Khubela boosi bakhola bubwoni; mala ba bombelelwa ne Luyali Iwa Wele; 24. Bakholwa khuba balungi khubirira mu mwalaalo kwewe, mungila ye buonia bwa Yesu Kiristo; 25. Nio Wele karao abe oambania mungila ye lisuubila mumafuki kewe, nio kokeshie bungali bwewe, khubela khurusiao bubwoni bu bwa bira, khubirira mu khwefwilisia khwa Wele; 26. Khwekesia ese enoma, khu bise bino bung'ali bwewe: kolane khuba wa nga'li, nende oyo khuba wang'ali oyoyo osubila mu Yesu. 27. Khukhwifumia khuliwae nono? Liarerebwe enje, khwilaka sina? lie bikholwa? Tawe: Nekhali kwilaka lie lisubila. 28. Khwako, khumallilisia mbo omundu olanisibwa mwisubila, sebili bikholwa bie lilaka tawe. 29. Ali Wele we bayaudi bong'ene? Yesi Sali Wele we banasibala boosi tawe? Kario, Wele we banasibala boosi. 30. Khubona mbo ali Wele mulala, okholanisie be sikhebo khumirira mwisubila, nende bakhali be sikhebo khubirira mwisubila. 31. Nono efwe khukhola lilaka litambeo khubirira mwisubila? Wele akania: yee, khutinyilisia lilaka.

4 Khulome khulisi Nono, mbo Aburhamu Papa wefwe, khulwe kumubili, nio kanyola? 2. Kabali Aburhamu kolanisibwa we bung'ali khulondekhana khulwe bikholwa, akhabele ne lie khwefumishilakho; nekhali seli ebweni wa Wele tawe. 3. Ne lunyiili lubola sina? Aburham asubila Wele, ne liabalililwa khunie khu bulungi. 4. Nekhali omundu okhola ekasi, kumururu kwewe se kumanyikha khuba kumwalalo tawe, nekhali lia likobi. 5. Nekhali khu mundu oyo okhakhola ekasi ta, nekhali asubila oyoyo owolanisia bakhali ba Wele tawe, lisuubila liewe libalilibwa khu bulungi. 6. Akhaba nga Daudi yesi nabola khukhabi cho omundu, niyo Wele karakho bulungi nekhali ne bikholwa, 7. Kalomekhwa, Bali ne chikhabi nibo kamakhikha kabwe kabelwa nibo bubwoni bwabwe bukhabalikhwa tawe. 8. Ali nekhabi omundu oyoo niyo omwami akhamubalilakho bubwoni tawe. 9. Chikhabi chicha Noono khwabo be sikhebo bong'ene, namwe ba khakhwebwa boosi? Khubela khuloma mbo lisubila liamanyikha khu Aburham mu bulungi. 10. Limanyikhana liriena nono? ne kaba musikhebo, namwe nekhali musikhebo tawe? ne akhali musikhebo tawe, Ne kakhali nali mukhali musikhebo ta. 11. Mala kanyola simanyilo sia sikhebo, si siaba sie bung'ali mwisuubila ata nakhakhebwa tawe: nio kolane khuba Papa wa boosi ba suubila, akhaba nekaba okhakhebwa ta, nio bulungi bwolanile khuba khu bosu. 12. Mala Papa wesikhebo khwabo bakhali be

sikhebo bong'ene ta, Nekakhali abo bosu bakenda mulukele lwe lisubila lia Papa wefwe Aburhamu, ne kaba ne akhakhebwa ta. 13. Khulwe ndakano mbo kenyikhana *khukhwamia sibala*, seyaba khu Aburhamu, namwe khulumicho lwewe, khubirira mwilaka ta, ne kakhali khubirira mu bulungi bwe mwisuubila. 14. Kaba bali belilaka nibo *bamia* sibala, lisuubila likholwa sindu ta, nendakano ekholwa ekhalimo enganga tawe: 15. Khubela lilaka likhola lirima: nio lilaka likhali tawe, sekhuli ne bukhikha tawe. 16. Ne kakhali lili lie lisuubila, lilolane Khubela kumwalalo; ekhumalilikha endakano yolane khuba ng'ali khu lumicho lwosi; seli khwabo bong'ene bali ne lilaka ta, Nekakhali kwabo bosu bali be lisubila lia Abrahamu; oli Papa wefwe fwesi, 17. (Nga liandikwa, ese nakhukholile ewe khupa Papa we kamarambo kamakali,) ebweni woyo niye kasubilamo ata Wele, we busia baafu, mala kalanga bibindu ebio bikhabao tawe nga oli bi biabao. 18. Olisibacho ne lieikina asubila mukweikina, mbo kolanile khuba Papa we kamarambo kamakali; khulondekhana nende akako kakalomwa, nono lumicho lwoho lukhabe. 19. Mala khulekha khuba omutekhele mwi suubila, sekalolelesia kumubili kwewe khuba kufwile luno luri, nekaba ne bukhulu bwe kimiko embi emia ndala, namwe lusaye lwa Sarah selwafwa tawe: 20. Sekayeng'anakho mundakano khu Wele mukhubirira khulekha khusuubila tawe; ne kakhali kaba burana mwisubila nawa Wele luyali; 21. Khuba nelilieikina mwubwichufu busa mbo, niko kalakilisia anyala kosi

khukakhola. 22. Mala khwako liarebwa khuniye khubung'ali. 23. Bise bino sebiandikilwa khulwe yeng'ene tawe, mbo liarwa khuniye: 24. Nekakhali ne nafwe fwesi, khwabo ekha rerwekho, kabali khusuubila khuyo wabusia Yesu omami wefwe khukwama mubafu; 25. Oyo waanwa Khubela kamakhikha kefwe, kenyusibwa lundi khwolanibwa khwefwe.

5 Khwako khu balilibwa khwisuubila, khuli ne kumulembe ne Wele khubirira mu omwami wefwe Yesu Kristo: 2. munie yesi khuli nende bubiriro mwisubila mu mwalalo kuno nikwo kwimilemo, mala khusangala mulieikina lie bukhumi bwa Wele. 3. Mala sekali kario busa tawe, nekhali musinyasio mwoosi: khuli ne bukhumi bwoosi; khumanyile mbo binyasio bikhola liliekhalilikha; 4. Ne liliekhalilikha, bunasio; ne kunasio, lilieyikina: 5. Ne Lilieyikina selikhola chisoni tawe; khubela busime bwa Wele bwachukhwa mububalayi mumioyo kiefwe khubirira mu muyoo kumrabora nikwo khwaebwa. 6. Nga nekhwaba ne khukhanyola kamani tawe, bise bienebio Kiristo kafwila bakhali ba Wele tawe. 7. Buli bulume omundu omulungi wasie khumufwila: ne kakhali omundu omulayi balala banyala berusia khufwa. 8. Nekakhali Wele kekesia busime bwewe khwifwe, niyo, mbo nekhusili baboni, Kiristo kakhufwila efwe. 9. Lukali Khu tumakhao, khuba luno luri ne khubalilibwa kamafuki kewe, khu khaonisibwe mwirima khubirira muniye. 10. Nono, nga nekhwaba basiku, khwa ambasibwa khu Wele

kamakali khubira, ne khuaambasibwe khu khaonisibwe nende bulamu bwewe. 11. Lundi sekali busa kario ta, nekakhali efwe fwesi khwikhoya mu Wele khubirira mu omwami wefwe Yesu Kristo, khubirira khuniye khwanyolile kumurungo (*buonia*). 12. Khwako, khubirira khu mundu mulala bubwoni bwengila musialo, mu lifwa khubwoni; ne lifwa liecha khu bandu boosi, mbo boosi bakhola bubwoni; 13. (lilaka neli khechao ta bubwoni bwaba musialo: nekhali bubwoni seburerwa nio lilaka tawe. 14. Kakhaba kario lifwa lia ruka khukhwanja ne Adamu khukhwola khu Musa, ata khwabo bakhakhola bubwoni khulukano lwa Adam ta, nanu oli sifwanane siyo wicha. 15. Nekakhili sekali nga kamakoso tawe, nekhali sili sianwa busa. Kabali khubwoni bwo omundu mulala bakali bafwa, lukali Kumwalalo kwa Wele, nende sianwa sie Kumwalalo, khubirira mwikoso lio omundu mulala bakali bafwa, kumwaalalo kwa Wele kukhilakho lukali, lundi sianwa sie Kumwalalo kuli kwo mundu mlala Yesu Kiristo kara khubakali. 16. Sekali nga khubirira khu mulala wakhola bubwoni, nono sili nga sianwa: khubela sikhhalako khubirira khu mulala yarera Sinyasio, nekhali sianwa sia busa khubela kamakoso kamakali siarera khubalikhwa khwebung'ali. 17. Kabali khubwoni bwo omundu mulala lifwa lia ruka nende mulala; Khwako kamakali banyola kumwalalo sili sikali nende sianwa sia bulungi ba kharuke mubulamu nende mumulala, Yesu Kristo.) 18. Kali kario mbo khubwoni bwo omundu mulala sikhhalakilo siecha khu bandu boosi; mu

khwonakibwa; nono kario mbo khubulungi bwa mulala siianwa sia busa siecha khubandu boosi khu balilisibwa mubulamu. 19. Khubela khulekha khuria khw omundu mulala, bakali boshi bakhwola khuba baboni, Khwako khukhwibombia khwa mulala bakali bakholebwa balungi. 20. Khukhilakhoo nga lilaka ne liengila, nyo kamakoso kolane khucha. Nekakhali nio bubwoni buli bukali Kumwalalo kubao kukukali: 21. Mbo nga bubwoni bwaruka khukhola kwifwa, bulai bwene Kumwalalo kwolanibwa khuruka khubirira mubulungi, mubulamu bwa mindali na mindali khubirira mu Yesu Kristo omwami wefwe.

6 Khu khalome khulisina nono? khunyala khuchililile mubwoni, mbo kumwalaalo kuchililile khubao? 2. Wele akania. Kaba karie efwe, khukhwafwa khu bubwoni, khuchilile khumenya mubwene? 3. Se mumanyile muli bakali mwifwe nga ba batisibwa mu Yesu Kiristo ba batisibwa mwifwa liewe? 4. Khwako khwasikhwa naye mu khubatisibwa mwifwa liewe: nga busa Kristo kenyokha khukhwama mu bafu muluyali lwa Papa, kario ata efwe khumenye mwimenya lie mu buya bwe bulamu. 5. Kabali khwa bialwa alala mu khu fwananisibwa ne lifwa liewe, fweni khu lalonda mu lifwanana lie linyokha liewe: 6. Khumanya lino, mbo omundu omukhale wefwe ba mubamba naye, mbo kumubili kwe bubwoni kunyale khu khwonakibwa, khwama ao khucha ebweni khu khakholela bubwoni tawe. 7. Khubela oyo wafwa ali ne bulekhule khu khwama khu bwoni, 8. Luno kaba bali

khuli bafu ne Kirisito, khu suubila khuli fweni khu khamenye ne naye: 9. Khumanyile khuli Kristo enyokha mu bafu safwa lundi tawe; lifwa selili na bunyali khuniye lundi tawe. 10. Mukhufwa khwewe, kafwa khubela bubwoni lulala: ne kakhali amenya, amenya khu Wele. 11. Nono kali kario mwesi mubalibwe mbo mwafwa ng'ali khu bwoni, Nekakhali khuli balamu khu Wele khubirira mu Yesu Kirisito omwami wefwe. 12. Mu khalekha bubwoni bwamie mu mibili kienywe kifwa tawe, khubela liliekomba le kumubili tawe. 13. Lundi okharusia sitonyi siosi siosi sie kumubili siaba bulwani bukhalo bwe bung'ali tawe khu bwoni: ne kakhali yerusia mwabene khu Wele, nga abo bali balamu khu khwama mu bafu, ne bitonyi bienywe bie kumubili nga bulwani bwe bung'ali khu Wele. 14. Khubela bubwoni se bulaba ne bunyali khwinywe ta: khubela semuli asi we lilaka ta, ne kakhali muli asi we ku mwalaalo. 15. Nono aba sina? Khukhole bubwoni, khubela sekhuli asi we lilaka tawe, ne kakhali khuli asi we ku mwalaalo? Wele akania. 16. Se mumanyile ta, mbo khunie mwianakho mwabene bakholi khuria, muli bakholi bewe be khumuria; ebele mu bwoni khukhwola mwifwa, namwe mu khwebombia khukhwola mu bung'ali? 17. Ne kakhali Wele aebwe orio, mbo mwaba bakhlabani be bubwoni, ne kakhali, mwaria Khukwama mu mioyo mbo khulukano lwe kameeko niko bamuelesia enywe. 18. Mwaba Nono namukholwa balekhule khu bwoni, mala mwekela khuba bakhlabani be bung'ali.

19. Ndomaloma khu londekhana nga mulukano lwe babaandu khulwe butekhele bwe kimibili kienywe: Khubela nga mwerusia khuba bakhalabani be bunyalu khu makhikha khu makhikha; akhaba kario nono rusia bitonyi bienywe bakholi be bung'ali mu buraboora. 20. Khubela nga mwaba bakhalabani be bubwoni, mwaba balekhule khukhwama mu bung'ali. 21. Mwanyola matunda si mubikholwa bili bie chisoni luno? Khunilwo ekhumalilikha we bibindu ebiebo lili lifwa. 22. Nekakhali luno mwakholebwe balekhule khukhwama mubwoni, mala mwabele bakhalabani khu Wele, muli ne kamatunda kenye mu buraboora, ne ekhumalilikha buli bulamu bukhali wao tawe. 23. Khubela kumurungo kwe bubwoni lili lifwa; ne kakhali si aanwa sia Wele buli bulamu bwa mindali khubirira mu Yesu Kristo omwami wefwe.

7 Se mumanyile enywe tawe, wandaase, (Khubela khenomaloma khwabo bamanyile lilaka,) kali karie mbo lilaka na lili ne kamani khu mundu nga na menyile? 2. khubela omukhasi oli ne omusecha aboebwa ne lilaka khu musecha wewe nga na chililila khumenya; Nekakhali kabali omusecha abe ne kafwa, ali omulekhule kwilaka lio omusecha wewe. 3. Noono aba, omusecha wewe nasili omulamu, nabeela khu musecha okundi, alangwa khuba omutamba: ne kakhali omusecha wewe nafwa ali omulekhule khwilaka elio, nono salangwa omutamba tawe; akhaba na abeela khu musecha okundi. 4. Khwako, wandaase, enywe

mwesi mwabele bafu mwilaka khu mumubili Kwa Kirisito; mbo mwenyikhane mubeele khukundi, akhaba khuyo wabukha mubafu, nio khurere kamatunda ebweni wa Wele. 5. Khubela nga khwaba mumubili, lilikomba lie bubwoni, liliabao khubela lilaka, liakhola kumulimo mubitonyi biefwe ata biakhurerera ebweni kamatunda khu lifwa. 6. Ne kakhali nono khuli balekhule khukhwama khwilaka, mbo nekhuli mwifwa khwaba baboe; mbo khwenyikhane khu khalabane mubuya bwe mumoyo, na seli mwiba mwe sikhale omwo tawe. 7. Khu khalome khulisi nono? Aba Lilaka bubwoni? Wele akania. Ta, bele senaba namanya bubwoni tawe, ne kakhali khwilaka: yaba se namanya liliekomba tawe, nekhali niko lilaka liloma, ewe Okhekomba tawe. 8. Ne kakhali bubwoni, khubukula bu bweyangu khu malaka, yakholo bubwoni bubi ngano na ngano. Khubela ne khukhali ne Lilaka tawe yaba bubwoni bwafwa. 9. khubela naba omulamu lulala lilaka ne likhaliho tawe: ne kakhali kamalaka nga kecha, bubwoni bwenyokha, ne ese nafwa. 10. Ne kamalaka, ka karebwao khubela bulamu, nanyolekha nga ndi khwifwa. 11. Khubela bubwoni, khubukula bu bweyangu mu malaka, bwambea, khunibwo bwanjira. 12. Khwako kamalaka kali ka maraboora, ne bulungi nende bulayi. 13. Kakaba nono kamalayi kakhola lifwa kwise? Wele akania. Ne kakhali bubwoni, mbo linyalikhana khubonekha bubwoni, likhola lifwa mwise khuli khubulayi; mbo khulwe lilaka khukhwola bube bubwoni bubi lukali.

14. Khubela khu manyile khuli Lilaka lili lia kiroho: ne kakhali ese we kumubili, nakusibwaa asi we mubwoni. 15. Khubela ako Niko ekhola senga kana tawe, khubela nilio nanya, sendikhola ta; ne kakhali nilio nabiila nilio ese khola. 16. Kaba bali khola elielo nilio khenya ta, niyama mbo lilaka lili lilayi. 17. Luno nono sendi ese okhola kano tawe, ne kakhali bubwoni bu bwekhala mwise. 18. Khubela manyile mbo mwise (mbo kali, mumubili mwase) mbakhomo lilayi tawe: khubela khu khwenya khuli nase; ne kakhali khukhola elielio lili lilayi senyola tawe. 19. Khubela lilayi nilio nanya, se ndikhola tawe: nekhali lililibi nilio ekhenya ta nilio khola. 20. Nono kabali khola niko kakhenyikhane tawe, sendise okhola tawe, ne kakhali bubwoni bu bwamenya mwise. 21. Nyola nono lilaka, mbo, nga nyala khole kamalayi kamabi kali ne nase. 22. Khubela nekhoyela mwilaka lia Wele enyuma womundu we mukari: 23. Nekakhali mbona lilaka lilindi mubitonyi biase, lirekana ne lilaka lie chinganakani chase, lundi bingobosia mubuambe khwilaka lie bubwoni buli mu bitonyi biase. 24. Oo! ese omutekhele ndie! ese Nanu okhambolole khu kwama mu mubili kwelifwa kuno? 25. Sima Wele khubirira mu Yesu kristo omwami wefwe, Khwako nono ese munganakani khalabanila lilaka lia Wele; ne kakhali khumubili lilaka lia bubwoni.

8 Khwako nono sahi sesilio sikhalakilo khwabo bali mu Kirisito Yesu tawe, ba khakeenda mu mubili tawe, ne kakhali

bakeenda muroho. 2. Khubela lilaka lia muroho we bulamu mu Kirisito Yesu liakholile omulekhule khu khwama khwilaka lie bubwoni ne lifwa. 3. Khubela khuniko Lilaka likhanyala khukhola tawe, khubela liaba litekhele khubirira mumubili, Wele aruma omwana wewe mu fwani ye kumubili kwe bubwoni, nende bubwoni, bwa khalakibwa bubwoni mu mubili. 4. Nio mbo bung'ali bwe lilaka bwolaane khu khwichusibwa mwifwe, khu khakeenda busa mumubili tawe ne kakhali mu roho. 5. Khubela abo be mumubili bakanakane ke kumubili; ne kakhali bali muroho bibindu bia muroho. 6. Khubela khuba ne chinganakani che kumubili lili lifwa; ne kakhali khuba nende chinganakani cha muroho buli bulamu ne Kumulembe. 7. Sikila khuba ne chinganakani che kumubili buli busiku khu Wele: khubela se chefwililisia khu lilaka lia Wele tawe. Namwe linyala liaba 8. Nono nio bali mumubili se banyala khu simiisia Wele tawe. 9. Ne kakhali se muli mu mubili tawe, ne kakhali muroho, kabali kario roho wa Wele ekhala mwiye, luno kabali mundu sali ne roho wa kirisito tawe, aba Sali wewe tawe. 10. Ne kaba Kirisito ali mwiye, kumubili kwafwa khubela bubwoni; ne kakhali roho ali bulamu khulwe bung'ali. 11. Ne kakhali Kabali roho oyo wenyosia Yesu khurula mu bafu amenya mwinywe, oyo wenyosia Kirisito mu bafu alanguisia bulamu mu mibili kienywe kifwa khu roho omenya mwinywe. 12. Khwako, ba wandaase, efwe khuli be kamakobi, seli mumubili tawe, khumenya khulwe kumubili. 13. Mbo kabali omenya khu lwekumubili, ocha

khufwa: ne kakhali khubirira roho mukalia bikholwa bie kumubili, mula menya. 14. Nga bakali ne barangiribwa nende roho wa Wele, bali babaana ba Wele. 15. Khubela Se mwanyola roho we Siboe lundi murie tawe; ne kakhali mwanyola roho omukhola babaana, niyo efwe khulila, Abba, Papa. 16. Roho omwene arusia buloli mu roho yefwe, mbo efwe khuli babaana ba Wele: 17. Ne kaba bali khuli babaana, nono aba be kumukabwo, kumukabwo mu Wele, ne khusaanga mumukabwo ne Kiristo; ne kaba kario khunyakhana alala naye, nio mbo fwesi khwolane khunyola luyali ne naye. 18. Nono mbara mbo binyasio bia bise binoo se biolana khu fwananisibwa ne luyali lu khafunulibwe khwifwe tawe. 19. Khunilio bibumbe bilindilila mukhweyikina lukali mu khubonekha khwe babaana ba Wele. 20. Khubela siumbe sia kholwa busa mumbaka ekhaya, seli mukhwenya tawe, ne kakhali khu lwe sikila siewe mbo bifwane birio mu lieyikina. 21. sikila ata sibumbe sisiene siosi sicha khu lekholwa khu khwama mu buambe bwe bu khalukha mu bulekhule lwe luyali khu baana ba Wele. 22. Khubela khumanyile mbo bibumbe biosi binyakha ne mubuchuni bukali alala khukhwola luno luri. 23. Ne seli busa biong'ene tawe, ne kakhali ne nafwe fwesi, khuli ne kamatunda kebweni ka roho, Akhaba fwesi khulila mu buchuni mukari mwefwe, ne khulindilila khu khukhola ba baana, khubololwe kimibili kiefwe. 24. Khubela Khwa onesebwa mulieyikina: ne kakhali li lieyikina libonekha se lili lieyikina tawe: khubela nisio omundu

abona naanu weyikina nisio abona? 25. Nekabali khweyikina esio nisio khukhabona tawe, nono aba ne li liekhalilikha khu silindilila. 26. Bulayi bwene busa nga roho nakhuyeta mu butekhele bwefwe: khubela se khumanyile nisio khwenyikhane khusalile tawe nga khwenyikha: ne kakhali roho omwene kekonjelela Wele khwifwe mu mubililo bi khalomekha tawe. 27. ne Oyo Omenielesia mumioyo amanyile nisio sina enganakani ya roho, sikila ekonjelelanga khulwe baraboora khu londekhana ne liliyenya lia Wele. 28. Ne khumanyile khuli bindu biosi bi kholekha alala khulwe bulayi bwabo ba bamusiima Wele, khwabo ba balangwa khu londekhana ne sifuno siewe. 29. Khwabo nibo anyoa amanya, nibo arobora mbo ba kalukhasibwe mufwani yo mwana wewe, nio mbo abe omubele akarikari we bawandaaye bakali. 30. Ne abo nibo arobora khu khwama khaale, nibo alanga; nende nibo kalanga, abo bosu ba fukilibwa: nende abo nibo afukilila, abo bosu abawa luyali. 31. Khukhalome nono khuli siina khu bindu bino? Kabali Wele aba khu lubeka lwefwe, naanu onyala akhwikayila efwe? 32. Oyo okhalekha omwana wewe ne kakhali amuaana khubela efwe fwesi, kaba kariena mbo alekhe khu khuelesia busa efwe bindu bioosi? 33. Naanu okhareo siosi siosi sie bukhalaki khu barobore ba wele? Ali Wele obolanisha mu bulungi. 34. Naanu oyo obeuma? Ali kirisito wafwa, yee khukhila ao, oli wabuukha lundi, nie oli khumukhono kumulungi Kwa Wele; yesi lundi nie okhusalila efwe. 35. Naanu okha khwa buakhasie

efwe ne busiime bwa Kirisito? Kumunanio, buandalafu, linyasia namwe enjala, namwe sijula, namwe sieli, namwe embalu? 36. Nga ne liandikwa, khubela ewe khwirwa endalo yosi; khwubalibwa busa nga likhese nilio baila eli bakilo. 37. Tawe, mu bindu bino bioosi efwe khuli angaki we bakhili khubirira muyo wa khusima efwe. 38. Khubela ndi ne bung'ali mbo, libe lifwa, namwe bulamu, namwe chingelosi, namwe bubwami, namwe kamani, namwe bibindu bilio, namwe bindu bikheche. 39. Namwe bulei, namwe bili asi, namwe siumbe sisindi siosi, sesinyala siakhuakhasia nende busime bwa Wele, buli mu Kirisito Yesu omwami wefwe.

9 Ese noma bung'ali mu kristo, sembea tawe, kamebasio kase ke mu moyo. kosi karusia bulooli mu moyo ku murabora, 2. Mbo ndi nende busiro bukali ne buchuni bu chilila mu moyo kwase. 3. Nikomba ndi ese samwene mbe ne silaamo khu khwama khu Kiristo khulwe ba wandayase, balebe base khu londekhana ne kumubili: 4. Bali ba Israel; khu bakhwola ba baana, ne bukhumi, nende jindakano, ne khuana lilaka, ne kimilimo kia Wele, nende chi ndakano; 5. Banaanu bakuka bano, ne khulwe banaanu khu londekhana ne kumubili Kirisito kecha, Oli angaki khu boosi, Wele, aana chikhabi mindali. Kario. 6. Sekali oli nga likhuwa lia Wele ne likhali ne bukhala tawe. Khubela sebali boosi ba Israeli tawe, baali ba Israeli: 7. Ne seli bali, sikila bali be lumicho lwa Abrahamu, baali boosi ba baana: ne kakhali, mu Isaka lumicho lwoo lucha khulangwa. 8. Kali kario,

abo bali babaana be mumubili, bano sebali babaana ba Wele tawe; ne kakhali babaana ba bendakano babalwa khu lumicho olwo. 9. Khubela lino lili likhuwa lie ndakano, nga bise bino ese kheche, ne Sara akhabe nende mwana omusoleli. 10. Lundi sekali kano kong'ene tawe; ne kakhali Rabeka yesi nga anyola sisombo khu mulala, akhaba khukhwama khu Papa wefwe Isaac; 11. (Mbo ne babaana ne bakhebulwa tawe, namwe ne bakhakhola bulai namwe kamabi tawe, nio mbo sifunane sia wele khulondekhana ne burobosi bwoolane khukhwima, bukhali bwe bikholwa, nekakhali khuyo wa langa;) 12. Lia lomwalomwa khuniye mbo, omukhulu akhabe umukholi owo mukekhe. 13. Nga lili liandike, Yakobo ese na musiima, ne kakhali Esau ese na mubiila. 14. Nono khuloma khuli siina? Khulikho ne bukhali bung'ali mu Wele tawe? Wele akaania. 15. khubela abolela Musa, "ndakholela siisa oyo yesi yesi niye nenyu khu kholela siisa, ne khabe nende busiime khuyo nie khabe ne busiime. 16. Nono se kali khuyo wenya taa, namwe khuniye otima tawe, nekhali Wele niye wokesia siisa. 17. Khubela kamaandiko kalomaloma khu pharaoh, akhaba khu sifuno sino sisiene ese nakhwinyusha angaki, mbonokesie kamani kangu mwiwe, ne mbo lisina liange liliandasibwe musibala siosi. 18. Khwako ali ne siisa khuyo niye akhabe ne siisa, ne oyo nie enya amukhola omulume. 19. Ewe olaloma nono khwise, kabele kariena niye anyole kamakhikha? mbo nanu okhingilile liliyenya liewe? 20. tawe nekhali, mundu wee, ewe nanu

akobosie khukhingila Wele? Sisindu si siang'onwa sinyala sialoma khu wasing'ona, mbo sina sikila ne wang'ona oriri? 21. Omubumbi Sali ne kamani khuliloba, mbo sibumba sisiene anyala wang'ona siilonge sie liria, ne sisindi sikhali ne liria tawe? 22. Kali kariena kabali Wele, kenyile khu khwokesha lirima liewe, ne khukwenya khuokesia kamani kewe khu manyikha, achililila ne li likhalilikha likali nio sibumbe sia lirima siolane khu khwonakibwa; 23. Nio mbo olane khukhola buyinda bwewe bweluyali bumanyikhe khusilonge sie siisa, nisio anyoa kang'ona khu bukhumi, 24. Akhaba efwe, nibo kalanga, bakhali bayaudi bong'ene tawe, nekakhali khulwe basibala bosu? 25. Nga bulaa bwene kalomaloma mu Hosea, ndabalanga nibo babandu bange, abo bakhaba bandu babange tawe; ne omukelema wewe, oyo okhaba omukelema tawe. 26. Lundi lilecha khubira, mbo abundu niye babolelwa, semuli babandu bange tawe; abwenao bacha khulangwa babana ba Wele omenyile. 27. Isaya yesi alila khulondekhana ne Isiraeli, mbo akhaba esaabu ya babana ba Isiraeli neli engali nga kumuyekhe kwe khu Nyanja, ba batong'a bacha khu onisibwa. 28. Mbo acha khumala kumulimo, mala akhole mu bwimbi mu bung'ali: sikila kumulimo kimwimbi omwami acha khukhola khusibala. 29. Nga Isaya na anyowa khu lomaloma, nekhalo omwami we liye nakha khulekhele lumicho, khwakhabele nga ba Sodoma, lundi khwakhakholebwe nga ba Komora. 30. Nono khukhalome khuli sina? mbo be sibala, bakhaloonda bung'ali tawe,

mbo banyolekha mu bung'ali, akhaba bung'ali bunyolekha khulwe lisubila. 31. Ne kakhali ba Isiraeli, babalonda lilaka lie bung'ali, sebolela lilaka lie bung'ali tawe. 32. Khwako? Sikila se babuenja mwisubila tawe, ne kakhali nga liaba busa nga mubikhwola bie lilaka. Mbo betuya khwibale lie bu bwituyilo; 33. Nga liandikwa, Lola, khonda mu sayuni libale lia bwituyilo nende lulwanda lubakwisia: Ne yesi yesi osubila muniye saliambwa chisoni tawe.

10 Bawandaayase, liliekomba lie kumoyo kwange lundi lisaba khu Wele khu baisiraeli lilimbo bakhoya baonisibwe. 2. Khubela ese ndi ne buloli mbo Bali nende sinani khu Wele, ne kakhali seli khu londekhana ne bukesi tawe. 3. Khubela nibo khulekha khuba nende bukesi bwebulungi bwa Wele, lundi khuiimilisia khurao bulungi bwabwe babene, se beaana babene khubulungi bwa Wele tawe. 4. Khubela Kirisito ali sisiakamo sie lilaka lie bulungi khubulumundu wasuubila. 5. Khubela Musa kenoosia bulungi buli bwe lilaka, mbo Omundu okhola Bibindu ebio akhabimenyele bibiene. 6. Ne kakhali bulungi buli bwe lisuubila bulomaloma mungila ye limanya, Okhalomaloma mumoyo kwoo oli, 'Naanu okhanine mwikulu? (ako kario, khurera Kirisito asi khukhwama mungaki:) 7. Namwe, Naanu okhekhe mumakombe? (Lilienelio, lili khurera angaki Kirisito lundi khukhwama mubafu.) 8. Ne kakhali liloma lili sina? Likhuwa lili simbi ne nawe, akhaba mukhanwa mwoo, lundi mumoyo kwoo:

lilienelinilio, Likhuwa lie lisuubila, nilio khwilwacha; 9. Lili mbo kababali ewe ocha huhwiyama ne kumunwa kwoo Omwami Yesu, mala osuubile mumoyo kwoo mbo Wele kamwinyosia niye khukhwama mubafu, ewe olaonisibwa. 10. Khubela lwe kumoyo Omundu asuubila khulwe khubulungi; ne khulwe kumunwa khukhwiyama khwakholekha khu lwe khuonisibwa. 11. Khubela chinyilili chiloma, Yesi yesi osuubila khuniye sakhaambwe chisoni tawe. 12. Khubela se khulio ne bu bwaukhani akarikari we omuyaudi ne umuyunani tawe; khubela ali busa omwami omwene we buyinda khu boosi abo bamulangilila. 13. Khubela yesi yesi okhalangilile khwisina lio omwami akhaonisibwe. 14. Kaba kariena nono bamulange oyo niye ba khamusuubila tawe? Ne liba liriena bamusuubile oyo niye bakha muulilakho tawe? Ne lundi bakhaulile bariena nakhaliyo omwilwaji tawe? 15. Lundi bakhelwache bariena, ne bakharamwa tawe? Nga liaandikwa, Bili bilayi biriena bikele biabo bibilwacha elomo endayi ya kumulembe, ne khurera busangafu bwe likhuwa ne bibindu bilayi! 16. Ne kakhali se bali boosi barire likhuwa lia wele tawe, khubela Isaya aloma ali, Omwami, Naanu owasuubila burume bwefwe? 17. Nono khwako lisuubila licha mukhuulila, lundi mukhuulila Likhuwa lia Wele. 18. Ne kakhali ese noma ndi, bakhaulilakho tawe? Yee kang'ali, chisauti chabwe chacha musialo siosi, ne kamakhuwa kabwe koola khundulo khwe sibala. 19. Ne kakhali noma ndi, Ba isiraeli seabanyile tawe? Khunyoya Musa

kaloma, khamusalisilie libuba khubirira khwabo bakhali babaandu tawe, ne khubirira khwirambo lisilu ese khamuambie lirima. 20. Ne kakhali Isaya Ali omunyindafu lukali, ne aloma, nanyolekha khwabo bakhambenja tawe, Ese nekesebwa khwabo bakhandeba tawe. 21. Ne kakhali khuba Isiraeli niye kaloma, Endalo yoosi nabalaisia kimikhono kiangе khwabo bakhali ne liria nende bandu bamayanu.

11 Ese noma Nono, Wele kamwatile aleyi babaandu bewe? Wele akania. Khubela sesi ndi Omu Isiraeli, owe lumicho lwa Aburahamu, owe kholo ya Benjamini. 2. Wele se kamwata eyo babaandu bewe nibo kamanya ekhuranga tawe. Namwe se mumanyile niko chinyilili chiloma khu Eliya tawe? Enga ekonjelela na asaba Wele khulwe khusitaka Isiraeli, naloma ali, 3. Omwami, berire bang'osi boo, lundi batechule ne khukwisia olutare choo; lundi Ese nasikale seng'ene, na kha bayiima khu khunjira. 4. Ne kakhali likobosia lia Wele liloma lilisi khuniye? Ese nebandile samwene be sisani chifuma Saba, bakha sikamilakho bifwanane bia Baali tawe. 5. Kali busa kario nono akhaba luno lwosi baalio ba batong'a baroborwa khulondekhana ne kumwalaalo. 6. Lundi kaba bali khu mwalaalo, nono selili lundi khulwe bikholwa tawe: aba kumwalaalo sekuli kumwalaalo tawe. Ne kakhali kaba bali khulwe bikholwa, nono aba sekuli lundi kumwalaalo tawe: sibacho nako bikholwa sebili lundi bikholwa tawe. 7. Nono siina? Isiraeli Se anyola esiesio nisio aenjanga tawe; Ne

kakhali burobosi kwasinyola, na basikale babofusibwa. 8. (Khulondekhana enga lia andikwa, Wele kabawa eroho ye khuungula, chimoni mbo bakhabona tawe, lundi kamuru mbo bakhaulila tawe;) mu ndalo chino. 9. Ne Daudi aloma ali, lekha emesa yabwe ikhole lurimba, ne kumureko, ne lulwaanda lwe khwituya, ne sirungilo khunibo babene: 10. Lekha Chimoni chiabwe chimalie mbo bakhabona tawe, ne beename asi kimikongo kiabwe sise siosi. 11. Ese noma nono, betuyile babene mbo bakwe? Wele akania: ne kakhali mbo mukhukwa khwabwe nio buonia bwiche khu be sibala, nio mbo baambwe likhendekha. 12. Nono kaba bali khukwa khwabwe khuba buyiinda bwe sibala, ne khu bombelelwa khwabwe lwe buyiinda bwe sibala, aba lilichuula liabwe lili likali lirie? 13. Ndi khenoma khwinywe banasibala, mubukali mbo nga ese ne ndi omurumwa khu banasibala, mbalaayisia kimilimo kiange: 14. Kaba bali mungila yosi yosi ese nyala naambia libuuba ababo Bali be kumubili kwase, lundi nyala naonia balala babwe. 15. Khubela kaba bali limwatweyo liabwe liba liambania sibala, likhabe liriena liliakanila liabwe, ne kakhali bulamu khukhwama mulifwa? 16. Khubela kaba bali kamatunda ke khunyoa kali kamaraboora, lubusio lwosi luli luraboora: lundi kaba bali chisia Chiba chi ndaboora, chisakia chosi chiba chirio. 17. Ne kabali chisakia chindalakho chafunikha chiarurakho, ne ewe, wabele kumusala ku museituni (Olivu) kwe munda, nikwo bakelekhakho akarikari wabwe, lundi

alala ne nabo mulia khukhwama khu chisiia chindala lundi bunefu bwe kumusala ku museituni; 18. Okhefumia sibacho ne chisikia tawe. Ne kakhali kabali wifumia, ewe sosuta chisiia tawe, ne kakhali chisiia chikhusuta ewe. 19. Ewe olaloma oli, Chisakia chafunwa cha rusibwakho, nyo mbo ese ngelekhwekho. 20. Bulayi; khubela khulekha khu suubila bafunibwa barurakho, mala wema khubela lisuubila. Ewe okheninia munganakani tawe ne kakhali ria; 21. Khubela kaba bali Wele se kalekhao bubweyangu bwe chisakia chindaayi tawe, baa bureke ne busa wesi sebanyala bakhulekhako tawe. 22. Lola khwako bulayi ne kamakanga ka Wele: khwabo babakwa, kamakanga; ne kakhali khu lubeka lwoo, bulayi, kaba bali ewe ochilila mubulayi bwewe: nga ta ewe wesi okhakhawe ne khu rusibwakho. 23. Ne abo boosi, kaba bali sebamenya mu khulekha khusuubila, bakha kelekhwemo: Khubela Wele anyala khu bakelekhamo nibo lundi. 24. Ne kaba bali ewe wakhalwa khukhwama khu musaituni (olive) kuli kwe muundaa mwiiba, ne wakelekhwakho sibacho nende liba mukhuba ku mutunda kumulayi (olive): mu bukalisu khukhila kano, kanyala kaba khu chisakia che liba liekhuranga, barebwe khu musala ku museituni kwabwe babene? 25. Ne se nikomba tawe, ba wandaayase, mbo mube bakhali ne limanya tawe khu lusimo luno, mukhecha mwaba bakesi mu nganakani chenywe mwabene; mbo bu boofu bulikho sitonyi bwakholekha khuba Isiraeli, nio mboo mu bwichufu be siibala bechemo. 26. Noonoo kario ba Isiraeli

bosi bacha khuonisibwa; nga liandikwa, mbo acha khwicha omuonia khukhwama Sayuni, ne acha khurusiao bukhali bu Wele tawe khu khwama mu Yakobo. 27. Khubela eyino Eli endakano yange khunibo, nga nendirusiao bubuoni bwabwe. 28. Nga khulondekhana ne elomo endayi, balii basiku khubela enywe: ne kakhali nga lietila khulwe bu roboosi, Bali basiimwe Khulwa Papa. 29. Khubela bianwa nende kumulango Kwa Wele sekulimo ne liliekanila tawe. 30. Enga enywe mubiise bi biabira se mwasubile Wele tawe, ne kakhali mwanoyile siisa mu khubirira khulekha khu suubila khwabwe: 31. Ne kakhaba kario abano bosu seba suubila tawe, mbo khubirira mu siisa sienywe boosi banyale khunyola siisa. 32. Khubela Wele kaba malilisia boosi mu khulekha khu suubila khwabwe, mbo anyale khuba ne siisa khu boosi. 33. Oh chisiiba che buyinda alala chebukesi nende limanya lia Wele! Buli burie bukhaimilisiwa Bukhalakilo bwewe, be chingila chiabwe chikha menielisibwa tawe! 34. Khubela naanu omanyilekho chinganakani cho Omwami namwe naanu waba omukambisi wewe? 35. Namwe naanu wamuwa sindu ekhuranga, mala ba khamukobosele lundi? 36. Khubela khuniye, ne khubirira muniye, ne khuniye, bibindu bioosi: Khuniye lube luyali mindali. Kario.

12 Mwisaya enywe nono, ba wandaayase, musiiisa sia Wele mbo muane kimibili kienywe sisakhiilo sie bulamu, siraboora, sifukilibwa ne Wele, niyo buli bukhlabani bwang'ali. 2 Ne

mukha kalukhasibwa muliba lie sisialo sino tawe, ne kakhali mukalukhasibwe mu khukhola buya chingakani chenywe, nio mbo mutiile mumbala Sina esio sili silayi, ne sifukilibwa, ne silungi, sie liliyenya lia Wele. 3. Ese noma, khubirira mu mwaalalo nikwo naebwa, khu buli mundu oli akari wenywe, okhe yibasiasia wamwene khuba angaki khukhilakho nga kenyekha wibasiasia tawe; ne kakhali obe meso mu mebaasio, khu londekhana nga Wele ne kaelesia buli mundu sikelo sie lisuubila. 4 Khubela nga khuli nende bitonyi biikali mumubiili mulala, ne bitonyi bioosi sebiili ne kimilimo kiabukhana:

5 Kario efwe, khuuli bakali, khuli kumubiili mulala mu Kirisito, ne buli sia mulala ali sitonyi khu kundi. 6 khuba ne biaanwa bi biabukhana khulondekhana ne kumwaalalo nikwo khwaebwa, kaba bali bang'osi, lekha khung'ole khu londekhana ne sitonyi sie lisubila: 7. Namwe bukholi milimo, lekha khukhole mu khulindilila khumilimo kiefwe, Namwe oyo owekesia, khumekesio; 8. Namwe oyo otinyilisia, mukhutinyilisia; oyo oaana, lekha akhole mu bulayi; oyo Naye oruka mubukesi; oyo owekesia siisa, mu khwekhoya. 9. Lekha busiime bukhaba busa bwe bubeyi tawe. Biila elio lili limayanu; khayiila khwisio sili silayi. 10. Khe mube ne busiime mulala khu kundi nga bawandaaye; ne buriana ne khukwokesia si lukuluku khu wasio; 11. Sebali bakara mukhukhola bukhala tawe, khitinyilila muroho; mu khukholela Omwami; 12. ikhoela mulieikina; yikhaliikha mumatinyu; chililila khukhwi tinyilisia mu masaba; 13. Kabaa bi bienyikhane

khu baraboora; khu khwiana khu khwakanila bakeni. 14. Bae chimbabaasi abo bamunyasia enywe: aana chikhabi ne mukhalama ta. 15. Yekhoya ne nabo abo babekhoya, lundi lila ne nabo balikho balila. 16. Ba ne nganakani ndala mulala nokundi. okhebasia bibindu bia angaki ta, ne kakhali fukilila khu siobela babandu bali nende enganga yaasi. Mukhaba bakesi mumbasio kenye mwabene tawe. 17. Mukharungia Omundu kamabi khumabi tawe, aana bibindu bie bung'ali mumoni che babandu boosi. 18. Kabali kanyalikhana, mubukali buli mwiwe, menya ne kumulembe ne buli mundu. 19. Basiime bekumoyo, mukharungia mwabene tawe, ne kakhali welesiia bubweyangu khwirima: Khubela liandikwa, burungi buli bu bwange; Ese kharungie, alomaloma omwami. 20. Khwako kaba bali omusiku woo ali ne njala, mulisie; kaba ali ne bulesia, muwe anywe: Khubela mukhukhola khurio olaba nora kamanda ke kumulilo khumurwe kwewe. 21. Okhakhilwa ne kamamayanu tawe, ne kahali khila kamamamayanu ne kamayi.

13 Lekha buli mundu abe aasi we bunyali bwa angaki. Khubela se sekalia kamaani kosi kosi ne kakhali ka Wele; ne kamaani kalio karebwao ne Wele. 2. Yesi yesi kakhaba kario oyingania bunyali, ayingania niko Wele arao: ne abo bayigania babene bakhanyole sikhakilo. 3. Ne kakhali Baruki Sebali bamayanu khubikholwa bilalayi tawe, ne kakhali khu mabi. Ewe nono okhalekhe khuria bunyali? Khola ako kali kamalayi, ne ewe

okhanyole efuma ya kamenako: 4. Khubela Ali omurumikhi wa Wele khumalayi. Ne kaba bali ewe okhola akako kali kamayanu, ba ne buri; Khubela sasuta embalu busa tawe; Khubela ali omurumikhi wa Wele, oruongia okhola lirima khuyo okhola kamayanu. 5. Khwako ewe wenyikha webombie, seli khwirima liong'ene ta, ne kakhali khulwe liba lie kamebasio kosi. 6. Khu lwakano runga busuru bwosi: Khubela bali barumikhi Ba Wele babemelela bulikhase bibindu bino. 7. Khamuane nono kumurungo kwosi: kumurungo khu oyo nie khumurungo kwenyikha, busuru khu webusuru; buri khu we buri liriana khuniyo liriana lienyekha. 8. Okhabakho ne likobi liomundu liosi liosi tawe, ne kakhali siimana mulala khukundi: Khubela oyo osiimana nende okundi olanisie lilaka. 9. Khu lino, Ewe okhakhola bueeyi tawe, Ewe okhera ta, ewe okheba ta, ewe okharusia buloli bwa bubeyi ta, ewe okhekomba ta, ne kabali khubakhoo nende lilaka liosi liosi, mu bwimbi litubasibwa mu lulomo luno, mbo, sima omucheswa woo nga ne wesima wamwene. 10. Busiime sebukhola likhendekha khumucheswa ta: Kwako busiime bwolanisia lilaka. 11. Ne mbo, khumanya bise, mbo aluno ari bili bise bia angaki, khu khwinyokha mwilo: khubela nono buonia bwefwe bise bino buli simbi khukhila nga khwa suubila. 12. Siilo siawe, bwasiiele: lekha khwi fwarure bikholwa bie musilima, ne lekha nono khwifware bulwani bwe buwanga. 13. Lekha efwe khukende mu bukwaalafu, nga mundaalo; se muli mu siifwabi ne bunywi tawe, seli mubunuli ne

bulianga tawe, seli mu kuingana ne mwi khendekha tawe. 14. Ne kakhali ifwara Omwami Yesu Kiristo, ne mu khasiobela kumubuli tawe, Khu khwolanisia liliekomba liakwo.

14 Oyo oli omutekhele mwi suubila enywe mwakaanile, ne kakhali okhaingana ne naye khulwe kamebasio kewe tawe. 2. Khubela mulala asuubila ali anyala kalia bibindu biosi: okundi, oli omutekhele, alia chinyenyi. 3. Lekha oyo Olia akhalekelesia okhalia ta; ne okhalia ta akhamukhalakila Olia ta: Khubela Wele kamwakanila. 4. Ewe naanu onyala wakhalakila omukhalabani wo mundu okundi? Khu mwami wewe omwene kema namwe akwa. Yeee, akhemisibwe angaki: khubela Wele anyala wamukhola wema. 5. Omundu mulala abukula endalo ndala yaba embofu khukhila ekindi: no okundi naye abukula chindaalo chiosi chi fwaanane. Lekha buli mundu efukilile munganakani chewe. 6. Oyo ofukilila endalo, akifukilila khu Wele, na yesi yesi olia alia khulwo omwami, khubela asiima Wele; lundi okhalia tawe, salia khu mwami tawe na yesi amusiima Wele. 7. Se alio omundu kwifwe omenyanga khu lienya liewe omwene tawe, namwe salio omundu khwifwe ofwa khulienya liewe tawe. 8. Khubela khwakhamenya, khumenya khu mwami; ne akhaba khwa khafwa, khufwa khu mwami: yakhaba khwakhamenya nono, namwe khufwe, khuli bo mwami. 9. Khubela khumala khuno kirisito kafwa, lundi kenyokha khukosi, lundi kalamusibwa, nio mbo anyale khaba omwami wa boosi babafwa nende bamenyile. 10.

Ne kakhali sina no khalakila wandayo? Namwe sina ne walekelesia wandayo busa? Khubela fwesi khukheme ebweni we ndebe yesikhalakilo ya Kiristo. 11. Khubela liandikwa, enga ese nemenyile, omwami aloma, buli lisikamo likha sikamile, lundi buli lulimi lukheyame khu Wele. 12. Abwenao nono nio bulimundu aliboola kakewe omwene khu Wele. 13. Nono khekhulekhe khu khalakanila: ne kakhali khalaka lino, mbo omundu yesi yesi akhara libale lia bwituyilo namwe sinyala sia khola wandaaye khu ngila yewe akwa ta. 14. Ne Ese khakibwe, ne ndi nende bung'ali mu mwami Yesu, mbo se silio siosi sinyalu khusiene tawe: na kakhali khuyoo obona si sindu siosi khulekha khaba sikwalafu, khuniye se silisikwalafu ta. 15. Ne kakhali Waaba nobelesia wandaayo khusiakhulia nisio ulichanga, aba solakholanga khulwe busime tawe, okhalekha siakhullia nisio olia sionaka omundu niye Kiristo afwila tawe! 16. Lekha nono kamalayi kenye kakra lomekhwa khu bubu ta: 17. Khubela bubwami bwa Wele sebuli khulia ne khunywa tawe; ne kakhali bulungi, ne kumulembe, ne busangafu mu roho omuraboora. 18. Khubela oyo olimubindu bino ne akholela Kirisito afukilibwa khu Wele, ne babandu boosi. 19. Lekha nono efwe khulonde enyuma wekhubindu bing'ona kumulembe, lundi bibindu nibio mulala namwe okundi anyala kombakhwa. 20. Khubela siakhulia se sionaka kimilimo kia Wele ta. Bibindu biosi kang'ali bili bimiliyu; ne kakhali buli bukikhwa Omundu oyo olia ne lilikhikha. 21. Sebuli bulayi khulia

chinyama namwe khunywa endali tawe, namwe sisindu siosi siosi niso wandaayo anyala ketuyakho, namwe abelele, namwe akholwe omutekhele ta. 22. Ewe oli nende lisubila? Khobe natio khu wamwene ebweni wa Wele. Ali ne busangafu oyo okhekkhalakila omwene mubindu nibio afukilila tawe. 23. Ne oyo owayayanga akhalakilwa kabali alia, sikila alia nakhali ne lisubila ta: khubela siosi siosi sikhali ne lisubila tawe, sili bubwoni.

15 Efwe nono, khu; be kamaani khwenyikha khuyete batekhele khulwe busiro bwabwe, khu khesimisia fwabwene tawe. 2. Lekha buli sia mulala wefwe asimisie siangoye khulwe bulayi bwewe mu khwombakhana. 3. Khubela ata Kiristo se kesimisia omwene tawe; ne kakhali, nga liandikwa, bukhomo nibwo ba khukhoma ewe bwakwa khwise. 4. Khubela buli sisindu si sia andikwa mu maandiko ekhuranga sia andikwa khu khwikisia efwe, nio efwe khubirira mu lie fwilisia ne khuramo kumoyo kwe chinyilili khunyale khuba na li lieyikina. 5. Aluno ari Wele we li lie khalilikha ne khuolelesia amukhole enywe mube mu bulala munganakani khu mwabene ne mwabeene khulondekhana ne Kiristo Yesu: 6. Nio enywe mwolane munganakani ndala ne kumumilo mulala muwe luyali Wele, akhaba Papa wo mwami wefwe Yesu Kiristo. 7. Nio kario yakanila mwabeene ne mwabeene, nga Kirisito yesi ne akhwakanila efwe khu luyali Iwa Wele. 8. Saayi mubolela ndi Yesu krisito aba we bukholi khwabo besikhebo khubela khulwe bung'ali

bwa Wele, khu khwekesia khuli wele ali omusubilwa nibio kalaka khu bakuka. 9. Ne mbo banasibala banyala khuwa luyali Wele khulwe siisa siewe; nga liandikwa, khubela mungila ino nja khukwiyama ewe mu besibala ne nimbe khulwe lisina lio. 10. Ne lundi aloma ali, ikhoya, enywe be sibala; ne babandu bewe. 11. Ne lundi, fumia omwami, enywe mwesi be sibala; ne mu buyiile, enywe bandu boosi. 12. Ne lundi, Isaya aboola ali, acha kwicha we lisaaye lia Chese, ne acha khwinyokha khu khwamiya be sibala boosi, mala bali mweyikina. 13. Nono Wele we lilieyikina amwichusie enywe ne busangafu ne kumulembe mu khusubila, nio muchiliile mulieyikina, khu birira khumaani ka roho omuraboora. 14. Ne ese sesi samwene neulile khwinywe, bawandaayase, mbo enywe mwesi mwichusibwa ne bulayi, mwichusibwe ne bukesi bwosi, munyale mwesi khu khwiyikisiana mwabene. 15. Ne mu barwa yino bawandaase, naandike mubukali mala mubunyindafu khwinywe, Ne mura munganakani chase, Khubela kumwalaalo nikwo naebwa ne Wele. 16. Mbo mbe omukholi wa Yesu Kiristo khu be sibala, ne nilwacha elomo endayi ya Wele, mbo lilierusia lie be sibala niolane khufukilibwa, khukolwa babaulwe khulwa roho omuraboora. 17. Nono nabele khwako nyala nesonia khubirira mu Yesu Kiristo mu bindu ebio khu Iwa Wele. 18. Khubela senja khu khakakho khu lomalomakho khu bindu biosi nibio Kirisito akhakhola nase tawe, khukhola be sibala barie khulwe likuwa ne bikholwa, 19. Khubirira mubunyali

bwe bilolekho nende kekhuukia, khu maani ka roho wa Wele; nio mbo khukhwama mu Yerusalemu, khukhwola Eluriko nolanile mwibwichufu khu kwilwacha elomo endayi ya Krisito. 20. Yee, nono nakhakile khwilwacha elomo endayi, sibacho nende abundu niyo Kirisito akhalomwakho ta, niyo kha kholandio nombakha khu musiiingi nikwo omundu okundi ombakha tawe. 21. Ne kakhali Nga naliandikwa, khuyo niye ba khalomalomakho tawe, ba khamubone; ne abo ba khaulilakho ta bacha khumanya. 22. Khubela mungila yino yosi nabele ne khangililwa lukali khumukenia enywe. 23. Ne kakhali sendi ne bu bwangu bubundi nu chimbeka chino tawe, ne khuba ne liliekomba libofu khu miaka kimikali kino khu mukenia enywe; 24. Bise nibio nenyela khubukula lukeendo lwe khucha mu Sipeini, ndeecha nio muli; khubela suubila khu mubona enywe mu lukeendo lwase, mala bangalusie khu lukendo lwase, kabali khunyoa tekate nichusibwe ne bulala bwenywe. 25. Ne kakhali luno khonja Yerusalemu mu bukholi khu baraboora. 26. Khubela liasimisie abo bali Masedonia ne Akaya barusie khu batambi baraboora balala bali Yerusalemu. 27. Lia basimisie lukali; mala babele be kamakobi nga bali. Khubela kaba bali be sibala ba kholebwe banyoli khu bindu bia mu muroho, kumulimo kwabwe nono kuli khu bayeeta nibo bibiindu bie kumubili. 28. Nono khwako nemalile khu khola kano, ne khukwikasia khunibo litunda elino, nja khu birira ewenywe, nenja Sipeini. 29. Ne ndi ne bung'ali mbo ne nicha niyo

muli, nja khwicha mu bwichufu ne chikhabi che elomo endayi ya Kirisito. 30. Nono mbesaaya enywe, ba wandaayase, khubela khulwe omwami Yesu Krisito, ne khulwe busiime bwa roho, mbo mukhakile alala ne nase mu masaba kenye khu Wele khubela esese; 31. Bali nolane khu lindwa khu khwama khwabo ba khasubila tawe bali mu Yuda; mala bukholi bwase mu Yerusalemu bwole khu fukilibwa ne babaandu ba Wele ebweneyo. 32. Nio mbo nyale khu khwicha niyo muli ne ekhoyo khulwe liliyenya lia Wele, ne nolane khuulukha ne nanywe. 33. Luno ari Wele we kumulembe abe nanywe mwesi kario.

16 Mumanyisia Fibi khwinywe wandaayefwe omukoko, oli omukhalabani we ekanisa eli Senjire: 2. Mbo enywe mu mwakanile mu Mwami, enga lili lie barabora, lundi mbo mumuyete musindu siosi siosi nisio ali neliliyenya khwinywe: khubela kabele wenganga khu bakali, lundi ne samwene sesi. 3. Khesia Pisisila ne Akwila bayeti basiase mu Kirisito Yesu: 4. Nibo khulwe limenya liase beaana bulamu bwabwe embi khufwa khubela ese, khuni nibo sabali bong'ene khupila orio ta ne kakhali khu chikelesia chia banasibala. 5. Bulai bwene khesia libukana lili munju yabwe. Khesia omusime wange Painito, oli litunda lie khuranga lia Akaya khu Kirisito. 6. Khesia Maria, owe rusia khumilimo kimikali khubela efwe. 7. Khesia Andronika nende Yunia, balebe bange, nende basiange basiange, Bali bamanyifu akarikari we barumwa, abo boosi ba barangira mu Kirisito ebweni wange. 8. Khesia

Ampilliato omusime wange mu Mwami. 9. Khesia Arubina, omuyeti wefwe mu Kirisito nende Sitakisi omusime wange. 10. Khesia Apele owolana mu Kirisito. Khesia abo bali benju ya Aritobolas. 11. Khesia Herodioni omulebe wange. Khesia abo bali benju ya Narikiso, Bali mu Mwami. 12. Khesia Turufena nende Turufosa, basioba mu Mwami. Khesia omusime Pasisi, owasioba lukali Sana mu Mwami. 13. Khesia Rafo owabukulibwa mu Mwami, nende maayi wewe nende owange. 14. Khesia Asingirito, Fulekoni, Hamasi, Paturobas, Hamasi nende basime Bali ne naabo. 15. Khesia Filologo, nende Julia, Neria, nende wandaaye omukoko, nende Olimpa, nende baraboora boosi Bali ne naabo. 16. Khesiana mwabene ne mwabene mu khwe khoyanilana. Chikelesi choosi cha Kirisito cha bakhesisie. 17. Nono mwikonjelela enywe, ba wandaayase, lolelela aboo barera chinjakha nende kamakoso sibacho ne kamekesio niko mwekesibwa; ne barureyo. 18. Khubela bali bario se barumikhilanga omwami Yesu Kirisito tawe, ne kakhali chinda chabwe babene; ne lundi mu makuwa kamalayi nende lulomo lukwalafu babea kimioyo kiabo baali batekhele. 19. Khubela khuria khwenywe khwaulilikhane engelekha khu baandu boosi. Ndi ne busangafu khwako khubela enywe: ne kakhali nanya enywe mube bakesi khwako Kali kalamayi, ne mube basilu mu makuwa ka mamayanu. 20. Ne Wele we kumulembe alatubundulakila Sietani asi we bikele bienywe embi ari. Kumwalaalo kwa omwami wefwe Yesu Kirisito kube ne nanywe. Karioo.

21. Timoteo omukhalabani wasiange, nende Lukasi, ne Chason nende Sosipateri omulebe wange, amukhesia. 22. Ese Taritio, owa andika ebarua yino, nabakhesia mu Mwami. 23. Gayo omwenengo, nende be kelesia bosi babakhesia. Rasto owi milela esoko kamukhesia, nende Kwato wandayefwe. 24. Kumwalaalo kwo Omwami wefwe Yesu Kirisito kube ne nanywe mwesi. Karioo. 25. Nono khuyo oli nende bunyali khu mwemekha enywe khu londekhana ne elomo endayi, ne kamelwacho Ka Yesu Kirisito, khulondekhana ne libula lie chisimo, chichabikhwa mubwikisi khukhwama enga sibala ne sianja. 26. Ne kakhali Nono biakholebwe abuwanga, lundi nende chinyilili chebang'osi, khulondekhana ne kamalaka kamindali ka Wele, liakholebwa khu manyikhana mubibala bioosi muliria lie lisubila: 27. Khu Wele yeng'ene webukesi, lube luyali khubirira khu Yesu Kirisito mindali. Kario (kaandikwa khu barumi khukhwama mu bakorinto, ne Fibi omurumikhi we kanisa ya Senjeria warumwa.)

YESU - MUREKERESIE NIYE!

Mu bangeli, lilaka liama khu Wele... **“murekeresie niye!”** alomaloma khu mwana wewe omusiime, Yesu. Kaba bali soli ne bung’ali khwisio sicha khwikholekha khwiwe nomalile khufwa tawe, sina nokhasomakho mala obone nisio Yesu aloma ali si khekholekhe?

Kabali oloba Yesu, okhakhakalilwe endalo ndala khwikhuwa liewe. **Murekeresie niye!** “Ne kaba bali omundu yesi awulila kamakhuwa kase, mala sa suubila tawe, ese se mukhalakila tawe; Khubela ese senecha khukhalakila sibala tawe, ne kakhali khuonia sibala. Oyo wundoba ese mala se kakanila kamakhuwa kange tawe, khuli nende mulala okhamukhalakile: likhuwa nilio nomalome, liliene nilio likhamukhalakile khundalo emalilisi.” (Yoana 12:47-48)

Kabali so suubila mu Yesu tawe, okhafwile mu bwoni bwoo. **Murekeresie niye!** “Khwako namubolela enywe, mbo mu khafwe mubwoni bwenywe; Khubela kaba bali se musuubila mbo ese niye tawe, mukhafwile mubwoni bwenywe.” (Yoana 8:24) “Khubela boosi bakhola bubwoni mala babombelelwa luyali lwa Wele.” (Barumi 3:23)

Yesu kaloma ali solicha mwikulu nekhali khuniye tawe. selikhoo engila ekindi tawe! **Murekeresie niye!** “ese nise engila, bung’ali, ne bulamu; omundu sekecha khu Papa, Ne kakhali khubirira mwise.” (Yoana 14:6)

Kabali sosuubila khu Yesu tawe, ewe khale wakhakalilwa emakombe

kuburukha! **Murekeresie niye!** “Oyo osuubila mu niye sakhalakilwa tawe: Ne kakhali oyo okhasuubila tawe akhalakilwa khale sikila oyo okhasuubila mwisina liomwana omutelwa yeng’ene wa Wele tawe.” (Yoana 3:18)

Kabali watibile, wenyikhane oonisibwe khu khwama khwirima lia Wele. **Murekeresie niye!** “Khubela omwana wo mundu kecha khuonia esio sisiatiba.” (Matayo 18:11) “namwe sebulikhoo buonia mwisina lilindi: Khubela sekhulikho lisina lindi asi we likulu liliaebwa mu baandu, niye khukhoyelwe khuonisibwe.” (Bikholwa bia barumwa 4:12)

“Khubela nibo khuba basilu khulwe bung’ali bwa Wele, mala ne bachilila khurao bung’ali bwabwe, sebebombisie babene khubung’ali bwa Wele tawe.” (Barumi 10:3) Wenyikha bung’ali bwa Wele. Ne bukhali nibwo, okhache emakombe. Khubise bino, onyala wa kaanila bung’ali bwa Wele. **Murekeresie niye!** “Nekakhali nga bakali nebamuakanila, khunibo baebwa kamaani kekhuba babaana ba Wele, akhaba abo basuubila mwisina liewe.” (Yoana 1:12)

Saba Yesu, mala omurebe eche mumoyo kwoo, akhuonie, mala akhubele bubwoni bwoo. “mbo kabali ewe wiyama ne kumunywa omwami Yesu, mala osuubile mumoyo mbo Wele amwinyusia khukwama mu lifwa, ewe olaonisibwa.” (Barumi 10:9)

Kamakhuwa niko Yesu kaloma kema bung’ali- luno, muchuli na mindali!

Murekeresie niye! “Likulu ne sibala bikhaweo; Ne kakhali kamakhuwa kange sekaliwao tawe.” (Matayo 24:35) “Ne nga liarebwao bandu khufwa lulala, Ne kakhali ne bamalile sikhhalako.” (Baibrania 9:27) Okhebulila oli enusu ya khuranga ye lunyilili luno yakikisha bung’ali buli khase omundu nafwa?

Ne buli bung’ali mbo endalo ndala, wesi okhafwe, mala kenyikha obe ne bung’ali mbo wesi okhakhakalilwe khwikhuwa nilio yesu aloma! Burobosi bwoo buli si?

ESE NDOBORA KHUKWIKANA YESU... Murekeresie niye!

“Ne kakhali yesi yesi okhanjikane ebweni we ba baandu, yesi sesi khamikane ebweni wa Papa oli mwikulu.” (Matayo 10:33) ne oyo okhasubila mumwana Sali bona bulamu tawe; ne kakhali lirima lia Wele lili khungaki khwewe.” (Yoana 3:36b)

ESE NDOBORA KHUFUKILILA YESU NGA OMUONIA WANGE ...

Murekeresie niye! “Na ese mbaelesia nibo bulamu bwa mindali; ne sabali buna tawe, namwe omundu yesi yesi salikhonoola mukhono mwange tawe.” (Yoana 10:28) “Oyo oli no mwana ali ne bulamu, ne oyo okhali no mwana wa Wele Sali ne bulamu tawe.” (1 Yoana 5:12)

Kabali wafukilile khusubila Yesu Kiristo nga omuonia woo nomalile khusoma lupapulo luno nosiima khuandikile mala khumanye.

Email:
bungomabibletranlators@gmail.com